

Pákén Enjil cha

Mattáay

kalamá

Mattáay Enjilay pajjár

É ketábay nebisók, Mattá, ke domi námi Láwi at, Hodáwandén Issáay moridé at. Á, Bani Esráilié at o cha Issáay moridiá pésar máliátgiré at (Mattá 9:9). Mattá, é ketábay tahá cha pésarigén paygambaráni péshgóián pésha dárit ke Issá Hodáay dém dátágén rakkénók ent.

Mattá pésha dárit ke Issá Ebráhém o Dáuday padréch ent, bale tahná Yahudiáni rakkénók naent, sajjahén donyáay rakkénók ent. Wati wánokán sarpada kant ke Issá Masihay pant o tálimáni sarhál “ásmáni bádsháhi” ent o sajjahén mardom, agan cha wati gonáhán pashómán bebant o Issáay sará báwar bekanant, ásmáni bádsháhiá rawant o abadmánén zenday wáhonda bant.

Mattáay Enjilay tahá, Issáay pédáesh o kasáni, pa Hodái kárán áiay tayár bayag, Jalilay damagá áiay tálim o kár, áiay dém pa Urshalimá rawag, Urshalimá áiay dátágén sar o sój, salib kasshag o cha marká rand zendag bayag pa red o band nebisag butagant.

Issáay béh o bonyád

(Luká 3:23–38)

1 ¹ Issá Masih, Dáud o Ebráhémay chokk ent. Áiay béh o bonyáday daptar é dhawlá ent:

² Esháke Ebráhém, Ákube Eshák, Yahudá o áiay brát ke Ákubay chokk atant. ³ Páres o Zárahe Yahudá ke áyáni mátay nám Támár at. Hesrune Páres, Arame Hesrun, ⁴ Aminádábe Aram, Nahshune Aminádáb, Salmune Nahshun, ⁵ Buáze Salmun ke áiay mátay nám Raháb at, Óbayde Buáz ke mátay námi Rut at, Yassie Óbayd, ⁶ bádsháh Dáude Yassi.

Solaymáne Dáud, ke máti pésará Uriáay lógi butagat, ⁷ Rehobáme Solaymán, Abiáe Rehobám, Ásae Abiá, ⁸ Yehushápáte Ásá, Yuráme Yehushápát, Ozziáe Yurám, ⁹ Yutáme Ozzíá, Áháze Yutám, Hezekiáe Áház, ¹⁰ Manassie Hezekiá, Ámune Manassi, Yusiáe Ámun, ¹¹ Yekuniáe Yusiá o áiay sajjahén brát, ke é wahdá Yahudi Bábelá darándhéh^a butant.

¹² Cha Bábelay darándhéhiá rand, Shiáltiále Yekuniá, Zerubábele Shiáltiál, ¹³ Abihude Zerubábel, Elyákime Abihud, Ázure Elyákim, ¹⁴ Saduke Ázur, Ákime Saduk, Elihude Ákim, ¹⁵ Eliázare Elihud, Mattáne Eliázar, Ákube Mattán, ¹⁶ Issope Ákub ke Maryamay mard at. Cha Maryamá Issá pédá but ke Masih zánaga bit.

¹⁷ É dhawlá, cha Ebráhémá beger tán Dáudá chárdah posht o cha Dáudá beger tán Yahudiáni Bábelay darándhéhiá dega chárdah posht o cha á darándhéhiá beger tán Issá Masihá ham chárdah posht ant.

Issá Masihay pédáesh

(Luká 1:26–38; 2:21)

¹⁸ Issá Masihay pédáesh é dhawlá at: Issáay mát Maryam, Issopá ság kortagat bale cha áyáni sur o árósá pésar, zántesh ke cha Hodáay Pákén Ruhá,^b áiay láp porr butag. ¹⁹ Maryamay lógwájah Issop, rást o pahrézkárén mardomé at, nalótheti Maryamá bannám bekant, paméshká wati delá shawri kort: “Pa bétawári é ságá bepróshán.” ²⁰ É bárawá angat pegr kanagá at ke áiay wábá anágat^c Hodáwanday préshtagé átk o gwashti: “Issop, oo Dáud bádsháhay chokk! Cha wati deshtár Maryamay zurag o lógá baragá mators, chiá ke áiá é láppori, cha Pákén Ruhá rasetag. ²¹ Á, mardénchokkéay sará chellaga bit o áiay námá Issá^d bekan, chiá ke á wati kawmá cha áyáni gonáhána rakkénit.”^e ²² É sajjahén kár paméshká chosh butant tán Hodáwanday hamá habar rást o

^a1:11 Darándhéh, bezán jaláwatan.

^b1:18 Hodáay Pákén Ruh, bezán Ruholkodos.

^c1:20 Anágat, bezán yak anágat, achának, nágahán.

^d1:21 Issáay máná “Hodáwanda rakkénit” ent.

^e1:21 Rakkénag, bezán neját dayag, bacchénag.

paddarf bebant ke áiá cha nabiay zobáná gwashtagant: ²³ *Neshtagén janénchokkéay láp porra bit o mardénchokkéay sará chellaga bit o áiay námá Emánuil pera bandant*,^g ke eshiay máná “Hodá gón má” ent. ²⁴ Wahdé Issop cha wábá ágáh but, hamá dhawlá ke Hodáwanday préshtagá hokm dátagat, wati jani zort, ²⁵ bale tán á wahdá ke chokk pédá nabutagat, gón áiá wapt o wábi nakort o chokkay námi Issá per bast.

Issáay cháragá nojumiáni áyag

2 ¹ Bádsháh Hirudisay ahd o bárigá, wahdé Issá Yahudiahay damagay shahr Bayt-Lahemá pédá butagat, gorhá cha ródarátká^h lahtén nojumi Urshalimay shahrá átk. ² Jostesh gept: “Hamá nonnok ke pa Yahudiáni bádsháhiá pédá butag, kojá ent? Má áiay estár dar áyagá distag o pa áiay parastesh kanagá átkagén.” ³ Cha é habaray eshkonagá, Hirudis bádsháh o Urshalimay sajjahén mardom báz paréshán o deltaparkahⁱ butant. ⁴ Hirudisá kawmay sajjahén dini péshwá o Sharyatay zánóger^j lóthet o jost geptant ke: “Masihay pédáesh kojá bayagi ent?” ⁵ Áyán passaw^k dát: “Yahudiahay shahr Bayt-Lahemá pédá bit, chiá ke nabiay ketábá nebeshtah ent:

⁶ ‘Oo Yahudáay shahr Bayt-Lahem!

*Taw Yahudáay hákemáni nyámá kasterén naay,
chiá ke cha taw yak hákemén sardáré pédá bit
ke á mani kawm Bani Esráilay shopánkiá kant.”^l*

⁷ Gorhá Hirudisá nojumi chérandari lóthetant o á estáray dar áyag o záher bayagay allamén wahdi jost kort ke kadén at. ⁸ Randá áiá nojumi pa hamá nonnokay shoház o dar géjagá Bayt-Lahemá ráh dátant o gwashti: “Berawét o é chokkay bárawá sharr patth o pól bekanét, wahdé shomá dar gétk, maná sahig bekanét tán man ham pa áiay parastesh kanagá berawán.” ⁹ Bádsháhay habaráni eshkonagá rand, nojumi sar geptant. Ráhá rawán, hamá estár ke áyán dar áyagá distagat, áyáni démá pésh kapán, hamá jágahay sarborá óshtát, ke nonnok ódá at. ¹⁰ Cha é estáray gendagá, sakk báz washdel butant. ¹¹ Lógá shotant o nonnokes áiay mát Maryamay gwarán dist. Gorhá kóndhán kaptant o chokkesh parastesh kort, wati tohpah o thékiáni hokkah^m o zabáddánes pach kortant o sohr o sóchoki o morresh pa nonnoká sawgát kortant. ¹² Randá, Hodáyá wábá á hozzhár kortant ke Hirudisay kerrá per matarrant. Gorhá cha dega ráhé, wati moltká shotant.

Dém pa Mesrá

¹³ Nojumiáni per tarragá rand, Hodáwanday préshtagé Issopay wábá átk o gwashti: “Chokk o chokkay mátá bezur o Mesrá betach, tán man tará nagwashán hamódá bedár, chiá ke Hirudis chokkay dar géjag o koshagá delmánag ent.” ¹⁴ Gorhá, Issop anchosh ke cha wábá ágáh but, chokk o chokkay máti zort o shapi shap dém pa Mesrá shot. ¹⁵ Tán Hirudisay marká hamódá mantant tán Hodáwanday hamá habar rást o paddar bebit ke cha nabiay kawlá gwashag butagat: *Man wati bacch cha Mesrá lóthet o áwort.*ⁿ

Hirudis chokkána kóshárénit

¹⁶ Wahdé Hirudis sahig but ke nojumián á rad dáttag, báz zahr gept. Parmáni dát: “Bayt-Lahem o kerr o gwaray do sálig yá kasterén sajjahén mardénchokk koshag bebant.” Anchosh ke áiá pésará nojumi jost o pors kortagatant, hamá hesábá é wahdi gisshént. ¹⁷ É dhawlá Eremiá Nabiay Ketábá Hodáy hamá habar sarjam butant ke gwashtagati:

¹⁸ *Cha Rámahay shahrá kukkáré góshán kapt,
mótk o zárié mazanén,
Ráhilá pa wati chokkána grét,*

^f**1:22** Paddir, bezán záher, áshkár.

^g**1:23** Eshayá Nabiay Ketáb 7:14.

^h**2:1** Ródártk, bezán hamá némag ke róch dara kayt, mashrek.

ⁱ**2:3** Deltaparkah, bezán paréshán, deltrakk.

^j**2:4** Sharyatay zánóger, bezán dini álem o Sharyatay zántkár.

^k**2:5** Passaw, bezán jwáb.

^l**2:6** Miká Nabiay Ketáb 5:2; Samuil Dádgaray Domi Ketáb 5:2.

^m**2:11** Hokkah, bezán gwandhén sanduké ke saht o zéwari mána kanant.

ⁿ**2:15** Hushah Nabiay Ketáb 11:1.

*kaséay tasallái nazort,
chiá ke á namantagatant.^o*

Dém pa Náserahá

¹⁹ Hirudisay marká rand, Mesrá Hodáwanday préshtagé Issopay wábá átk. ²⁰ Préshtagá gwasht: “Pád á, chokk o chokkay mátá bezur o padá watí molt, Esráilá per betarr. Chiá ke chokkay koshagay shawr borrók^p mortagant.” ²¹ Nun Issop pád átk o chokk o chokkay máti zortant o padá Esráilay moltká átk. ²² Bale wahdé sahig but ke Hirudisay jáhá áiay chokk Arkeláus Yahudiahay damagay bádsháh ent, gorhá óday rawagi torset. Wahdé cha wábéá dháhé^q raseti, watá pa Jalilay damagá rasénti. ²³ Ódá, Náserahay shahrá jahmenend^r but tán é paymá nabiáni habar rást o paddar bebit ke á Náseri gwashaga bit.

Pákshódókén Yahyáay kolaw

(Markás 1:1–8; Luká 3:1–17)

3 ¹ Á róchán, pákshódókén Yahyá átk o Yahudiahay gyábáná jári perrént: ² “Cha watí gonáhán pashómán bebét,^s chiá ke ásmáni bádsháhi nazzik ent.” ³ Yahyá hamá ent ke Eshayá nabi áiay bárawá gwashit:

Gyábáná, kasé gwánka^t jant:

*Hodáwanday ráhá tayár o,
áiay keshká rást o tachk bekanét.^u*

⁴ Yahyáyá cha oshteray pothán gwaptagén póshák gwará at o póstén kamarbandé lánká bastagat. Áiay ward o warák, madag o gyábáni bénag^v at. ⁵ Urshalimay nendók, Yahudiahay sajjahén damagay mardom o Ordonay kawray kerr o gwaray jahmenend áiay kerrá shotant. ⁶ Watí gonáháni pashómániesh záher kort o Yahyáyá Ordonay kawrá pákshódi dátant.^w

⁷ Wahdé Yahyáyá dist ke Parisi o Saduki rombay bázén mardom pákshódi geragá áiay kerrá áyagá ant, gón áyán gwashti: “Oo syahmárzádagán! Kayá shomará dháh dátág ke cha Hodáay áyókén kahr o gazabá rakketa kanét?! ⁸ Anchén kár bekanét cha áyán paddar bebit ke shomá pa del cha watí gonáhán pashómán butagét. ⁹ Cha watí delá é habará dar bekanét ke ‘má Ebráhémay nasl o óbádag én.’ Man shomará gwashán ke Hodá cha é seng o dhókán ham, pa Ebráhémá chokk o óbádag pédá korta kant. ¹⁰ Nun tapar tayár ent ke drachkán cha boná begoddhit o har drachké ke sharrén bara nayárit, goddhag o ásá dawr dayaga bit.

¹¹ “Man pa shomay gonáháni pashómániá, shomará gón ápá pákshódia dayán, bale hamá ke cha man o rand áyagi ent, cha man zóráker ent o man áiay kawsháni dast geragay láhek ham naán. Á shomará gón Pákén Ruh o ásá pákshódia dant. ¹² Áiá cha bucc o pogán dánay jetá kanag o gisshénagá, hanshóné^x dastá ent. Jóhánáy pák o sallaha kant o dánán ambárá éra kant, bale pog o palárán anchosha sóchit ke ásesh hechbara namerit.”

Issáay pákshódi

(Markás 1:9–11; Luká 3:21–22; Yuhanná 1:31–34)

¹³ Gorhá Issá cha Jalilay damagá dar átk o Yahyáy dastá pákshódi geragá Ordonay kawrá shot.

¹⁴ Bale Yahyáyá johd kort áiá pa é kárá maylit o gwashti: “Báyad man cha tai dastá pákshódi begerán, taw chón mani gwará káay?” ¹⁵ Issáyá gwasht: “Annun bell ke anchosh bebit, é paymá Hodáay razáyá sarjama kanén.” Gorhá áiá mannet o Issái pákshódi dát. ¹⁶ Wahdé Issáyá pákshódi

^o2:18 Eremiá Nabiay Ketáb 31:15.

^p2:20 Shawr borrók, bezán paysalah kanók.

^q2:22 Dháh, bezán hoshdár, wárning.

^r2:23 Jahmenend, bezán jágahéay neshtagén mardom, sáken, ábád.

^s3:2 Pashómán bayag, bezán tawbah kanag.

^t3:3 Gwánk, bezán borzén tawár.

^u3:3 Eshayá Nabiay Ketáb 40:3.

^v3:4 Bénag, bezán asal.

^w3:6 É Yahyá at ke pákshódia dátí.

^x3:12 Hanshón dáré ke pa dán o pogáni jetá kanagá kármarza bit.

^y3:12 Jóhán, bezán kesháráni mocch kanagay jágah.

gept o cha ápá dar átk, anágat ásmánay dap pach but o Hodáay Pákén Ruhi dist ke kapótéay dróshomá^z átk o áiay sará ér nesht. ¹⁷ Cha ásmáná tawáré átk: “É mani dóstén Bacch ent o man cha eshiá báz wassh o razá án.”

Shaytán Issáyá chakkásit

(Markás 1:12–13; Luká 4:1–13)

4 ¹ Randá, cha Pákén Ruhay rahshóniá Issá gyábáná shot tán Shaytán áiá bechakkásit.^a ² Chel shap o chel róch róchag dáragá rand Issá shodig but. ³ Gorhá Shaytán pa áiay chakkásagá átk o gwashti: “Agan taw Hodáay Chokk ay, é sengán begwash nagan bebant.” ⁴ Issáyá passaw dát: “Pákén Ketábá nebisag butag:

‘Mardom tahná pa nán zendaga nabit,
cha Hodáay zobánay sajjahén habaráni mannagá zendaga bit.’”^b

⁵ Padá Shaytáná Issá pákén shahrá bort o mazanén parasteshgáhay diwálay borzterén jágháh óshtárént o ⁶ gwashti: “Agan taw Hodáay Chokk ay gorhá watá cha edá jahlád dawr beday chiá ke nebisag butag:

Hodá pa tai negahpániá wati préshtagán hokma kant o
á, tará wati dastáni delá dárant
tán tai pád dhókéá malaggít.”^c

⁷ Issáyá gwasht: “Haw, bale chosh ham nebisag butag: Wati Hodáwandén Hodáyá machakkás o ázmáesh makan.”^d

⁸ Nun Shaytáná yak sakkén borzén kóhéay sará bort o cha ódá donyáay sajjahén bádháhi o áyáni shán o shawkati pésh dáshtant o ⁹ gwashti: “Agan taw mani démá kóndhán bekapay o maná parastesh bekanay, man é sajjahénán tará dayán.” ¹⁰ Gorhá Issáyá gwasht: “Oo Shaytán! Cha mani démá gom bay! Pákén Ketábá nebisag butag: Wati Hodáwandén Hodáyá parastesh bekan o tahná hamáiay hezmatá bekan.”^e ¹¹ Nun Shaytáná á yalah dát o shot. Préshtag átkant o Issáy hezmatesh kort.

Issáay hezmatkáriay bongéj

(Markás 1:14–15; Luká 4:14–15; Yuhanná 4:43–45)

¹² Wahdé Issá sahig but ke Yahyá dazgir kanag butag, gorhá Jalilá shot. ¹³ Náserahay shahri yalah dát o Kaparnáhumay shahrá jahmenend but. Kaparnáhum, Jalilay mazangwarmay^f kerrá, Zebulun o Naptáliay kabilaháni sardhagárá ent. ¹⁴ Paméshká é dhawl but ke Eshayá nabiay gwashten sarjam bebit:

¹⁵ Zebulun o Naptáliay sardhagár, gwarmay mazanráhay sará,
Ordonay kawray á dastá, Jalilay hamá hand o hankén ke darkawm jahmenend ant,

¹⁶ hamá kawmá ke zendi taháriá gwastagat,

mazanén rozhnáié dist o

hamá molt o dhagár ke ódá mark sáhél at,

óday jahmenendáni sará rozhnáiá sar jat.^g

¹⁷ Cha hamá wahdá, Issáyá é kolaw o paygámay rasénag bongéj kort. Gwashti: “Cha wati gonáhán pashómán bebét chiá ke ásmáni bádháhi nazzik ent.”

^{z3:16} Dróshom, bezán shekl.

^{a4:1} Chakkásag, bezán ázmáesh kanag, emtehán gerag.

^{b4:4} Sharyatay Domi Rahband 8:3.

^{c4:6} Zabur 91:11–12.

^{d4:7} Sharyatay Domi Rahband 6:16.

^{e4:10} Sharyatay Domi Rahband 6:13.

^{f4:13} Mazangwarm, bezán daryáchah.

^{g4:16} Eshayá Nabiay Ketáb 9:1–2.

Issáay awali chárén morid

(Markás 1:16–20; Luká 5:2–11; Yuhanná 1:35–42)

¹⁸ Wahdé Issá Jalilay mazangwarmay lambá^h gám janagá at, do bráti dist, yakké Shamun at ke pannámi Petros at o domi áiay brát Andriás at. Áyáni kár máhigiri at o á wahdá pa máhigiriá wati dám o máhórán gwarmá chér géjagá atant. ¹⁹ Issáyá gón áyán gwasht: “Byáét, mani randgiriá bekanét o man shomará anchosha kanán ke máhig geragay badalá, mardománi delá shekár bekanét.”ⁱ ²⁰ Áyán hamá damáná wati dám yalah dát o áiay hamráh butant. ²¹ Wahdé kammé démá shot, dega do brát, Ákub o Yuhannái distant ke Zebdiay chokk atant. Bójigay^j tahá gón wati pet Zebdiá neshtagatant o wati máhórán sráchag o sharr kanagá atant. Issáyá á lóthetant. ²² Áyán ham wati pet gón bójigá yalah dát o áiay hamráh butant.

Jalilay damagá, Issáay hezmatkári

(Markás 1:35–39; Luká 4:42–44)

²³ Issáyá sajjahén Jalilá tarr o garda kort. Áiá kanisaháni^k tahá mardom dars o sabaka dát, Hodáay bádsháhiay mestága^l rasént o mardom cha nájórhi o nádráhián jórh o dráha kortant. ²⁴ Sajjahén Suriahá áiay nám o tawár prosht o mardomán har dhawlén nájórh o nádráh, jenni, mergiay nádráh,^m lang o mondh Issáy kerrá áwortant o áiá dráha kortant. ²⁵ Jalil, Dekápulis, Urshalim, Yahudiah o Ordonay kawray á dastay hand o damagáni bázén mardomé átk o Issáy hamráh but.

Bahtáwari

(Luká 6:20–23)

5 ¹ Mardománi mazanén mocchiay gendagá rand, Issá kóhéay sará sar kapt. Wahdé borzagá nesht, morid ham áiay kerrá átkant. ² Gorhá é dhawlá áyáni tálim dayagá lagget:
³ “Bahtáwar ant hamá ke áyáni ruh wár o bazzag ent, chiá ke ásmáni bádsháhi hamáyánig ent.
⁴ “Bahtáwar ant hamá ke gamig o porsig ant, chiá ke áyán tasallá o delbaddhiaⁿ rasit.
⁵ “Bahtáwar ant hamá ke narmdel o mehrabán ant, chiá ke zeminay mirás barók hamá bant.
⁶ “Bahtáwar ant hamá ke hakk o ensápay shodig o tonnig ant, chiá ke á séra bant.
⁷ “Bahtáwar ant hamá ke pa degarán rahma kanant, chiá ke áyáni sará ham rahm kanaga bit.
⁸ “Bahtáwar ant hamá ke delesh pák o sáp ent, chiá ke á Hodáyá gendant.
⁹ “Bahtáwar ant hamá ke sohl o émenia kárant, chiá ke á Hodáay chokk náménaga bant.
¹⁰ “Bahtáwar ant hamá ke pa Hodáay ráhay geragá bohtám^o janag o ázár dayaga bant, chiá ke ásmáni bádsháhi hamáyánig ent.
¹¹ “Bahtáwar ét shomá ke pa manigi mardom shomará dozhmána dayant o ázára rasént, shomay poshtá dróga bandant o bada gwashant. ¹² Gal o washdel bebét o shádehi bekanét, chiá ke ásmáná shomay mozz sakk báz ent. Pésarigén nabiáni sará ham é dhawlén ázáresh raséntag.

Wád o rozhn

¹³ “Shomá jahánay wád ét, bale agan wáday tám berawt, gorhá chón padá wádók buta kant? Abéd cha^p dur réchag o mardománi pádmáliá nun dega hech kárá nayayt.
¹⁴ “Shomá jahánay nur o rozhn ét, shahré ke kóhéay sará ent, chér o andém buta nakant.
¹⁵ Hechkas rókén cherágá tagáréay^q chérá éra nakant, cherágjáhay sará éria kant tán áiay rozhnái

^{h4:18} Lamb, bezán dámon, kerr.

^{i4:19} Delay shekár kanagay maksad mardomán Hodáay ráhá árag ent.

^{j4:21} Bójig, bezán lánc, yakdár, kashti.

^{k4:23} Kanisah, bezán Yahudiáni parasteshgáh.

^{l4:23} Mestág, bezán wasshén hál, beshárat.

^{m4:24} Mergi anchén nádráhié ke mardomá béhósh o kap o gajja kant. Arabi o Pársiá “sar”.

^{n5:4} Delbaddhi, bezán tasallá, ométwári.

^{o5:10} Bohtám, bezán malámat, tohmat.

^{p5:13} Abéd cha, bezán gayr cha.

^{q5:15} Tagár, bezán mazanén johlén darp, hirán, lagan.

pa lógay sajjahén mardomán berasit.¹⁶ Hamé dhawlá shomay rozhn, mardománi démá shahm bedant tán shomay nékén kárán begendant o shomay ásmáni Petá satá bedayant o besárháyant.^r

Sharyatay sarjami

¹⁷ “Gomán makanét ke man pa Tawrát o nabiáni habaráni kár nabandag o nákár kanagá átkagán. Man pa áyáni kár nabandag o nákár kanagá nayátkagán, pa áyáni sarjam kanagá átkagán.

¹⁸ Shomárá rásténa gwashán, zemin o ásmánay gár o bérán bayagá pésar, Sharyatay yak áb^s o thekké ham gára nabit tán sajjahén sarjam mabant.¹⁹ Paméshká agan kasé cha Sharyatay parmánán gwandhteréné sost begipt o kár mabandit o degarán ham anchosh dars o sabak bedant, á, ásmáni bádsháhiá kasterén zánaga bit. Bale kasé ke é parmánáni sará kára kant o degarán ham sója dant, ásmáni bádsháhiá mazan zánaga bit.²⁰ Paméshká shomárá gwashán, agan shomay pahrézkári o sharkerdi cha Parisi o Sharyatay zánogeráni kerdá géshter mabit, hechbar ásmáni bádsháhiay darwázagá poterta nakanét.

Kosht o kósh

(Luká 12:58–59)

²¹ “Shomá eshkotag ke gón péshigén mardomán gwashag butag: ‘hón o kósh makan,^t harkas hóna kant, áiay dádrasi o dáraria bit o mayárig kanaga bit.’²² Bale man shomárá gwashán, harkas wati brátay sará zahra gipt, á ham hakdiwánay^u démá mayárig kanaga bit. Kasé ke wati brátá zá o zakat bekant, hakdiwáná mayárig kanaga bit, kasé ke wati brátá ‘hódh’ o ‘ahmaka’ gwashit, tahtarunay^v ásay sezáwára bit.²³ Paméshká agan korbánjhá, korbánig kanagay wahdá yát o tránagá kaptay ke tai brátá gón taw gelagé hastent,²⁴ wati korbánigá hamódá korbánjhá bell o beraw pésará gón wati brátá sohl kan, gorhá byá korbánig bekant.²⁵ Agan kaséá gón taw arh o dáwáé hast o tará hakdiwáná bárt, gorhá raságá pésar, ráhá gón áiá wati arhá begisshén o sohl bekant. Chosh mabit káziay démá barag bebay, á tará apsaray dastá bedant o apsar tará bandijhá bebárt o jél bekant.²⁶ Tará rásténa gwashán, tán zarráni goddhi pai o paysahá porra nakanay, cha ódá ázáta nabay.

Zená o talák

²⁷ “Shomá eshkotag ke gwashag butag: ‘zená makan’.^w ²⁸ Bale man shomárá gwashán, agan kasé pa badchammi o deldozzi janénáé bechárit, bezán wati delá, gón hamá janéná zenái kort.

²⁹ Paméshká agan tai rástén chamm tará dém pa gonáhá bebárt, áiá kassh o dawr beday, chiá ke cha sarjamén jánay tahtaruná kapagá pa taw sharter hamesh ent ke tai jesmay yak band o bógé cha taw jetá bebit.³⁰ Hamé dhawlá, agan tai rástén dast tará dém pa gonáhá bebárt, gorhá áiá borr o dawr beday, chiá ke cha sarjamén jánay tahtaruná rawagá pa taw sharter esh ent ke tai jesmay yak band o bógé cha taw jetá bebit.

³¹ “É ham gwashag butag: ‘agan kasé wati janá yalah bekant, gorhá báyad áiá taláknámahé bedant’.^x ³² Bale man shomárá gwashán, agan janénáé zená nakortag o mard áiay sawn o talákán bedant, bezán áiay zenahkáriay sawaba bit o agan kasé hamá janázámén janéná sur o sáng bekant, gorhá bezán gón áiá zená kant.

Sawgand

³³ “Shomá é ham eshkotag ke gón péshigén mardomán gwashag butag: ‘wati sawgandá maprósh, Hodáwanday démá wati sawgandá purah bekant’.^y ³⁴ Bale man shomárá gwashán, hechbar sawgand mawarét, na pa ásmáná, chiá ke Hodáay taht ent,³⁵ na pa zeminá, chiá ke Hodáay pádáni chéray padag o chárchóbah ent, na pa Urshalimá chiá ke ‘Mazanén Bádsháhay’ shahr ent.³⁶ Pa wati sará ham sawgand mawar, chiá ke saray mudáni yak tháléá syáh o espét korta nakanay.³⁷ Paméshká

^r5:16 Sárháyag, bezán satá kanag.

^s5:18 Áb, bezán harp, Angrézi: letter in the alphabet.

^t5:21 Dargwaz 20:13.

^u5:22 Hakdiwán, bezán ámidges, dádgáh.

^v5:22 Tahtarun, bezán jahannam, dózah.

^w5:27 Dargwaz 20:14.

^x5:31 Sharyatay Domi Rahband 24:1.

^y5:33 Bechár: Láwián 19:12; Sharyatay Domi Rahband 23:21.

ódá ke ‘haw’ gwashagi ent, begwashét ‘haw’ o ódá ke ‘enna’ gwashagi ent, begwashét ‘enna’. Cha eshiá géshter Shaytánay kár ent.

Bérgiri

³⁸ “Shomá eshkotag ke gwashag butag: ‘pa chammá chamm o pa dantáná dantán’.^z ³⁹ Bale man shomárá gwashán, radkárén mardománi kárani démá maóshtét, agan kaséá tai rástén gobba^a shahmáté jat, domiá ham áiay némagá betarrén. ⁴⁰ Agan kasé pa tai jámagay kasshagá tará hakdiwáná bebárt, wati kabáhá^b ham áiá beday. ⁴¹ Agan kasé tará pa zór o bigári hazár gámay^c pand janaga parmáit, do hazár gám áiay hamráhiá beraw. ⁴² Kasé ke cha taw lóthit, áiá beday o agan yakké wáma lóthit, chak o pad mabay.

Masihi mehr

(Luká 6:27–36)

⁴³ “Shomá eshkotag ke gwashag butag: ‘Gón wati hamsáhegá mehr bekan^d o gón wati dozhmená naprat’. ⁴⁴ Bale man shomárá gwashán, gón wati dozhmená mehr bekanét o pa hamáyán ke shomárá ázára dayant nékén dwá belóthét, ⁴⁵ tán wati ásmáni Petay chokk bebét, chiá ke á wati róchá pa nék o badána drapshénite^e o wati hawrá pa pahrézkár o radkárána gwárénit. ⁴⁶ Agan tahná gón hamá mardomán mehr kanét ke gón shomá mehra kanant, gorhá shomárá chónén mozzé rasit? Songif^f o máliátgir^g hamé dhawlá nakanant? ⁴⁷ Agan éwaká wati brátán drud o drahbát^h begwashét, gorhá cha degarán shomay sharteri chi ent? Záná, á Hodánábáwarén darkawm ham anchosha nakanant? ⁴⁸ Paméshká shomá báyad tamán o béayb bebét, anchosh ke shomay ásmáni Pet wati jáhá tamán o béayb ent.

Delsetkén hayrát

6 ¹ “Hozzhár bét! Wati nékén kárán pa mardománi pésh dáragá makanét, chiá ke é dhawlá shomárá cha ásmáni Petay némagá hech mozzé narasit. ² Wahdé chizé hayráta kanay, gorhá jár majan o dhandhór makan. Doru o dopóstén mardom, kanisah o kuchah o damkáni tahá é dhawlá kanant tánke mardom áyán satá bekanant o besárháyant. Shomárá rásténa gwashán, mozzé ke áyán rasagi at, rasetesh. ³ Wahdé hayráté cha rástén dastá dayay, chappén dast sahig mabit, ⁴ tánke tai dátágén hayrát sarpósh o chérandari bebit. Gorhá tai ásmáni Pet, ke chérénána gendit, tai mozzá dant.

Dwá

(Luká 11:2–4)

⁵ “Wahdé dwá kanét, gorhá doru o dopóstén mardománi dhawlá makanét, chiá ke áyán kanisaháni tahá o chárráháni sará óshtag o dwá kanag dósta bit, tánke mardom áyán begendant. Shomárá rásténa gwashán, mozzé ke áyán rasagi at, rasetesh. ⁶ Bale harwahd dwá kanay, wati lógá beraw, lögay dapá beband o cha wati ásmáni Petá, ke cha chammán chér o andém ent, dwá belóth, gorhá tai Pet, ke chérénána gendit, tai mozzá dant. ⁷ Wahdé dwá kanét, gorhá darkawmén mardománi dhawlá mopt o náhudagén habarán lés o pellésⁱ makanét, á hayála kanant ke cha lés o pellésá áyáni dwá gósh dáraga bit. ⁸ Áyáni paymá mabét, chiá ke shomay ásmáni Pet cha lóthagá pésar wata zánt ke shomárá ché garaz ent.

⁹ “Shomá é dhawlá dwá belóthét:

^z5:38 Dargwaz 21:24.

^a5:39 Gobb, bezán gónag.

^b5:40 Kabáh, bezán jobbah.

^c5:41 Asligén Yunáni nebeshtánka gwashit: “milion”, bezán kesás yak o ném kilumitar.

^d5:43 Láwián 19:18.

^e5:45 Drapshénag, bezán shahm dayag, rozhná kanag, jalashkénag.

^f5:46 Song, bezán máliát, thayks.

^g5:46 Bani Esráilián, songi o máliátgirén mardom nádóst atant, chiá ke á Rumay hokumatay kárendah atant o bázéná pa wati nap o puttá cha mardomán géshén song o bája gept.

^h5:47 Drud o drahbát, bezán salám o alayk.

ⁱ6:7 Lés o pellés, bezán bázén takrár.

‘Oo may Pet, ke borzén ásmáná ay!

Tai nám sharapdár bát.

¹⁰ Tai bádsháhi byáyát.

Tai wáhag o erádah zeminay sará ham hamá dhawlá sarjam bát ke ásmáná sarjama bit.

¹¹ May maróchigén rezk o rózigá maróchi márá beday.

¹² May gonáh o radián bebaksh, anchosh ke má wati sajjahén daynkár bakshetagant.

¹³ Márá ázmáesh o chakkásá dawr maday o cha Shaytáná^j berakkén.^k

¹⁴ “Chiá ke agan shomá mardománi gonáh o mayárán bebakshét o sar begwazét, gorhá shomay ásmáni Pet shomay gonáh o mayárán ham bakshit o sara gwazit, ¹⁵ bale agan shomá mardománi gonáh o mayárán mabakshét o sar magwazét, gorhá shomay ásmáni Pet ham shomay gonáh o mayarána nabakshit o sara nagwazit.

Róchag

¹⁶ “Wahdé róchaga bét, doru o dopóstén mardománi dhawlá wati démá tábán o gamnák makanét. Á wati ruá gimmorénant o munjá kanant tán mardom bezánant róchag ant. Shomárá rásténa gwashán, mozzé ke áyán rasagi at, rasetesh. ¹⁷ Bale wahdé róchaga bay, gorhá wati dém o ruá beshód o sará charp kan, ¹⁸ tánke mardom mazánant taw róchag ay, tahná tai ásmáni Pet ke chérandém ent, hamá bezánt. Á wahdi tai ásmáni Pet ke chérandaria gendit tai mozzá dant.

Áyókén jahánay tóshag

¹⁹ “É jaháná pa wat mál o maddhi^l mocch makanét, ke edá áyán warók o raméza^m wárt o zanga gipt o dozzesha polant o barant. ²⁰ Pa wat ásmáná ganj o hazánag ambár bekanét ke ódá na áyán warók o raméza wárt, na zanga gipt o na dozza polant o barant. ²¹ Tai del hamá jáhá rawt ke mál hamódá ent.

Jesm o jánay cherág

(Luká 11:34–36)

²² “Chamm, jesm o jánay cherág ent. Agan tai chamm wassh o dráh ent, gorhá tai sajjahén jesm o ján rozhnága bit. ²³ Bale agan tai chamm nájórh ent, gorhá tai sajjahén jesm o ján tahára bit. Nun agan tai jesm o jánay rozhn wat tahárié bebit, gorhá á tahári chónén mazanén tahárié bit.

Ásudagén zend

(Luká 12:22–31)

²⁴ “Hechkas pa do wájahá golámi korta nakant, yá gón yakkéá dozhmenia kant o domigi dósta bit, yá gón awaligá wapádára bit o cha á degará badia kayt. Shomá yakwahd o yakjáh Hodá o zarray golámiá korta nakanét. ²⁵ Paméshká shomárá gwashán ke pa wati zendá paréshán o deltaparkah mabét ke: ‘Ché bwarén o ché benóshén?’ na pa wati jesm o jáná ke: ‘Ché bepóshén?’. Zend cha waráká o jesm o ján cha pósháká géshtera nakarzit? ²⁶ Ásmánay báli morgán bechárét, na keshant o na ronant o na ambára kanant, bale angat shomay ásmáni Pet áyán warák o róziga dant. Shomay arzesh o kimmattcha áyán géshter naent? ²⁷ Kay gón pegr o hayáláni zórá wati zenday róchán yak sáhaté ham gésh korta kant?ⁿ ²⁸ Pa pocch o pósháká chiá paréshán ét? Gyábánay gol o polláni némagá delgósh kanét, chón rost o rodóma kanant. Na zahmaté kasshant o na résant o gwapant, ²⁹ bale shomárá gwashán ke Solaymán bádsháhá gón wati mazanén shán o shawkatá é polláni hamdróshomén póshák gwará nabutag. ³⁰ Oo kambáwarán! Wahdé Hodá gyábánay káhán é dhawlá zébá o brahdára kant ke maróchi hastant o bándá taruná sóchaga bant, gorhá shomárá che paymá sharterén pósháka nadant?

³¹ “Paméshká paréshán o deltaparkah mabét o magwashét ke: ‘Bárén ché bwarén o ché benóshén?’ yá: ‘Ché bepóshén?’.

³² Donyáay sajjahén Hodánábáwarén mardom é chizáni randá tachant, bale

^j6:13 Yá: “cha sherrá.”

^k6:13 Lahtén daznebeshtá átkag: “Chiá ke abadmánén bádsháhi o wák o zór o shán o shawkat taig ant. Ámin. Anchosh bát.”

^l6:19 Maddhi, bezán ganj o hasti.

^m6:19 Warók o raméz, bezán gwandhén kerm o lulok ke dár o poccha wárt.

ⁿ6:27 Yá: “wati báládá yak dasté borzter korta kant.”

shomay ásmáni Peta zánt ke shomárá é chiz pakár ant. ³³ Cha har chizá pésar, Hodáay bádsháhi o áiay rástén ráhay shoházá bebét, é sajjahén wat shomárá dayaga bant. ³⁴ Pa bándátigén róchá paréshán o pegrig mabét, chiá ke bándát, wati pegrá wata kant. Maróchigén janjál, pa maróchigá bass ant.^o

Ér janag o irázgiri

(Luká 6:41–42)

7 ¹“Degarán ér majanét o iráz magerét, tánke shomá ér janag mabét. ² Anchosh ke shomá degarán éra janét, hamé paymá shomá ér janaga bét o gón har kayl o paymánahéá ke bedayét, gón hamá kaylá shomárá dayaga bit. ³ Chiá wati brátay chammay pilláshká^p genday, bale wati chammay bondhá nagenday? ⁴ Tará ke bondhé chammá ent, chón wati brátá gwashta kanay: ‘Bell ke tai chammay pilláshká dara kanán?’ ⁵ Oo dopóstén shatalkár! Pésará wati chammay bondhá dar kan, randá tai chamm pacha bit o wati brátay chammay pilláshká kassheta kanay.

Kochek o teláhén tawk

⁶“Pák o palgárén chizán kochekán madayét o wati morwáredán hukkáni démá maprénet. Chó mabit ke áyán lagatmál bekanant o per betarrant o shomay jendá derr o drásh bekanant.

Lóthóká rasit

(Luká 11:9–13)

⁷“Belóthét, shomárá dayaga bit. Shóház bekanét, dara géjét. Darwázagá bethokkét, pacha bit. ⁸ Chiá ke harkas belóthit, áiá rasit. Harkas shóház bekant, dara géjít. Harkas darwázagá bethokkit, pa áiá pacha bit. ⁹ Shomay nyámá choshén peté hast ke agan áiay chokk nán belóthit dhóké bedanti? ¹⁰ Yá agan máhig belóthit máré bedanti? ¹¹ Shomá ke radkár ét, angat wati chokkán sharrén chizáni dayagá zánét. Gorhá may ásmáni Pet chenkadar shartera zánt ke wati lóthókén chokkán wasshén chiz bedant.

Teláhén parmán

(Luká 6:31)

¹²“Paméshká, har kárá gón degarán hamá dhawlá néki bekanét ke lóthét á dega ham gón shomá bekanant. Sharyat o nabiáni gapp o habar hamesh ent.

Tankén darwázag

(Luká 13:24)

¹³“Cha tankén darwázagá bepoterét. Chiá ke práhén darwázag o práhén ráh, góri o bégwáhiay némagá bárt o bázéné hamá ráhá zurit. ¹⁴ Bale tank ent á darwázag o grán ent á ráh ke zenday némagá bárt o é ráhay rawók ham kamm ant.

Drachk o bar

(Luká 6:43–45)

¹⁵“Cha drógén paygambarán hozzhár bebét. Á, méshay póstá gwará kanant o shomay kerrá káyant bale cha bon o béhá derrökén gork ant. ¹⁶ Shomá cha áyáni kerdá áyán pajjáha kárét. Cha dhangarán^q angur o cha dhóloká^r enjir chenaga bit? ¹⁷ Sharrén drachk, sharrén bar o nibaga kárít o sellén drachk sellén bar o nibaga kárít. ¹⁸ Sharrén drachk, sellén bar áworta nakant o sellén drachk sharrén bar dáta nakant. ¹⁹ Drachké ke sharrén bara nayárit, goddhag o sóchaga bit. ²⁰ Paméshká áyán cha barán pajjáha kárét.

²¹“Hamá ke maná ‘Hodáwand, Hodáwanda’ gwashant, pa á sajjahénán ásmáni bádsháhiay darwázag pacha nabit, tahná hamá shota kant ke mani ásmáni Petay wáhag o razáay sará kára kant. ²² Wahdé á rócha kayt bázéné maná gwashit: ‘Hodáwand, oo Hodáwand! Má gón tai námá paygambari nakortag? Gón tai námá cha mardomán jenn nakasshetagant o gón tai námá bázén

^o6:34 Asligén Yunáni nebeshtánka gwashit: “Har róchay janjál pa hamá róchá bass ent.”

^p7:3 Pilláshk, bezán buccok, prishk, bákasay dhillay kasterén chondh.

^q7:16 Dhangar, bezán bébarén konthagi drachk o dár.

^r7:16 Dhólok, bezán gyábáni konthagi jarré ke polli espét ant.

ajabén kár pésh nadáshtag?²³ Gorhá man áyán rásténa gwashán: ‘Oo badkárán! Man hechbar shomará pajjáh nayáwortag, cha mani démá dur bebét.’

Zántkári o názánti

(Luká 6:47–49)

²⁴ “Paméshká, harkas ke mani é habarána eshkont o áyáni sará kára kant, hamá zántkár o hóshmandén mardomay paymá ent ke wati lógi taláray sará bast. ²⁵ Hawr but, hár o hirróp átk, purr o syahgwátán gón á lógá dhikk wárt, bale lóg nakapt, chiá ke áiay bonred^s taláray sará ér kanag butagat. ²⁶ Bale kasé ke mani habarán gósha dárit o áyáni sará kára nakant, hamá hódh o kamzántén mardomay dhawlá ent ke wati lógi rékáni sará bast. ²⁷ Hawr but, hár o hirróp átk, purr o syahgwátán gón á lógá dhikk wárt, lóg kapt o pahk wayrán but.”

²⁸ Wahdé Issáyá é habar halás kortant, mardománi mocchi cha áiay dars o sabakán hayrán but o bah mantant,^t ²⁹ chiá ke áiá Sharyatay zánógeráni paymá darsa nadát, gón wák o ehtiáré dars o tálímia dát.

Garriéay drahbakshi^u

(Markás 1:40–44; Luká 5:12–14)

8 ¹ Wahdé Issá cha kóhá ér kapt, mardománi mazanén mocchié áiay randá gón kapt. ² Yak mardé ke áiá syahgarray^v nádráhiá geptagat Issáy Kerrá átk, áiay pádán kapt o gwashti: “Oo wájah! Agan taw belóthay, maná wassh o palgár korta kanay.” ³ Issáyá dast shahárt, dasti per mosht o gwashti: “Mana lóthán, wassh o palgár bay.” Hamá damáná mard cha syahgarrá palgár but. ⁴ Gorhá Issáyá gón áiá gwasht: “Hozzhár bay! Hechkasá cha é habar o hálá sahig makan, bale beraw, watá dini péshwáyá pésh bedár o hamá korbánigá bekan ke Mussáay Sharyatá nebisag butag, tánke pa áyán gwáh o sháhedié bebit.”

Pawji apsaray báwar

(Luká 7:1–10)

⁵ Wahdé Issá Kaparnáhumay shahrá raset, yak Rumi pawji apsaré áiay kerrá átk, mennatgiri kort o gwashti: ⁶ “Oo wájah! Mani hezmatkárén bachak lógá lang o mondh ent o kaptag, sakkén dard o dórán dochár ent.” ⁷ Issáyá gwasht: “Gorhá mana káyán, áiá dráha kanán.” ⁸ Pawji apsará passaw dát: “Oo wájah! Mana nakarzán ke taw mani lógá byáay, taw tahná hokm bekan, mani hezmatkár dráha bit. ⁹ Chiá ke man ham wati masteráni hokmay chérá án o mani dastay chérá ham sepáhig hast. Agan kaséá hokm bekanán: ‘Beraw,’ á rawt o agan kaséá begwashán: ‘Byá,’ á kayt. Agan wati hezmatkárá begwashán: ‘É kárá bekan,’ á kant.” ¹⁰ Wahdé Issáyá é habar eshkot, hayrán but o gón wati hamráhán gwashti: “Shomárá rásténa gwashán ke Esráiliáni nyámá ham man choshén mohréni setk o báwar nadistag. ¹¹ Bezánét ke cha ródarátk o rónendá^w bázén mardoma káyant o gón Ebráhém, Eshák o Ákubá ásmáni bádsháhiay mehmániá yakkén parzónagay^x chapp o chágérdá nendant, ¹² bale é bádsháhiay chokk o óbádag^y dhanná taháriá dawr dayaga bant. Ódá gréwant o dantán pa dantána droshant.” ¹³ Gorhá Issáyá gón pawji apsará gwasht: “Beraw, anchosh ke tai báwar ent, gón taw hamá dhawlá bit.” Áiay hezmatkárén bachak hamá damáná dráh but.

Nádráháni drahbakshi

(Markás 1:29–34; Luká 4:38–41)

¹⁴ Wahdé Issá Petrosay lógá shot, disti Petrosay wassig tapig ent o nepáday sará waptag. ¹⁵ Issáyá wati dast áiay dastay sará per mosht, tapi sest, á pád átk o Issáy hezmat kanagá lagget.

^s7:25 Bonred, bezán lóg yá diwáléay awali o johlterén red.

^t7:28 Bah mánag, bezán sakk hayrán bayag, boh bayag.

^u8:0 Drahbakshi, bezán dráhi o salámatiay bakshag, Arabi o Pársiá “shafá”.

^v8:2 Asligén Yunáni zobánay labz, pa syahgarr o bag, bezán jozám o pa dega tahr tahrén garrán ham kár bandaga bit.

^w8:11 Rónend, bezán hamá némag ke rócha nendit, magreb.

^x8:11 Parzónag, bezán soprah.

^y8:12 É bádsháhiay chokk o óbádag, bezán Esráiliáni chokk o chokkzátk.

¹⁶ Bégáhá mardomán bázén jenni ganók Issáay kerrá áwort, áiá gón wati yakkén habará jenn cha áyán kasshetant o sajjahén nádráh wassh o dráh kortant. ¹⁷ É dhawlá Eshayá nabiay péshgói purah o sarjam but: *áiá may nezóri dur kortant o nádráhi bortant.*^z

Kay Issáay morid buta kant?

(Luká 9:57–60)

¹⁸ Wahdé Issáay wati chapp o chágérdá mardománi mocchi dist, parmán dát o gwashti: “Byáét, gwarmay domi némagá rawén.” ¹⁹ Sharyatay zánógeré áiay kerrá átk o gwashti: “Oo ostád! Har jáh ke taw raway man tai hamráha bán.” ²⁰ Issáay gwasht: “Róbáhán hóndh o jágah hast o báli morgán kodóh o kodám, bale maná ke Ensánay Chokk^a án pa saray ér kanagá hech jágah nést.” ²¹ Dega yak moridéá gón áiá gwasht: “Oo wájah! Maná mókal beday pésará rawán wati petá kabra kanán.” ²² Issáay gwasht: “Byá, mani randgiriá bekan, bell ke mordag wati mordagán wat kabr o kapona kanant.”

Tuppánay érmósh kanag

(Markás 4:36–41; Luká 8:22–25)

²³ Issá bójigá swár but, morid ham swár butant. ²⁴ Yak anágat^b trondén uppáné but o chawl o mawján bójig mán ropt, bale Issá wáb at. ²⁵ Morid áiay kerrá átkant, ágáhesh kort o gwashtesh: “Oo Hodáwand! Márá berakkén, ke ér bokkagi^c o meragi én.” ²⁶ Gón áyán gwasht: “Oo kambáwarán! Shomará chiá torsit?” Randá pád átk, gwáti hakkal dát o mastén chawli neherrán bastant o uppán pahk érmósh but. ²⁷ Á sajjahén bah mantant o gwashagá laggetant: “É chónén mardomé ke gwát o chawl ham eshiay hokmá mannant.”

Do jenni ganókay drahbakshi

(Markás 5:1–17; Luká 8:26–37)

²⁸ Wahdé Issá mazangwarmay domi pahnátá, Gadáriáni^d sardhagárá raset, gorhá do mardom ke cha kabrestáná dar átkagat, gón áiá dochár kaptant.^e Áyán jenn per at o haminchok wahsh o torsnák atant ke kasséá cha á ráhá gwasta nakort. ²⁹ Áyán kukkaní kort o gwasht: “Oo Hodáay Chokk! Tará gón má che kár ent? Cha gisshéntagén wahdáf pésar, pa may azáb dayagá átkagay?”

³⁰ Cha áyán kammé gestáh^g o á kashter, hukkáni ramagé charagá at. ³¹ Gorhá palitén ruhán cha Issáyá dazbandi kort o gwasht: “Agan taw márá cha é mardomán dara kanay, gorhá ráh day ke hukkáni jesmá poterén.” ³² Issáyá gón áyán gwasht: “Bepoterét!” Nun á dar átk o hukkáni jesmá potertant o hukkáni sajjahén ramag cha jompá jahlagá ér kapáná gwarmá bokket o mortant.

³³ Gorhá hukkáni shwánag shahrá tatkant o é sajjahén hál o jenni ganókáni sargwastesh pa mardomán rasént. ³⁴ Gorhá shahray sajjahén mardom Issáay cháragá átkant o gón áiá dazbandiesh kort ke áyáni sardhagárá yalah bedant o berawt.

Lang o mondhén mardéay drahbakshi

(Markás 2:3–12; Luká 5:18–26)

9 ¹ Issá yak bójigéá swár but, mazangwarmi gwázent o wati jenday shahrá átk. ² Hamé wahdá lahtén mardomá, tahtéay sará waptagén lang o mondhén mardé áiay kerrá áwort. Wahdé Issáyá áyáni setk o báwar dist, gón langá gwashti: “Oo mani chokk! Delá mazan kan, tai gonáh bakshag butant.” ³ Bale Sharyatay lahtén zánógerá wati delá gwasht: “É mard kopr kanagá ent.” ⁴ Issáyá áyáni delay hál o habar zántant o gwashti: “Shomá chiá wati delá palitén hayála kárét?” ⁵ Kojám habaray gwashag ásánter ent: ‘Tai gonáh bakshag butagant,’ yá: ‘Pád á, beraw?’ ⁶ Bale man

^z8:17 Eshayá Nabiay Ketáb 53:4.

^a8:20 Dániál nabiá é pernám pa yak hastiéá kár bastag ke á cha ásmáná kayt. Issá Masihá é pernám pa wat zortag tán mardom bezánant ke á cha ásmáná átkag o hamá wádah dáttagén Masih ent.

^b8:24 Anágat, bezán yak anágat, achának, nágahán.

^c8:25 Bokkag, bezán ápá ér rawag, boddhag, gark bayag.

^d8:28 Lahtén daznebeshtá átkag: “Gerásiáni” yá “Gergesiáni”.

^e8:28 Dochár kapag, bezán dhikk warag, yakdegará gendag.

^f8:29 Edá gisshéntagén wahday máná áheratay róch ent.

^g8:30 Gestáh, bezán dur, yak kerr, jetá.

paméshká é habar kort tán shomá bezánét, man ke Ensánay Chokk án, maná é donyáyá gonáháni pahell kanagay wák o ehtiár hast.” Padá gón á langá gwashti: “Pád á, wati taht o nepádán bezur o lógá beraw.”⁷ Gorhá mard pád átk o lógá shot.⁸ Wahdé mardomán é kár dist, torsetesh o Hodáesh satá kort o sárhát ke mardomi inchok wák o ehtiár dáttagant.

Mattáay lóthag

(Markás 2:14–17; Luká 5:27–32)

⁹ Anchosh ke Issá ráhá rawagá at, Mattá námén mardé disti ke song o máliát geragay jágahá neshtagat. Gón áiá gwashti: “Byá, mani randgiriá bekan!” Mattá pád átk o áiay hamráh but.¹⁰ Wahdé Issá Mattáay lógá parzónagay sará neshtagat o warák waragá at, bázén songi o máliátgir o radkár ham átk o waragá gón Issá o áiay moridán hamwán butant.^h¹¹ Wahdé Parisián é dist gón Issáay moridán gwashtesh: “Chiá shomay wájah gón songi o gonahkárán waráka wárt?”¹² Issáyá eshkot o gwashti: “Dráh o salámatén mardomán dáktar pakár naent, nádráhán dáktar pakár ent.”¹³ Bale berawét o é habaray mánáyá dar begéjét ke: *man hayrát o korbánig kanagay lóthók naán, mehr o rahmatay lóthók án.*ⁱ Man pa pahrézkárán nayátkagán, gonahkáráni lóthag o gwánk janágá átkagán.

Róchagay bárawá

(Markás 2:18–28; Luká 5:33–39)

¹⁴ Randá, Yahyáay morid Issáay kerrá átkant o jostesh kort: “Má o Parisi róchaga dárén, bale tai morid chiá róchaga nadárant?”¹⁵ Issáyá passaw dát: “Sálónk ke neshtag, sur o árosay mehmán sugia bant o porsa dárant? Bale anchén wahdé kayt ke sálónk cha áyán jetá kanaga bit, hamá wahdá róchaga dárant.”¹⁶ Hechkas cha nökén godéá chondhé naderrit o kwahnén pashká pacch o pinaga najant, chiá ke nökén goday pacch nazza kayt o kwahnén pashká géshtera derrit.¹⁷ Hamé dhawlá, kwahnén zekkáni^j tahá nökén sharáb mána nakanant, agan chosh bekanant zekka derant o sharába rechant o zekk ham zawála bant. Nökén sharábá nökén zekkán mána kanant, tán sharáb o zekk, har doén bemánant.”

Janénéay drahbakshi o jenekéay zendag kanag

(Markás 5:22–43; Luká 8:41–56)

¹⁸ Issá angat gón áyán habar kanagá at ke parasteshgáhay yak masteré átk o áiay pádán kapt o gwashti: “Mani jenek hamé annun mortag, bale byá wati dastá áiay sará per mosh, á padá zendaga bit.”¹⁹ Issá pád átk o gón wati moridán áiay hamráh but.

²⁰ Hamódá yak janéné hastat ke dwázdah sál at áiay hón band nabutagat. Á cha poshti némagá átk o Issáay kabáhay lambi dast jat.²¹ Wati delá gwashagá at: “Agan Issáay kabáhá ham dast per bekanán, dráha bán.”²² Issáyá chakk tarrént o gwashti: “Oo mani jenek! Delá mazan kan, tai setk o báwará tará rakkéntag.” Hamá damáná janén dráh but.

²³ Wahdé Issá parasteshgáhay masteray lógá raset, lahtén mótk áróki dist o bázéné porsay sará zár o puhár ham kanagá at.²⁴ Issáyá gwasht: “Dhanná berawét, jenek namortag, bass wáb ent.” Bale mardom áiay habaráni sará kalág geragá atant.²⁵ Wahdé Issáyá mardom cha lógá dhanná dar kortant, jenekay dasti gept o jenek pád átk.²⁶ É hál, sajjahén damagá tálán but.

Do kóray drahbakshi

²⁷ Issá cha ódá ráh gept, ráhá do kór gwánk janán áiay randá kapt o gwashtesh: “Oo Dáud bádsháhay chokk! Tará may sará bazzag bát.”²⁸ Anchosh ke Issá lógá raset, doén kór áiay kerrá átkant. Issáyá gón áyán gwasht: “Shomárá báwar ent ke man é kárá korta kanán?” Áyán jwáb dát: “Haw, oo Hodáwand!”²⁹ Gorhá Issáyá wati dast áyáni chammáni sará per mosht o gwashti: “Hamá dhawlá ke shomá báwar kortag, gón shomá hamá dhawlá bebit.”³⁰ Nun áyáni chamm rozhná butant. Issáyá kaddhan^k kort o gwashtant ke gón hechkasá é bárawá habar makanant.³¹ Bale á shotant o Issáay námesh sajjahén damagá tálán kort.

^h^{9:10} Hamwán bayag, bezán yakjáh warák warag.

ⁱ^{9:13} Hushah Nabiay Ketáb 6:6.

^j^{9:17} Zekk, bezán cha pasay póstá addh kortagén darpé ke cha mashká bazter ent.

^k^{9:30} Kaddhan, bezán mohréni tákid, hokm.

Gongéay drahbakshi

(Luká 11:14–15)

³² Áyáni rawagá rand, yak mardé Issáay kerrá áwortesh ke jennéá geptagat o gong at. ³³ Anchosh ke Issáyá jenn casshet, gong habar kanagá lagget. Sajjahén mardom hayrán butant o gwashtesh: “Choshén kár hechbar Esráilá gendag nabutag.” ³⁴ Bale Parisián gwasht: “É, gón jennáni sardáray sarókiá jennána casshit.”

Keshár o ronók

³⁵ Issá sajjahén shahr o métágána shot o kanisaháni tahá mardomi dars o sabaka dátant, Hodáay bádsháhiay mestági sheng o tálána kort o har paymén nádráhi o nezórián dur kanán at. ³⁶ Áiá ke mardománi mocchi distant áyáni sará bazzagi but, chiá ke á béshopánkén pasáni dhawlá, paréshán o béwas atant. ³⁷ Gón wati moridán gwashti: “Keshár báz ent bale ronók kamm. ³⁸ Paméshká gón kesháray wáhondá dazbandi bekanét o belóthét ke pa wati keshárán ronók dém bedant.”

Issáay dwázdahén hásén kásed

(Markás 3:16–19; 6:8–11; Luká 6:14–16; 9:3–5; 10:4–12)

10 ¹ Randá Issáyá wati dwázdahén hásén kásed lóthetant o jennáni dar kanag o har dhawlén nádráh o nezórén mardománi dráh kanagay wák o ehtiári dátant. ² Á dwázdahén kásedáni nám esh ant: pésará, Shamun ke Petros ham gwashaga bit o áiay brát Andriás, randá Zebdiay chokk Ákub o áiay brát Yuhanná, ³ Pilipos, Bartulumá, Tumá o máliátgirén Mattá, Halpiay chokk Ákub, Taddá, ⁴ sarmachárén Shamun^l o Yahudá Eskaryuti, hamá ke randá Issái dróhagi^m o dozhmenáni dastá dayagi at.

⁵ Issáyá wati é dwázdahén kásed rawán dát, kaddhan kort o gwashtant: “Darkawmáni gwará marawét, á shahrán ham marawét ke ódá Sámeri jahmenend ant, ⁶ bale Bani Esráiliáni kerrá berawét ke á gárén mésháni dhawlá ant.” ⁷ Gwashti: “Har jáh ke rawét, é mestágá sar bekanét ke ásmáni bádsháhi nazzik ent. ⁸ Nádráhán dráh, mordagán zendag, garrián pák o sallah bekanét o cha mardomán jennán dar bekanét. Shomárá moptá rasetag, moptá ham bedayét. ⁹ Wati lánkbandáni tahá sohr o nograh o ród mán makanét. ¹⁰ Pa wati sát o sapará turag o pélekⁿ mazurét o na do jámag, na chawath o swás o na asá o dazlatth, chiá ke kár kanók wati mozzay hakdár ent. ¹¹ Wahdé shahr já métágá rawét, gorhá anchén mardomé shoház bekanét ke shomay mehmán kanagay láhek bebit o tán roksata nabét hamáiay kerrá bedárét. ¹² Wahdé lógá rawét, drud o drahbát begwashét o pa á lógá sohl o émeni belóthét. ¹³ Agan á lóga karzit, gorhá shomay émeniay wáhag pa áiá rasit o agan nakarzit, shomay é wáhag padá pa shomá pera tarrit. ¹⁴ Agan kasé shomará wasshátka nakant já shomay habarán gósha nadárit, á lóg já shahrá bellét o yalah kanagay wahdá, wati pádáni danz o hákán hamódá bechandhét o betakénét. ¹⁵ Shomárá rásténa gwashán, jost o porsay róchá, Sodium o Gomurahay mardománi sezá cha á shahráy mardománi sezá o azábá ásánter o kamtera bit.”

Á ke sakkiána saggit, rakkit

(Markás 13:11–13; Luká 21:12–17)

¹⁶ “Gósh dárét! Man shomará rawána kanán, bale shomá anchosha bét ke gorkáni nyámá pas. Paméshká máráni dhawlá hozzhár o kapódaráni dhawlá sádah bebét. ¹⁷ Cha mardomán hozzhár bét, á shomará geráénant o hakdiwánána barant, wati kanisaháni tahá shomará shallák o hayzarána janant. ¹⁸ Pa manigi hákem o bádsháháni démá pésh kanaga bét, gorhá shomará sharrén móhé rasit ke áyáni o darkawmáni démá pa man gwáhi bedayét. ¹⁹ Á wahdán ke shomá ódá baraga bét, delá paréshán mabét ke ‘ché begwashén’ já ‘chón passaw bedayén,’ chiá ke harché ódá shomará gwashagia bit, hamá wahdá shomará rasit. ²⁰ Á wahdá habar kanók shomá nabét, shomay ásmáni Petay Ruh shomay zobáná habara kant.

^l**10:4** Bázéné gomána kanant ke sarmacháráy máná esh ent: Shamun Yahudiáni yak dini syási párthiéay bask bezán ozw butag ke Rumiáni démá óshtátag.

^m**10:4** Dróhag, bezán pa repk rad dayag. Arabi o Pársiá “khiánat”.

ⁿ**10:10** Pélek, bezán turag, lót, pélag.

²¹ “Brát wati brátá dróhit o kóshárénit o pet wati chokká, chokk cha wati pet o mátá yágia bant o áyána kóshárénant. ²² Sajjahén mardom, pa mani námay sawabá cha shomá naprata kanant. Bale hamá ke tán áherá sakkiána saggít, á rakkít. ²³ Wahdé shomárá yak shahréá ázára rasénant gorphá betachét o dega shahréá berawét. Shomárá rásténa gwashán, tánke shomá Esráilay sajjahén shahrán sar bebét, man ke Ensánay Chokk án, pésará káyán.

²⁴ “Na shágerd cha wati ostádá mastera bit o na golám cha wati hodábondá.^o ²⁵ Shágerdá haminchok bass ent ke wati ostáday paymá bebit o golám wati hodábonday paymá. Wahdé lögay hodábondesh Belzabul^p gwashtag, gorhá lögay é dega mardomán allam badterén nám pera bandant.

Rásti chér dayaga nabit

(Luká 12:2–9)

²⁶ “Shomá cha á mardomán matorsét, chiá ke hech choshén chérén chizé nést ke záher o paddar mabit o hech choshén rázé nést ke áshkár o démdará mabit. ²⁷ Hamá habarán ke man gón shomá shapay taháriá gwashán, shomá á habarán róchay rozhnáiá begwashét, hamá habar ke halwatá shomay góshán gwashaga bant, á habarán lóg o bánáni sará begwashét o jár janét. ²⁸ Cha áyán matorsét ke jesm o jána koshta kanant, bale sáh o arwáhá koshta nakanant, cha hamáiá betorsét ke jesm o jána sáh o arwáh, doénán tahtaruná dawr dát o bérán korta kant. ²⁹ Do jenjeshk pa yak paysahá^q bahá nabit? Bale angat cha áyán yakké ham bé shomay ásmáni Petay zánagá zeminá nakapit. ³⁰ Hodáyá shomay saray mudáni hesáb ham gón ent. ³¹ Paméshká matorsét, shomay kadr o arzesh cha sajjahén jenjeshkán^r géshter ent. ³² Harkas mardománi démá maná bemannit, man ham wati ásmáni Petay démá áiá mannán, ³³ bale harkas mardománi démá maná mamannit, man ham wati ásmáni Petay démá áiá namannán.

Hakk o náhakkay gisshénagá átkagán

(Luká 12:51–53; 14:26–27; 17:33)

³⁴ “Gomán makanét ke man donyáyá tepáki o sohlay áragá átkagán, pa sohl o tepákiá nayátkagán, gón zahméá átkagán. ³⁵ Chiá ke man átkagán tán pet o chokkay nyámá, mát o jenekay nyámá, neshár o wassigay nyámá nátepáki byárán, ³⁶ bezán harkasay dozhmen áiay wati mardoma bant. ³⁷ Kaséá ke wati pet o mát cha man dóstera bant, á maná nakarzit o kaséá ke wati bachak o jenek cha man dóstera bant, á ham maná nakarzit. ³⁸ Kasé ke wati salibá baddhá makant o mani hamráh mabit, á ham maná nakarzit. ³⁹ Chiá ke, agan kasé wati sáhay dáragay johdá bekant, áiá báhénit,^s bale kasé ke pa manigi wati sáhá báhénit, áiá rakkénit.

⁴⁰ “Harkas shomárá wasshátk begwashit o sharap bedant, maná sharapa dant o hamá ke maná sharapa dant, á hamáiá sharapa dant ke maná ráhi dáttag. ⁴¹ Agan kasé paygamaréá paméshká wasshátk kant o sharapa dant ke á Hodáyá ráh dáttagén ent, áiá paygamaréay mozza rasit. Hamé dhawlá, kasé ke pahrézkár o rástén mardoméá pa áiay pahrézkáriá sharap bedant, áiá ham pahrézkárén mardoméay mozza rasit. ⁴² Agan kasé cha é kasánokén moridán yakkéá paméshká tásé ápa dant ke mani morid ent, allam bezánét ke áiá wati mozza rasit.”

11 ¹ Wati dwázdahén moridáni tálim dayagá rand, Issá cha ódá dar átk o pa dars o sabak dayag o wáz kanagá áyáni shahrán shot.

Issá o pákshódókén Yahyá

(Luká 7:18–23)

² Wahdé pákshódókén Yahyá, bandijáhá cha Issá Masihay kárán sahig but, wati moridi ráh dátant ³ ke cha áiá jost bekanant: “Bárén, taw hamá ay ke áyagi at, já pa degaréá rahchár bebén?”

⁴ Issáyá passaw dátant: “Harché ke shomá eshkonag o gendagá ét, berawét Yahyáyá sahig kanét:

⁵ kór gendag o maym kanagá ant, lang tarrag o ráh rawagá ant, garri pák o palgár bayagá ant, karr eshkonagá ant, mordag zendag bayagá ant o bazzag o nézgárán wasshén mestág sar bayagá ent.

⁶ Bahtáwar hamá ent ke mani káráni gendagá thagal mawárt o malakoshit.”

^o10:24 Hodábond, bezán wájah, wáhond, málek, sáheb.

^P10:25 Belzabul, bezán jennáni bádsháh.

^q10:29 Asligén Yunáni nebeshtánk gwashit: do “asariun.” Asariun, á zamánagay kasterén zarr at.

^r10:31 Asligén Yunáni nebeshtánk gwashit: “bázén jenjeshkán”.

^s10:39 Báhénag, bezán gár dayag, cha dast dayag.

Yahyáay bárawá

(Luká 7:24–35)

⁷ Wahdé Yahyáay kásed dar kapt o shotant, Issá gón mardomán Yahyáay bárawá gapp o trán kanagá lagget: “Chónén chizéay cháragá gyábáná shotagét? Kalam o káshay dhilléay cháragá ke gón gwátay kasshagá é dém o á dém shikka wárt? ⁸ Agan na, gorhá chónén chizéay cháragá shotagét? Anchén mardéay cháragá shotagét ke narm o názorkén pósháki gwará at? Á mardom ke názorkén póshák gwará kanant, bádsháhi kalát o márhián nendók ant. ⁹ Gorhá ódá shomá chónén chizéay cháragá shotagét? Paygambaréay cháragá? Haw, shomárá gwashán ke Yahyá cha paygambaréá ham master ent. ¹⁰ Á hamá ent ke áiay bárawá nebisag butag:

Man watí kásedá cha taw pésar ráha dayán ke á, tai ráhá tachk o tayára kant.^t

¹¹ “Shomárá rásténa gwashán ke hech mátá pákshódókén Yahyáay warhén bémattéhén chokké nayáwortag. Bale ásmáni bádsháhiá, hamá ke cha sajjahénán kaster ent, á cha Yahyáay ham master ent. ¹² Cha pákshódókén Yahyáay wahdá beger tán annun, Hodáay ásmáni bádsháhi gón zóráki démá rawán ent o zórmand áiá pa zóré watigia kanant. ¹³ Sajjahén nabián o Tawrátá, tán Yahyáay zamánagá wati péshgoi kortagant. ¹⁴ Agan shomá pa mannagá tayár ét, bezánét Yahyá hamá Elyás nabi ent ke áyagi at. ¹⁵ Harkasá gósh hast, beshkont.

¹⁶ “É zamánagay mardomán kai hamdarwar bekanán ke á, kai dhawlá ant? Á, hamá chokkáni paymá ant ke bázará neshtagant o á dega chokkán gwánka janant o gwashant: ¹⁷ ‘Má pa shomá nal o kalam száz kort, bale shomá nách o sohbat nagept, má pa shomá mótk áwort, bale shomá arsé narétk.’ ¹⁸ Yahyá átkag, na nána wárt o na sharába noshit, gwashant: ‘Jenni per ent,’ ¹⁹ bale Ensánay Chokk átkag, wárt o noshit, gwashant: ‘Lápi o sharábié, máliátgir o gonahkáráni sangat ent.’ Bale hekmat o zánt cha kár o kerdá záhera bit.”

Issáay bazhn

(Luká 10:13–15)

²⁰ Gorhá Issá hamá shahr o mardománi mayárig kanagá lagget ke wati géshtérén ajabén kári hamá shahrán kortagatant, chiá ke áyán cha wati badén kárán pashómáni darshán nakortagat. ²¹ “Bazhn o apsóz pa shomá, oo Korázinay mardomán! Bazhn o apsóz pa shomá, oo Bayt-Saydáay mardomán! Hamá mójezah o ajekkái^u ke man shomay nyámá pésh dáshtagant, agan Sur o Saydunay shahrán pésh bedáshténant, gorhá óday mardomán hamá wahdá wati gonáháni pashómániay póshák gwará kortagat o poráni sará neshtagatant. ²² Báwar kanét, jost o porsay róchá Sur o Saydunay mardománi sezá cha shomay sezá o azábá ásánter o kamtera bit. ²³ Oo Kaparnáhumay mardomán! Shomá chest kanag o ásmáná baraga bét? Hechbar! Tahtarunay johlánkián sarshakuna bét. Chiá ke hamá mójezah o ajekkái ke pa taw pésh dárag butant, agan Sodumay shahrá bebuténant, á shahr tán róch maróchigá mantagat. ²⁴ Báwar kanét, jost o porsay róchá Sodumay mardománi sezá cha shomay sezá o azábá ásánter o kamtera bit.”

Issáay jog

(Luká 10:21–22)

²⁵ Á wahdá Issáyá gwasht: “Oo mani Pet, zemin o ásmánay Hodábond! Tará satá kanán o sárháyán ke taw é ráz o habar cha zántkár o hóshmandán chér dátant o kódakáni sará paddar kortant. ²⁶ Oo mani Pet! Taw cha wati razá o wáhagá é dhawlá kort. ²⁷ Sajjahén chiz, Petá mani dastá dátagant. Abéd cha Petá, hechkas Chokká nazánt. Hamé dhawlá, dega hechkas Petá nazánt, abéd cha Chokká o hamá mardomán ke Chokk belóthit Petá pa áyán paddar bekant.

²⁸ “Oo srénprostagén zahmatkasshán! Dém pa man byáét, man wat shomárá áram o ásudagia bakshán. ²⁹ Mani jogá^v baddhá kanét, cha man hél begerét, ke man narmdel o békebr án. Gorhá shomárá áram o ásudagia rasit. ³⁰ Chiá ke mani jog ásán o mani bár sobakk ent.”

^t**11:10** Maláki Nabiay Ketáb 3:1.

^u**11:21** Ajekkái, bezán mójezah, hayrán kanókén kár.

^v**11:29** Jog, bezán dáré ke do gókay gardená ent o bé áiá zemin shohm kanaga nabit.

Issá Shabbatay wájah o wáhond ent

(Markás 2:23–28; Luká 6:1–5)

12 ¹ Yak randé, Shabbatay róchá^w Issá cha gandomi keshárán gwazagá at. Áiay morid shodig atant o kesháray hóshagán sendag o waragá laggetant. ² Parisián ke dist gón Issáyá gwashtesh: “Bechár! Tai morid anchén kára kanant ke Shabbatay róchá rawá naent.” ³ Passawi dát: “Záná, shomá nawántag, wahdé Dáud o áiay hamráh shodig butant, Dáudá ché kort?” ⁴ Hodáay Pákén lógá shot, Hodáay námá hayráti o pákwandhén náni wártant ke áyáni warag na pa áiá rawá at o na pa áiay hamráhán, tahná pa dini péshwáyán rawá at. ⁵ Sharyatá é ham nawántagó ke mazanén parasteshgáhay tahá, dini péshwá Shabbatay békormatiá kanant bale angat bémayár zánag o lékaga^x bant? ⁶ Man gón shomá gwashán ke edá cha mazanén parasteshgáhá ham masteréné hastent. ⁷ Agan shomá é habaray máná bezántén ke gwashit: *Man hayrát o korbánig kanagay lóthók naán, mehr o rahmatay lóthók án,*^y gorhá shomá á mardom mayárig nakortagatant ke bémayár ant. ⁸ Bezánét man ke Ensánay Chokk án, Shabbatay róchay wáhond án.

Mondhén mardéay drahbakshi

(Markás 3:1–6; Luká 6:6–11)

⁹ Cha ódá démá rawán, Issá áyáni kanisahá shot. ¹⁰ Ódá mardé hastat ke dasti hoshk o mondhat. Lahténá pa beddh o bohtám janagay nimmóná cha Issáyá just kort: “Shabbatay róchá kaséay dráh kanag rawá ent yá na?” ¹¹ Gón áyán gwashti: “Agan cha shomá kaséá méshé hast o Shabbatay róchá chátéá bekapit, hamá damáná méshá cha chátá dara nakant? ¹² Ensánay arzesh cha méshá báz géshter ent. Paméshká Shabbatay róchá néki kanag rawá ent.” ¹³ Nun gón á mardá gwashti: “Dastá shahár day.” Áiá dast shahár dát o domi dastay dhawlá wassh o dráh but. ¹⁴ Bale Parisi dhanná shotant o pa Issáyá kóshárénagá shawr o saláhesh kort.

Hodáay gechén kortagén

¹⁵ Wahdé Issáyá áyáni delay é habar zánt, cha ódá dar kapt. Bázéné áiay padá rawán but o áyáni nyámá harkas ke nádráh at, sajjahéni dráh kortant. ¹⁶ Kaddhani kortant o gwashti: “Gón kassá magwashét man kay án”. ¹⁷ É dhawl paméshká but ke Eshayá nabiay gwashtagén habar sarjam bebit:

¹⁸ É mani hezmatkár ent ke man gechén kortag,
maná sakk dóst ent o man cha eshiá báz wassh o razá án,
man wati Ruhá eshiay sará éra géján,
darkawmáni nyámá é hezmatkár mani ensáp o dádrasiay járá perrénit.

¹⁹ Na jang o merha kant o na ják o kukkan o
na kasé damk o bázárán áiay tawará eshkont,

²⁰ na ke nezór o nawakhén kalam o káshá próshit o
na mermeránkén cherágá koshit,
tán hamá wahdá ke ensáp o dádrasiá sóbén^z o kámyáb bekant.

²¹ Pa donyáay kawmán áiay nám mazanén omété bit.^a

Issá o Belzabul

(Markás 3:20–30; Luká 11:14–23; 12:10)

²² Hamá wahdá mardomán Issáyá gwará yak jenni ganóké áwort. Á, kór o gong at. Issáyá dráh kort o á gendag o habar kanagá lagget. ²³ Sajjahéni mardom pa hayráni o bah mánagi gwashagá laggetant: “Chosh buta kant ke é Dáud bádsháhay chokk o óbádag ent?!” ²⁴ Bale wahdé Parisián é habar eshkot, gwashtesh: “É, gón jennáni sardár Belzabulay sarókiá jennána kasshit.” ²⁵ Issáyá áyáni é hayál zánt o gón áyán gwashti: “Har molkéá ke nátepáki bekapit, á moltk gár o zawála bit o har shahré yá lógé bahr o báng bebit, barjáha namánit.” ²⁶ Agan Shaytán wat Shaytáná dar

^{w12:1} Shabbatay róch hamá Shambeh ent, bezán Yahudiáni kár nakanagay róch.

^{x12:5} Lékag, bezán hesáb árag.

^{y12:7} Hushah Nabiay Ketáb 6:6.

^{z12:20} Sóbén, bezán péröz, kámyáb.

^{a12:21} Eshayá Nabiay Ketáb 42:1–4.

bekant, bezán gón wati jendá jang ent. Gorhá áiay bádsháhi chón barjáha mánit? ²⁷ Agan man gón Belzabulay sarókiá jennán dara kanán, gorhá shomay jenday chokk o morid gón kai zór o wáká jennán dara kanant? É paymá, shomay morid wat shomará mayáriga kanant. ²⁸ Bale agan man gón Hodáay Ruhá jennán dara kanán, bezánét ke Hodáay bádsháhi shomay nyámá rasetag. ²⁹ Yá chón buta kant, kasé zóráwarén mardoméay lógá bepoterit o áiay mál o melkatá pol o páñch^b bekant, tán pésará á zóráwarén mardá magipt o mabandit? Gorhá áiay lógá pol o páñch korta kant. ³⁰ Kasé ke mani hamráh o dóstwáh naent, á mani badwáh ent, kasé ke mocch o yakjáh kanagá gón man hór naent, á, sheng o sháng o tak o parka kant.

³¹ “Paméshká shomará gwashán ke har gonáh o kopr, bakshag o pahell kanaga bit, bale Hodáay Pákén Ruhay bárawá sellén habar o kopr, pahell kanaga nabit. ³² Harkas Ensánay Chokkay bárawá sellén habaré bekant bakshaga bit, bale á ke Pákén Ruhay bárawá sellén habaré begwashit, na é donyáyá pahell kanaga bit o na áyókén donyáyá.

Drachk o bar

(Mattá 7:17–18; Luká 6:43–45)

³³ “Agan sharrén bar o nibaga lóthét, báyad ent drachk sharréné bebit, badén drachk badén bar o nibaga dant,^c har drachk cha áiay bará zánaga bit. ³⁴ Oo syahmárzádagán! Shomá ke wat sell o radkár ét, chón sharrén habar korta kanét? Chiá ke harché mardomay delá bebit, hamá cha áiay dapá dara kayt. ³⁵ Sharrén mardom cha sharrén ganj o hazánagá sharrén chiz dara kant o sellén mardom cha sellén hazánagá, sellén chiz. ³⁶ Shomará gwashán ke jost o porsay róchá mardomán wati har mopt o náhudagén habaray hesáb dayagi ent. ³⁷ Chiá ke tai habar ant ke tará bémayára kanant o tai habar ant ke tará mayárbára kanant.”

Neshániay lóthag

(Markás 8:11–12; Luká 11:29–32)

³⁸ Gorhá lahtén Parisi o Sharyatay zánógerá gón áiá gwashit: “Oo ostád! Má cha taw neshánié gendaga lóthén.” ³⁹ Issáyá áyáni passawá gwashit: “Sherr o zenahkárén nasl o padréch, neshánia lóthit, bale Yunes nabiyay neshániá abéd, dega hech neshánié áyán dayaga nabit. ⁴⁰ Anchosh ke Yunes tán say róch o say shapá thuhén máhigay lápá at, hamé paymá Ensánay Chokk tán say róch o say shapá zeminay lápá bit. ⁴¹ Jost o porsay róchá, Naynawáay mardom gón é zamánagay mardomán hórigá páda káyant o áyán mayáriga kanant, chiá ke á Yunesay dháh o hozzhárbáshay sará cha wati gonáhán pashómán butant. Bale nun cha Yunesá masteréné edá ent. ⁴² Jost o porsay róchá, Sabáay malakah^d gón é zamánagay mardomán hórigá páda kayt o áyán mayáriga kant, chiá ke Sabáay malakah cha donyáyá á dastá átk tán Solaymánay hekmatá beshkont. Bale nun cha Solaymáná masteréné edá ent.

Wayránén kalát

(Luká 11:24–26)

⁴³ “Wahdé jenné cha kaséá dara kayt, gorhá gyábánána rawt tán pa wati árámi o ásudagiá, jáhé shoház bekant, bale choshén jágahé narasiti. ⁴⁴ Gorhá gwashit: ‘Cha ódá ke dar átkagán, padá hamódá rawán.’ Wahdé pera tarrit o gendit ke á lóg hórk o hálig, roptag o sáp o sallah ent, ⁴⁵ gorhá rawt o cha watá dega hapt selterén jenn gón wata kárit. Á sajjahén, hórigá ódá rawant o ord o bonaga kanant. É dhawlá, á mardomay ásar o ákebat cha pésarigéná angat badtera bit. É badkárén naslay hál ham hamé paymá bit.”

Issáay mát o brát

(Markás 3:31–35; Luká 8:19–21)

⁴⁶ Issá angat gón mardomán habará at ke áiay mát o brát átk o dhanná óshtátant. Áyán gón Issáyá habar kanagi at. ⁴⁷ Gorhá yakkéá Issá sahig kort ke: “Tai mát o brát dhanná óshtátagant, gón taw habar kanaga lóthant.” ⁴⁸ Issáyá passaw dát: “Mani mát kay ent o mani brát kay?” ⁴⁹ Padá áiá wati

^b12:29 Pol o páñch, bezán zórbord, loth o pol.

^c12:33 Asligén Yunáni nebeshtánka gwashit: “yá drachká sharr bekanét o nibag sharr, yá drachká bad bekanét o nibag bad”.

^d12:42 Asligén Yunáni nebeshtánka gwashit: “jonubay malakah”.

moridáni némagá dast shahár dát o gwasht: “Esh ant mani mát o brát. ⁵⁰ Harkas ke mani ásmáni Petay wáhag o razáay sará kára kant, mani brát, mani mát o gohár hamá ent.”

Tohm chandhagay mesál

(Markás 4:1–9; Luká 8:4–8)

13 ¹ Hamá róchá, Issá cha lógá dar átk o mazangwarmay kerrá shot o nesht. ² Bale mardománi anchén mazanén mocchié áiay gwará átk ke á bójigéá swár but. Sajjahén mardom gwarmay tayábáe ^e óshtátagatant. ³ Gorhá áiá mardom gón darwar o mesálán bázén dars o sabak dátant o gwashti: “Yak dehkáné pa tohmay chandhágá shot, ⁴ tohmáni chandhagay wahdá kammoké tohm ráhay sará retk o báli morgán chet o wártant. ⁵ Kammé tohm dhal o dhókáni sará retk ke ódá hák kamm at, paméshká zut rost o sabz butant, chiá ke dhagár talag at. ⁶ Bale cha róchay trondén garmiá gimmort^f o hoshk butant, chiá ke áyáni risshag o wandhál^g zeminá johl nashotagatant. ⁷ Kammé tohm ham shezz o cherekk o dhanganáni^h tahá retk, shezz o dhanganán áyáni rost o rodóm dásht. ⁸ Dega kammé tohm, sharrén zeminá retk, rost o baresh kort, jáhé sad sari, jáhé shast sari o jáhé si sari. ⁹ Harkasá gósh hast, beshkont.”

Hodáay bádsháhiay ráz

(Markás 4:10–12; Luká 8:9–10)

¹⁰ Nun morid áiay kerrá átkant o jostesh kort: “Chiá taw gón mardomán pa darwar o mesál habara kanay?” ¹¹ Áyáni passawá gwashti: “Hodáyá é zánt shomará dáttag ke ásmáni bádsháhiay rázán sarpad bebét, bale á dega mardománá nadátagi. ¹² Hamáiá ke chizé hast, géshter dayaga bit, tánke áiá báz bebit, bale kaséá ke nést, hamá ke hastenti ham pach geraga bit. ¹³ Paméshká man pa darwar o mesál gón áyán habara kanán ke áyáni chammán maym hast bale nagendant, góshesh pach ant bale naeshkonant o sarkech ham nawarant. ¹⁴ Eshayá nabiay péshgoí é mardománi bárawá rást o sarjama bit ke gwashit:

góshána eshkonét, bale sarkecha nawarét,
góshána chámána chárét, bale nagendét,
¹⁵ chiá ke é kawm sengdel butag,
góshesh grán ant,
áyán watí chamm bastagant
chó mabit áyáni chamm begendant,
áyán gósh beshkonant,
áyán del bezánant o sarpad bebant o
mani némagá per betarrant
ke man áyán dráh bekanán.ⁱ

¹⁶ “Bale shomay chamm bahtáwar ant ke gendant o shomay gósha eshkonant. ¹⁷ Shomará rásténa gwashán, bázén paygambar o pahrézkárén mardománi wáhag butag ke harché shomá gendagá ét áyán ham bedistén, bale nadistesh o harché ke shomá eshkonagá ét áyán ham beshkotén bale naeshkotesh.

Tohm chandhagay mesálay maksad

(Markás 4:13–20; Luká 8:11–15)

¹⁸ “Nun tohm chandhagay mesálay maksad o mánáyá gósh bedárét. ¹⁹ Wahdé kasé Hodáay bádsháhiay habará eshkont, bale sarkecha nawárt, gorhá Shaytána kayt o harché ke áiay delá keshag butag dara kant o bárt. Esh at ráhay sará retkagén tohmáni mesálay máná. ²⁰ Á tohm ke dhal o dhókáni sará retkant, hamá mardomay mesál ent ke Hodáay habará eshkont o hamá damáná pa gal o shádehia mannit, ²¹ bale pa é sawabá ke risshag o wandháli najatag, Hodáay habar áiay delá, tán dérá namánit o jágha nakant. Wahdé Hodáay gál o habaráni sawabá sakki o ázáré

^e13:2 Tayáb, bezán daryáy kerr, sáhel.

^f13:6 Gimmorag, bezán hoshk tarrag, napasgir bayag.

^g13:6 Wandhál, bezán risshag o rótag.

^h13:7 Shezz, yá shenz, o cherekk békarkatén sabzagé ke asligén kesháray tahá rodít o áyáni rost o rodómá dárit. Dhangan dega konthagi sabzagé ke á ham keshárá harába kant.

ⁱ13:15 Eshayá Nabiay Ketáb 6:9–10.

berasiti, hamá damáná cha ráhá thagalit o kapit. ²² Á tohm ke shezz o dhagaráni tahá retkant, hamá mardomay mesál ent ke Hodáy habará gósha dárit, bale donyái parésháni o mál o zarray hers o jópah,^j áiá rada dayant o naylant Hodáy habar sabz betarrit o bar o barward bedant. ²³ Á tohm ke sharrén zeminá retkant hamá mardomay mesál ent ke Hodáy habará gósha dárit o sarpada bit o bar o barwarda dant, bázéné sad sari, bázéné shast sari o bázéné si sari.”

Zahrichkay mesál

²⁴ Issáyá pa áyán dega mesálé áwort o gwasht: “Ásmáni bádsháhi, hamá mardomay paymá ent ke warí dhagárá sharrén tohmi keshtagat, ²⁵ bale wahdé mardom waptag o wáb atant, áiay dozhmené átk o gandomay keshtagén dhagárá zahrichk o barri káhay tohmi rétk o shot. ²⁶ Wahdé gandom rostant o hóshagesh áwort, káh o zahrichk ham rost o mazan butant. ²⁷ Nun nawkar átkant o gón warí hodábondá gwashtesh: ‘Oo wájah! Taw warí dhagárá sharrén tohm nakeshtagat? Gorhá é zahrichk o barri káh cha kojá átkant?’ ²⁸ Gwashti: ‘Dozhmená é kár kortag.’ Nawkarán jost kort: ‘Taw lóthay má berawén áyán begwajén?’ ²⁹ Passawi dát: ‘Na, chó mabit ke káh o zahrichkáni gwajagay wahdá gandom ham dar kanag bebant. ³⁰ Tán ronagay wahdá belli hórigá rodant, ronagay wahdá gón rónkárána gwashán: “Pésará zahrichkán yakráh o pa sóchagá grámband bekanét, randá gandomán mani ambárá bellét.”’”

Kasterén tohmay mesál

(Markás 4:30–32; Luká 13:18–19)

³¹ Issáyá gón áyán dega mesálé jat o gwasht: “Ásmáni bádsháhi, thélkáhay^k tohmay dhawlá ent, ke kaséá zort o warí dhagárá kesht. ³² Toré belli áiay dánag cha é dega tohmán kaster ent, bale wahdé rodit cha é dega sabzagán borzter, drachkéay dhawlá bit o báli morg áiay ták o tháláni chérá kodoh o kodáma bandant.”

Homiray mesál

(Luká 13:20–21)

³³ Randá dega mesálé áworts: “Ásmáni bádsháhi, hamá homiray paymá ent ke janénéá zort o gón bázén ártéá^l hawár kort o kam kammá sajjahén árt gwát gept o homir but.”

³⁴ Issáyá pa mardomán sajjahén habar, mesál o darwaráni tahá gwashtant, bé darwar o mesálán hech habaria nakort, ³⁵ tán paygambaray é habar sarjam bebit ke gwashit: “man gón mesál o darwarán warí zobáná pacha kanán o gón áyán anchén habara kanán ke cha donyáay péddáeshá beger tán angat, chér o andém butagant.”^m

Zahrichkay mesálay máná

³⁶ Randá Issáyá mardom eshtant o lógá shot, ódá morid áiay gwará átkant o gwashtesh: “Márá dhagárav barri káh o zahrichkay mesálay mánáyá sarpad kan.” ³⁷ Gwashti: “Hamá ke sharrén tohma keshit, Ensánay Chokk ent. ³⁸ Dhagár donyá ent, sharrén tohm ásmáni bádsháhiay chokk ant, zahrichkay tohm Shaytánay chokk ant, ³⁹ hamá dozhmen ke tohmi dhagárá rétkant, Shaytán ent, kesháray rónay wahd, áheratay róch ent o kesháray rónók,ⁿ préshtag ant. ⁴⁰ Anchosh ke zahrichk mocch kanag o ásá sóchaga bant, áheratay róchá ham hamé dhawlá bit. ⁴¹ Ensánay Chokk, warí préshtagán ráha dant tán sajjahén badkárán o áyán ke degarán rada dayant yakjáh bekanant o cha áiay bádsháhiá dar bekanant. ⁴² Áyán ásay kurahá dawra dayant ke ódá gréwag o dantán pa dantán droshaga bit. ⁴³ Á wahdá nék o pahrézkárén mardom, warí Petay bádsháhiá róchay paymá drapshant.^o Harkasá gósh hast, beshkont.”

^j13:22 Jópah, bezán lálech o tamah.

^k13:31 Thélkáh, bezán hardal.

^l13:33 Asligén Yunáni nebeshtánka gwashit: “say sátá”, bezán 15 kiluá gesh.

^m13:35 Zabur 78:2.

ⁿ13:39 Ronók, bezán hamá ke keshára borrit o moccha kant.

^o13:43 Drapshag, shahm janag, jalashkag.

Ásmáni bádsháhiay dega say mesál

⁴⁴ “Ásmáni bádsháhi, hamá ganj o hazánagay paymá ent ke dhagáréá chér dayag butag. Wahdé anágat kaséá dar gétk, áiá chéra dant o padá pa gal o shádehia rawt o wati sajjahén mál o maddhiá bahá kant o hamá dhagárá pa bahá zurit.

⁴⁵ “Hamé dhawlá, ásmáni bádsháhi, sawdágeréay paymá ent ke dhawldárén morwáred shoháza kant. ⁴⁶ Wahdé áiá sakkén gránkimmatén morwáredé dastá kapit, gorhá rawt o wati sajjahén hast o néstá bahá kant o hamá morwáredá gipt.

⁴⁷ “Hamé dhawlá ásmáni bádsháhi, yak dám o máhóréay dhawlá ent ke gwarmá dawria dayant o har paymén máhiga gerant. ⁴⁸ Wahdé dám cha máhigá porra bit, cha gwarmá dhann daria kanant o máhigán dara chenant, sharrén máhigána zurant o saptáni tahá kanant o é dega harábénán dawra dayant. ⁴⁹ Áheratay róchá ham anchosha bit. Préshtaga káyant o badkárán cha nék o pahrézkárén mardomána gisshénant o jetá kanant. ⁵⁰ Badkárán ásay kurahá dawra dayant ke ódá gréwag o dantán pa dantán droshaga bit. ⁵¹ Bárén, shomá é sajjahén habarán sarpad butét?” Áyán passaw dát: “Ji haw.” ⁵² Gón áyán gwashti: “Paméshká Sharyatay har zánóger ke ásmáni bádsháhiay moridé bit, hamá marday dhawlá ent ke cha wati hazánagá har paymén nök o kwahnén chiz dara kant.”

Issá padá Náserahá pera tarrit

(Markás 6:1–6; Luká 4:16–30)

⁵³ Wahdé Issáyá é mesál o darwar sarjam kortant, cha ódá dar kapt. ⁵⁴ Wati jenday shahrá átk, óday kanisahá mardománi tálím dayagi bongéj^p kort. Mardom pa hayráni gwashagá laggetant: “Áiá é zánt o zánag cha kojá rasetag o é dhawlén ajabén kár kanagay wák o twáni cha kojá dastá kaptag?” ⁵⁵ É hamá dártráshay chokk naent? Maryam eshiaymát o Ákub, Issop, Shamun o Yahudá eshiay brát naant? ⁵⁶ Eshiay sajjahén gohár hamedá may kerrá jahmenend naant? Gorhá é sajjahén chizi cha kojá áwortagant? ⁵⁷ Áyán bad átk o Issáesh namannet, bale Issáyá gón áyán gwashti: “Hech nabiéá wati shahr o hankéná o wati lógá sharap nést.” ⁵⁸ Paméshká áiá ódá bázén mójezah pésh nadásht, chiá ke mardomán áiay sará báwar néstat.

Pákshódokén Yahyáay koshag

(Markás 6:14–29; Luká 9:7–9)

14 ¹ Á wahdá Jalilay hákem Hirudis, Issáy nám o tawará sahig but. ² Áiá gón wati hezmatkárán gwashti: “É hamá pákshódokén Yahyá ent ke cha mordagán zendag butag, paméshká choshén ajekkái o mójezahána kant.” ³ Chosh at ke Hirudisá Hirudiáay sawabá ke pésará áiay brát Piliposay jan at, Yahyá geráéntag o bandijáhá band kortagat. ⁴ Chiá ke Yahyáyá gón Hirudisá gwashtagat: “Hirudiáay wati lógi kanag Sharyatá pa taw rawá naent.” ⁵ Hirudisá pa Yahyáy kóshárénagá shawr kortagat bale torseti, chiá ke mardománi báwar at Yahyá paygambaré.

⁶ Hirudisay sálgerah but o Hirudiáay jeneká mehmánáni démá nách o sohbat gept. Hirudis báz washdel but, ⁷ sawgandi wárt o labzi kort ke: “Harché lóthay belóth, pa taw bakshaga bit.” ⁸ Jeneká wati mátay shawr o saláhay sará gwashti: “Pákshódokén Yahyáay sará hamedá tabakéay tahá bekan o maná beday.” ⁹ Hirudis báz paréshán o deltaparkah but bale mehmánáni démá sawgandi wártagat o jeneki labz dátagat, paméshká parmáni kort áiay é wáhagá barjáh bekanant. ¹⁰ É dhawlá, Yahyáay sari bandijáhá borráént. ¹¹ Gorhá áiay sar tabakéay tahá árag o jeneká dayag but, áiá wati mátay kerrá bort. ¹² Yahyáay morid átkant o áiay jónesh bort, kabr o kaponá rand, shot o Issáesh sahig kort.

Panch hazár mardomá warák dayag

(Markás 6:32–44; Luká 9:10–17; Yuhanná 6:1–13)

¹³ É habaray eshkonagá rand, Issá bójigéá swár but o dur o gestáhén jáhéá tahnaká shot. Wahdé mardom sahig butant, cha shahrán payádaká áiay randá gón kaptant. ¹⁴ Issá ke cha bójigá ér kapt o mardománi mazanén mocchii dist, áyáni sará bazzagi but o sajjahén nádráhi dráh kortant.

¹⁵ Bégáhá, morid áiay kerrá átkant o gwashtesh: “É, dur o gestáhén jágahé o béwahd ham butag, paméshká mardomán bell ke méttag o bázárán berawant o pa wat ward o waráké bahá begerant.”

¹⁶ Bale Issáyá gwashti: “Áyán rawagay zalurat nést, shomá wat áyán warák bedayét.” ¹⁷ Gwashtesh:

“Edá may kerrá tahná panch nán o do máhig hast.”¹⁸ Gwashti: “Harché shomárá gón, mani kerrá byárét.”¹⁹ Gorhá áiá mardom sabzagén káháni sará nendagay parmán dátant, randá panchén nán o doén máhigi zortant, ásmánay némagá cháreti o Hodáay shogri gept, gorhá náni chondh chondh kort o moridáni dastá dátant. Moridán nán mardománi sará bahr kortant.²⁰ Sajjahén mardomán tán sérá wárt o moridán angat cha sar átkagén chondhán, dwázdah sapt porr kort.²¹ Janén o chokkán o abéd, kesás panch hazár mardén atant. Sajjahénán sérá wárt.

Issá ápay sarborá gáma jant

(Markás 6:45–52; Yuhanná 6:15–21)

²² Issáyá hamá damáná morid parmán dát o gwashtant: “Tánke man é mardomán roksata kanán, shomá bójigá swár bét o cha man pésar gwarmay domi némagá berawét.”²³ Mardománi rahádag kanagá rand, pa dwá kanagá tahná kóhay sará sar kapt. Rónend at o á wat tahná at.²⁴ Á wahdá, bójig cha tayábá dur rasetagat, trond o tézén gwát o mastén mawj o chawláni ámách^q at.²⁵ Shapay cháromi pásá, Issá ápay sará gám janán dém pa áyán pédák at.²⁶ Wahdé moridán Issá ápay sará gám janán dist, sakk torset o gwashtesh balkén ruhé, paméshká cha torsá kukkáresh kort.²⁷ Bale Issáyá hamá damáná gón áyán gwasht: “Matorsét, é man án.”

²⁸ Petrosá gwasht: “Oo Hodáwand! Agan é taw ay, gorhá bell ke man ham ápay sará tai kerrá káyán.”²⁹ Issáyá gwasht: “Byá!” Gorhá Petros cha bójigá gwarmá ér átk o ápay sará Issáy némagá rawagá lagget.³⁰ Bale cha gwátay trondiá torseti o ér boddhagá lagget, gorhá kukkári kort: “Oo Hodáwand! Maná berakkén.”³¹ Hamá damáná Issáyá dast shahár dát, á gept o gwashti: “Oo kambáwar! Chiá shakket kort?”³² Bójigá sar kaptant o gwát kapt o áram but.³³ Hamá ke bójigá neshtagatant, Issáesh satá o saná kanáná gwasht: “Béshakk taw Hodáay Chokk ay.”

Nádráháni drahbakshi

(Markás 6:53–56)

³⁴ Wahdé áyán gwarm gwázént Genisáretay shahrá ér átkant.³⁵ Óday mardomán Issá pajjáh áwort, sajjahén hand o damagay á dega mardomesh sahig kortant o sajjahén nádráhesh áiay kerrá áwortant.³⁶ Dazbandiesha kort: “Bell má tai kabáhay lambá dast bejanén o bass.” Áyán ke dasta jat, sajjahén wassh o dráha butant.

Delpáki

(Markás 7:1–23)

15¹ Randá, cha Urshalimá átkagén lahtén Parisi o Sharyatay zánóger Issáy kerrá átk o gwashtesh:² “Tai morid chiá may pet o piroki rahbandá próshant o cha waragá pésar dasta nashódant?”³ Áyáni passawá gwashti: “Shomá chiá pa wati dód o rahbandáni dáragá Hodáay hokmána próshét?!⁴ Hodáyá gwashtag: *Wati pet o mátá sharap o ezzat beday o harkas ke wati pet o mátá zá o dwá bedant, báyad ent koshag bebit.*^r⁵ Bale shomá gwashét: ‘Agan kasé wati pet yá mátá begwashit: “Hamá komak ke man báyad ent shomárá bedátén, á man Hodáay ráhá korbánig kortag”,⁶ nun zalurat naent á wati pet o mátá sharap bedant.’ Shomá pa wati dód o rahbandáni dáragá Hodáay habará próshét.⁷ Oo doru o dopóstén mardomán! Eshayá nabiá cha Hodáay némagá shomay bárawá sharr gwashtag: ⁸ É mardom dapá maná satá dayant, bale delesh cha man báz dur ent.⁹ Á moptá maná parastesha kanant o mardománi jórhéntagén ráh o rahbandán sója dayant.”^s

¹⁰ Issáyá mardom wati kerrá lóthat o gwashtant: “Gósh bedárét o sarpad bebét.¹¹ Á chizé ke dapá rawt mardomá nápáka nakant, bale hamá chiz ke cha dapá dara kayt mardomá nápáka kant.”¹² Nun morid áiay kerrá átkant o gwashtesh: “Zánay ke tai é habarán Parisi tawréntagant?”¹³ Issáyá passaw dát: “Har nehálét ke mani ásmáni Petá nakeshtag, allamá gwajaga bit.¹⁴ Shomá áyán bay makanét, á kóráni kórén rahshón ant, wahdé yak kóré domi kórá ráhá shóna dant gorhá doén chátá kapant.”

¹⁵ Petrosá gwasht: “É mesálay mánáyá márá sarpad kan.”¹⁶ Issáyá gwasht: “Shomá angat haminkadar násarpad ét?¹⁷ Nazánét harché ke dapá rawt, lápá mána bit o padá cha rótán dara

^q14:24 Ámách, bezán dochár.

^r15:4 Dargwaz 20:12; 21:17.

^s15:9 Eshayá Nabiay Ketáb 29:13.

^t15:13 Nehál, bezán nód keshtagén drachk.

bit.¹⁸ Bale harché ke cha dapá dara kayt, békáha cha delá páda kayt o hamé chiz ensáná nápáka kant.¹⁹ Chiá ke: badén pegr o hayál, hón o kósh, zená, bénangi o bannámi, dozzi, drógén sháhedi o kopr, cha delá chesta bant.²⁰ É sajjahén, mardomá nápák o palita kanant, bale agan kasé gón nashoshtagén dastán warag bwárt, sell o nápáka nabit.”

Darkawmén janénéay báwar

(Markás 7:24–30)

²¹ Issáyá á jágah yalah dát o Sur o Saydunay sardhagárá shot.²² Kanáni janéné ke hamóday mardomé at átk o kukkaní kort: “Oo Hodáwand, oo Dáud bádsháhay chokk! Tará mani sará bazzag bát. Palitén ruhé mani jeneká sakk ázára dant.”²³ Bale Issáyá jwábé nadát. Nun moridán dazbandi kort: “Eshiá yal kan, galléni, may randá kaptag o báz kukkaní kanagá ent.”²⁴ Issáyá darráent: “Man bass pa Bani Esráilay gárén méshán ráh dayag butagán.”²⁵ Gorhá janén áiay pádán kapt o gwashti: “Oo Hodáwand! Maná komak kan.”²⁶ Gwashti: “Cha chokkáni dastá nánay pach gerag o kochekáni démá dawr dayag sharr naent.”²⁷ Janéná gwasht: “Oo Hodáwand! Bale kochek wati wáhondáni parzónagay sar árókén naganay thokkorána warant.”²⁸ Gorhá Issáyá áiay passawá gwasht: “Oo bánok! Tai báwar mohr o rédag^v ent, paméshká hamá dhawl ke taw lóthay anchosha bit.” Hamá damáná áiay jenek dráh but.

Bázén mardománi drahbakshi

²⁹ Issáyá á jágah esht o shot, cha Jalilay mazangwarmay tayábá gwast o yak kóhéay sará sar kapt o nesht.³⁰ Bázén mardomé áiay kerrá átk, lang, kór, mondh, lell o dega har paymén nádráhesh, Issáy démá áwortant o Issáyá dráh kortant.³¹ Wahdé mardomán dist ke gong habar kanagá ant, mondh dráh bayagá ant, lang tarragá ant o kór gendagá ant, gorhá Esráili hayrán butant o wati Hodáesh satá o saná kort.

Chár hazár mardomá warák dayag

(Markás 8:1–10)

³² Issáyá wati morid lóthet o gwashtant: “Maná é mardománi sará bazzaga bit, say róch ent mani kerrá ant o nun pa waragá hecchesh nést. Gón shodigén lápá eshán roksat kanaga nalóthán, chó mabit ke ráhá betosant o bekapant.”³³ Moridán darráent: “É barr o gyábáná pa inchok mardomay waráká, nán cha kojá byárén?”³⁴ Gorhá Issáyá cha moridán jost kort: “Shomará chont nán gón?” Gwashtesh: “Hapt nán o lahtén hordén máhig.”³⁵ Áiá mardom zeminay sará nendagay hokm dátant.³⁶ Gorhá haptén nán o máhigi zortant, Hodáay shogri gept, náni chondh chondh kort o moridáni dastá dátant o moridán mardománi sará bahr kortant.³⁷ Sajjahénán sérá wárt o randá cha sar átkagén nánáni chondhán, moridán hapt sapt porr kort.³⁸ Chár hazár mardéná warák wárt, áyán janén o chokk ham gón at.³⁹ Mardománi roksat kanagá rand, Issá bójigá nesht o Magadanay sardhagárá shot.

Ásmáni neshániay lóthag

(Markás 8:11–13; Luká 12:54–56)

16 ¹ Parisi o Sadukiáni lahtén mardom Issáyá kerrá pa áiay chakkásagá átk o ásmáni neshánié lóthetesh.² Bale Issáyá passaw dát: “Wahdé bégáha bit shomá gwashét: ‘Bóm o hawá wassha bit chiá ke ásmánay rang sohr ent.’³ Sabáhá gwashét: ‘Maróchi tuppána bit chiá ke ásmánay rang moj o hónchak ent.’ É paymá ásmánay rang o neshániáni kesás kanagá zánét, bale zamánag o wahday neshániáni kesás kanagá nazánét.⁴ Sherr o zenahkárén nasl o padréch neshániá lóthit, bale áyán Yunes nabiay neshániá abéd, dega hech neshánié dayaga nabit.” Randá Issáyá á yalah dátant o shot.

^u15:26 Issáy maksad esh naat ke é janén nápák ent. Áiay maksad esh at ke janénay báwar cha Yahudiáni báwará gésht.

^v15:28 Rédag, bezán mohkam.

Parisi o Sadukiáni badén homir

(Markás 8:14–21)

⁵ Wahdé morid mazangwarmay domi pahnátá rasetant zántesh ke nánesh shamoshtag. ⁶ Issáyá gón áyán gwasht: “Hozzhár bét! Cha Parisi o Sadukiáni homirá pahréz kanét.” ⁷ Gorhá á watmánwat habar kanagá laggetant: “Wájah paméshká chosha gwashit ke má nán gón wat nayáwortag.” ⁸ Issáyá zánt ke ché gwashagá ant, paméshká gwashti: “Oo kambáwarán! Chiá jérhagá ét ke ‘gón má nán nést,’ ⁹ angat hecch sarpad nabutagét?! Shomá á panchén nán shamoshtag, ke panch hazár mardomá sérá wárt o cha sar átkagén naganán chont sapt porr kort? ¹⁰ Yá hamá haptén nán ke chár hazár mardomá wárt o sér kort o shomá cha sar átkagénán chont sapt porr kort? ¹¹ Gorhá chón sarkecha nawarét ke man gón shomá nánáni bárawá habar nakortag? Cha Parisi o Sadukiáni homirá pahréz kanét.” ¹² Gorhá morid sarpad butant ke áiá nagwashtag cha ártén homirá pahréz bekanant, cha Parisi o Sadukiáni dars o tálimá watá dur bedárant.

Petrosay mannag o gwáhi

(Markás 8:27–30; Luká 9:18–21)

¹³ Wahdé Issá Kaysariah Pilipiay sardhagárá átk, cha wati moridán josti kort: “Mardom Ensánay Chokkay bárawá ché gwashant, man kay án?” ¹⁴ Áyán passaw dát: “Lahténa gwashit pákshódókén Yahyá ay, lahténa gwashit Elyás nabi ay, dega lahténa gwashit Eremiá nabi ay yá cha á dega nabián yakké.” ¹⁵ Gorhá cha áyán josti kort: “Shomá wat mani bárawá ché gwashét, man kay án?” ¹⁶ Shamun Petrosá passaw dát: “Taw Masih ay, namiránén Hodáay Chokk.” ¹⁷ Issáyá darráent: “Oo Shamun, oo Yunáay chokk! Taw bahtáwaré ay, chiá ke é habar ensánéá^w pa taw záher o paddar nakortag, mani Pet ke ásmáná ent, áiá paddar kortag. ¹⁸ Tará gwashán: Taw Petros^x ay o é taláray sará man wati kelisáay bonyádá éra kanán ke markay zór^y áiá hechbar prósha nadant o áiay sará sóbéna nabit. ¹⁹ Man ásmáni bádsháhiay kelítán tará dayán, zeminay sará harché ke taw makana kanay, ásmáná ham makan kanaga bit, harché ke zeminay sará taw rawá kanay ásmáná ham rawá kanaga bit.” ²⁰ Randá áiá wati morid parmán krontant: “Hechkasá magwashét ke man Masih án.”

Wati mark o jáh janagay^z bárawá, Issáay péshgói

(Markás 8:31–33)

²¹ Cha hamá wahdá rand Issá gón wati moridán pa tachk o paddari habar kanagá lagget ke: “Allamá, báyad ent Urshalimá berawán, cha kawmay kamásh, mazanén dini péshwá o Sharyatay zánógeráni dastá sakki o sóri besaggán o koshag bebán o saymi róchá zendag bebán o jáh bejanán.” ²² Petrosá á yak kerré kasshet o pa iráz gwashti: “Oo Hodáwand! Hodá chosh makanát. Gón taw hechbar é paymá nabit.” ²³ Issáyá chak tarrént o gón Petrosá gwashti: “Oo Shaytán! Cha mani démá dur bay. Taw mani ráhá bandagá ay, tai hayál Hodái hayálé naent, ensáni hayálé.”

Issáay randgiri

(Markás 8:34—9:1; Luká 9:22–27)

²⁴ Randá Issáyá morid lóthetant o gwashti: “Agan kasé lóthit mani randgiriá bekant, báyad ent wati delay sajjahén lóth o wáhagán yalah bedant o pa sáhay nadr kanagá, wati jenday salibá baddhá bekant o mani ráhá gám bejant. ²⁵ Chiá ke, agan kasé wati sáhay rakkénagay johdá bekant, áiá báhénit, bale á ke wati sáhá pa manigia báhénit, áiá rakkénit. ²⁶ Agan kaséá sajjahén donyá berasit, bale wati sáhá bebáhénit, gorhá á chónén sóbé bárt o ché kattheta^a kant? Mardom pa wati sáhá che kimmáte dáta kant?

²⁷ “Ensánay Chokk gón wati Petay mazanén shán o marháhá préshtagáni hamráhiá kayt, gorhá harkasá áiay kortagén káráni mozzá dant. ²⁸ Shomárá rásténa gwashán, edá lahtén mardom óshtátag ke tán áyáni démá Ensánay Chokkay bádsháhi záher mabit, markay támá nachashant.”

^{w16:17} Asligén Yunáni nebeshtánka gwashit: “jesm o hón”.

^{x16:18} Yunáni zobáná, “Petráay” máná “talár” ent.

^{y16:18} Asligén Yunáni nebeshtánka gwashit: “tahtarunay darwázag”.

^{z16:20} Jách janag, bezán cha wati jáhá anágatén pád áyag, Arabi o Pársiá “qiám, rastákhiz”.

^{a16:26} Kathag, bezán nap o putt kanag, dastá árag.

Issáay dém o dróshomay drapshnáki

(Markás 9:2–13; Luká 9:28–36)

17¹ Shash róchá rand, Issáyá Petros, Ákub o áiay brát Yuhanná, hamráh kortant o yak borzén kóhéay sará bortant ke ódá dega kass mabit. ²Ódá áyáni démá Issáay chehrag o dróshom badal but. Áiay dém róchay dhawlá drapshnák but o god o pósháki, espét espét butant. ³ Hamá wahdá áyáni démá Mussá o Elyás záher butant o gón Issáyá habar kanagá laggetant. ⁴ Petrosá gón Issáyá gwasht: “Oo Hodáwand! May edá bayag sakk sharr ent, agan tai razá bebit hamedá say sáheg o kápára^b bandén, yakké pa taw, yakké pa Mussá o degaré pa Elyásá.” ⁵ Hamé wahdá ke angat á habará at, drapshókén jambaréá^c áyáni sará sáheg kort o cha jambará tawáré átk o gwashti: “É mani dóstén Bacch ent, cha eshiá man báz wassh o razá án, eshiay habarán gósh bedárét.” ⁶ Wahdé moridán é tawár eshkot, sakk torsetesh o dém pa chér kaptant. ⁷ Bale Issá démá átk, dasti per kortant o gwashti: “Pád áét, matorsét!” ⁸ Wahdé áyán chamm pach kortant o cháret, abéd cha Issáyá dega hechkasesh nadist.

⁹ Cha kóhá ér kapagay wahdá Issáyá hokm kortant: “Tán hamá wahdá ke Ensánay Chokká cha mordagán jáh najatag, wati é distagénáni bárawá hechkasá hál madayét.” ¹⁰ Moridán jost kort: “Sharyatay zánóger chiá gwashant ke cha Masihay áyagá pésar, báyad ent Elyás nabi byayt?”

¹¹ Passawi dát: “Elyása kayt o sajjahén kárán gwam o géga kant. ¹² Bale mana gwashán, Elyás wa átkag, áyán pajjáh nayáwort o harché ke áyáni delá lóthet, gón áiá hamá dhawlesh kort. Hamé dábá Ensánay Chokká ham cha áyáni dastá sakki o sóri saggagi ent.” ¹³ Nun moridán zánt ke á pákshódökén Yahyáay bárawá habar kanagá ent.

Jenni bachakéay drahbakshi

(Markás 9:14–29; Luká 9:37–42)

¹⁴ Wahdé Issá o sayén morid mardománi mocchiay nazziká átkant, yak mardé Issáay démá átk, kóndhán kapt o gwashti: ¹⁵“Oo wájah! Tará mani bachakay sará bazzag bát, áiá mergiay nádráhi gón ent o sakk azáb o bazzagia kant, bázén baré ásá kapit o báz bará ápá.” ¹⁶ Man tai moridáni kerrá áwort, bale áyán dráh kort nakort.” ¹⁷ Issáyá gwasht: “Oo bébáwar o gomráhén nasl o padréch! Man tán kadéná gón shomá bemánán? Tán chinchok wahdá shomárá besaggán? Chokká edá mani kerrá byárét.” ¹⁸ Issáyá jenn hakkal dát, jenn dar átk o bachak hamá damáná dráh but.

¹⁹ Randá morid halwatá Issáay gwará átkant o cha áiá jostesh kort: “Má chiá á jenn kasshet nakort?” ²⁰ Issáyá passaw dát: “Shomay kambáwariay sawabá. Shomárá rásténa gwashán, agan shomay báwar arzonéay kesásá^d ham bebit, shomá é kóhá gwashta kanét ke ‘cha edá bekenz o ódá beraw,’ kóha kenxit. Hech chiz pa shomá nabuteni naent. ²¹ Bale é dhawléen jenn, abéd cha dwá kanag o róchag dáragá dara nayáyant.”^e

Issáay markay domi péshgóí

(Markás 9:30–32; Luká 9:43–45)

²² Wahdé Jalilá yakjáh butant, Issáyá gón áyán gwasht: “Ensánay Chokk dróhaga bit o anchén mardománi dastá dayaga bit ²³ke áiá koshant, bale saymi róchá á zendaga bit o jáha jant.” Cha é habarán, áiay morid báz paréshán o deltaparkah butant.

Mazanén parasteshgáhay song o máliát

²⁴ Wahdé Issá o áiay morid Kaparnáhumá rasetant, gorhá mazanén parasteshgáhay songi o máliátgir Petrosay kerrá átkant o jostesh kort: “Tai ostád mazanén parasteshgáhay songá nadant?”

²⁵ Passawi dát: “Haw, dant.” Wahdé Petros lógá átk, Issáyá cha áiá pésar hamé jost kort ke: “Oo Shamun!^f Donyáay bádsháh cha kayá song o máliáta gerant? Cha wati chokkán yá cha degarán?”

²⁶ Passawi tarrént: “Cha degarán.” Issáyá gwasht: “Gorhá chokk bakshaga bant. ²⁷ Bale pa áyáni

^b17:4 Kápár, kápar, kapar.

^c17:5 Jambar, bezán abr.

^d17:20 Asligén Yunáni nebeshtánka gwashit: “thélkáhay tohmay kesásá.” Thélkáh, bezán hardalay tohm báz gwandh ant.

^e17:21 Lahtén daznebeshtá band 21 néstent.

^f17:25 Petros hamá Shamun ent; bechár Mattá, bahr 10, band 2.

naranjénagá, mazangwarmay tayábá beraw o nahigé ápá dawr beday, hamá máhig ke pésará nahigá jant, áiay dapá pach kan, taw yak chárkaldári^g zarré genday, hamáiá bezur, manig o watí songá porr kan.”

Mazani chi ent?

(Markás 9:33–37; Luká 9:46–48)

18 ¹Hamá wahdá morid Issáay kerrá átkant o jostesh kort: “Bárén, ásmáni bádsháhiá sajjahénáni master o kamásh kay ent?” ²Issáyá kasánén chokké tawár kort, áyáni nyámá óshtárént o ³gwashti: “Shomárá rásténa gwashán, agan shomá watá badal makanét o kasánén chokkáni paymá mabét, hechbar ásmáni bádsháhiá pád ér korta nakanét. ⁴Paméshká harkas watá é chokkay dhawlá békebr bekant, ásmáni bádsháhiá hamá cha sajjahénán mastera bit. ⁵Harkas pa mani námá, gón washwáhagi é dhawlén chokké wati gwará bedárit, bezán áiá maná dáshtag.

Radiáni sawabsáz

(Markás 9:42–48; Luká 17:1–2)

⁶“Harkas, cha é kasánokénán ke mani sará báwarmand ant yakkéá dém pa gonáhá bebárt, pa áiá gehter ent ke jenteri táé áiay gardená bebandant o daryáay johlánkián chagal bedayant. ⁷Zár o wáwaylá pa é donyáyá ke gomráhiáni sawab ent. Nabit ke mardom rad majant o thagal mawárt, bale apsóz pa hamá kasá ke radiáni sáchók o sawabsáza bit.

⁸“Agan tai dast yá pád tará dém pa gonáhá bebárt, áiá borr o dawr day, chiá ke gón doén dast o pádán tahtarunay dáemi ásá kapagay badalá, pa taw sharter hamesh ent ke lang o mondh, namiránén zenday wáhond bebay. ⁹Agan tai chamm tará dém pa gonáhá bebárt, áiá ham dar kan o dawr day, chiá ke gón doén chammán dózohay ásá kapagay badalá, pa taw sharter hamesh ent ke gón yak chamméá namiránén zenday wáhond bebay.

Gárén mésh

(Luká 15:3–7)

¹⁰“Hozzhár bét. Cha é kasánénán yakkéá ham kamarzesh mazánét o ér majanét. Man shomárá gwashán ke ásmáná esháni préshtag, modám mani ásmáni Petay chehrágá gendant. ¹¹Ensánay chokk pa gonahkár o gárénáni rakkénagá átkag.^h ¹²Shomá ché gwashét? Agan kaséá sad mésh bebit o cha áyán yakké gár bebit, gorhá nawad o nohén méshán kóhá yalaha nadant o gárén méshay shóházá narawt? ¹³Shomárá rásténa gwashán, agan gárén méshá dar begéjít, cha á nawad o nohén gár nabutagénán, pa eshiá géshter gal o shádehia kant. ¹⁴Hamé paymá, shomay ásmáni pet cha é kasánénán yakkéay gár bayagá ham razá nabit.

Gón radkárén brátá

¹⁵“Agan tai brát radiéⁱ bekant, beraw o mán halwatá cha á gonáhá sahigi bekan, agan tai habari gósh dásht, gorhá bezán tará wati brát raset. ¹⁶Bale agan tai habari namannet, gorhá yak o do kas hamráh bekan, chiá ke: *har chizay rásti, gón do yá say mardomay sháhediá paddar kanag bebit.*^j ¹⁷Agan áyáni habari namannet, gorhá kelisáyá hál beday, bale agan kelisáy habari ham gósh nadásht, gorhá áiá nábáwaráni dhawlák^k bezán. ¹⁸Shomárá rásténa gwashán, harché ke shomá zeminay sará makana kanét, ásmáná ham makan kanaga bit, harché ke shomá zeminay sará rawá kanét, ásmáná ham rawá kanaga bit. ¹⁹Man shomárá é ham gwashán, agan zeminay sará cha shomá do kas, pa hamdeli o tepák chizé belóthit, har wáhagé ke bebit, cha mani ásmáni Petay némagá áyána rasit. ²⁰Chiá ke har jáh do yá say kas mani námay sará hór bebit, man gón áyán góna bán.”

^{817:27} Asligén Yunáni nebeshtánka gwashit: “stater”, bezán chár derham.

^{h18:11} Lahtén daznebeshtá band 11 néstent.

^{i18:15} Lahtén daznebeshtá átkag: “gón taw badié bekant”.

^{j18:16} Bechár: Sharyatay Domi Rahband, bahr 19, band 15.

^{k18:17} Asligén Yunáni nebeshtánka gwashit: “darkawm o songiáni dhawlá”.

Námehrabánén hezmatkárav mesál

(Luká 17:3–4)

²¹ Hamá wahdá Petrosá cha Issáyá jost kort: “Oo Hodáwand! Agan mani brát gón man badi bekant, gorphá tán chont randá man áiá pahell bekanán? Tán hapt randá?” ²² Issáyá passaw dát: “Man tará gwashán, hapt randá na. Haptá, haptád randál hesáb kan o bebakshi.

²³ “Chiá ke ásmáni bádsháhi, hamá bádsháhay dhawlá ent ke cha wati golámán hesáb geragi lóthet. ²⁴ Wahdé hesáb geragá lagget, yak mardé áiay démá áwortesh ke lakkáni lakk^m wámdár at, ²⁵ bale áiá wám dát nakortant. Paméshká hodábondá parmán kort ke á wat gón jan o chokkán o dega harché ke áiá hastat, bahá kanag o wám gerag beabant. ²⁶ Golám áiay pádán kapt o mennat o zári kort o gwashti: ‘Maná móh beday, tai sajjahén wámána dayán.’ ²⁷ Hodábondá golámay sará bazzag but, cha á wámán sar gwast o ázáti kort.

²⁸ “Bale wahdé á golám dhanná dar átk, wati hamkárén golámi dist ke áiay sad dináray wámdár at, dasti gotthá sakk dátant o gwashti: ‘Mani wámán beday.’ ²⁹ Áiay pádán kapt o mennat o zári kort o gwashti: ‘Maná móh beday, tai sajjahén wámána dayán.’ ³⁰ Bale áiá namannet o tán wámáni dayagá jélá bandi kort. ³¹ É dega golám cha é sargwastay gendagá báz delranj butant o sajjahén hál o habaresh pa wati hodábondá sar kort. ³² Gorphá hodábondá á golám lóthet o gwashti: ‘Oo radkárén golám! Man wám tará paméshká bakshetant ke taw gón man báz mennat o zári kort. ³³ Anchosh ke maná tai sará bazzag butagat, tará ham báyad wati wámdáray sará bazzag butén.’ ³⁴ Hodábond zahr gept o á golámi tán sarjamén wámáni dayagá band kanáént. ³⁵ Nun agan shomá wati brátá pa del mabakshét, mani ásmáni pet ham gón shomá hamé dhawlá kant.”

Sur o sawnay bárawá

(Markás 10:1–12)

19 ¹ Wahdé Issáyá é habar halás kortant, Jalilay damagi yalah dát o dém pa Yahudiahay hamá hand o damagá shot ke Ordonay kawray domi pahnátá ent. ² Mardománi mazanén rombé áiay randá gón at o Issáyá ódá áyáni nádráhén mardom dráh kortant.

³ Lahtén Parisi, Issáyay chakkáságá áiay kerrá átk o jostesh kort: “Bárén, pa mardá rawá ent ke wati janay talák o sawnán bedant, sawab toré harché bebit?” ⁴ Passawi tarrént: “Shomá nawántag ke Hodáyá jahánay jórhénagay wahdá ensán mardén o janén addh kortagⁿ o ⁵ gwashtagi: *Paméshká, mard cha wati pet o mátá jetá o gón wati janá hór o yakjáha bit. Mard o jan, yak jesm o jána bant.*^o ⁶ É paymá, nun á do naant, yak jesm o jáñ ant. Paméshká, á ke Hodáyá yakk kortagant, ensán áyán jetá makant.” ⁷ Jostesh kort: “Gorphá parchá Mussáyá parmán dáttag ke mard pa wati janay sawn dayagá, áiá taláknámahé bedant o begisshéniti?” ⁸ Issáyá passaw dát: “Mussáyá shomay sengdeliay sawabá janénáni sawn dayag rawá kortag, cha bongéjá é dhawl nabutag. ⁹ Shomará gwashán: Harkas cha zenahkáriá abéd, pa dega sawabéá wati janénay sawn o talákán bedant o gón dega janénéá sur o sáng bekant, bezán zená kanagá ent.”

¹⁰ Moridán gwasht: “Agan mard o janay nyámá jáwar é dhawlá ent gorphá sur nakanag sharter ent.” ¹¹ Gwashti: “É tálimá harkas zorta nakant, hamá kas zorta kant ke áiá é wák o twán bakshag butag. ¹² Lahtén sur korta nakant chiá ke cha mátay lápá é dhawl péda butag, lahtén cha mardománi dastá anchosh butag o lahtén pa ásmáni bádsháhiá cha sur o árósá sara gwazit. Agan kasé é habará saggit, hamé dhawlá bekant.”

Issá o kasánén chokk

(Markás 10:13–16; Luká 18:15–17)

¹³ Á wahdá kasánén chokkesh Issáyay kerrá áwortant ke wati dastá áyáni sará per bemoshit o dwá bekant, bale moridán neherr o hakkal dátant. ¹⁴ Issáyá gwasht: “Chokkán bellét mani kerrá byáyat, áyáni démá madárét, chiá ke ásmáni bádsháhi anchén mardománig ent.” ¹⁵ Nun Issáyá áyáni sará dast per mosht. Gorphá wati ráhi gept o shot.

^l**18:22** Yá “haptád o hapt randá”.

^m**18:24** Asligén Yunáni nebeshtánka gwashit: “dah hazár tálánt”, bezán 60 milyun róchay pagár.

ⁿ**19:4** Pédáesh 1:27.

^o**19:5** Pédáesh 2:24.

Zardárén warná o namiránén zend

(Markás 10:17–31; Luká 18:18–30)

¹⁶ Padá yak mardé Issáay kerrá átk o josti kort: “Oo ostád! Man kojám nékén kárán bekanán ke namiránén zenday wáhond bebán?” ¹⁷ Issáyá gwasht: “Taw chiá nékiay bárawá cha man josta kanay? ‘Nékén’ tahná yakké, á Hodáay jend ent, agan taw zendmána lóthay, gorhá Hodáay hokmáni sará kár kan.” ¹⁸ Josti kort: “Kojám hokmáni sará?” Issáyá gwasht: “Hón makan, zená makan, dozzi makan, drógén sháhedi maday, ¹⁹ wati pet o mátá ezzat beday, gón wati hamsáhegá wati jenday paymá mehr bekan.”^p ²⁰ Warnáén mardá gón Issáyá gwasht: “É sajjahén man kortagant. Dega kojám kár pasht kaptag?” ²¹ Issáyá passaw dát: “Agan lóthay tamánén ensáné bebay, beraw wati sajjahén mál o hastiá bahá kan o zarrán garib o nézgárén mardománi sará bahr kan, é paymá tará ásmáni ganjé rasit. Gorhá byá o mani randgiriá bekan.” ²² Anchosh ke warnáyá é habar eshkot, báz gamig o paréshán but o shot, chiá ke á sér o azgárén mardé at.

²³ Issáyá gón moridán gwasht: “Shomará rásténa gwashán, pa azgár o máldárén mardomán ásmáni bádsháhiá pád ér kanag sakk grán ent. ²⁴ Haw, shomará gwashán: Suchenay domká oshteray gwazag wa báz grán ent, bale Hodáay bádsháhiá, zardárén mardomay rawag angat gránter ent.” ²⁵ É habaray eshkonagá, morid sakk hayrán butant o watmánwatá gwashtesh: “Gorhá kay rakketa kant?” ²⁶ Issáyá áyáni némagá cháret o gwashti: “Pa ensáná nabuteni ent, bale Hodáay dastá har chiz buta kant.”

²⁷ Gorhá Petrosá gwasht: “Má wati har chiz yalah dátág o tai randgiriá kanagá én, bárén márá ché rasit?” ²⁸ Issáyá gón áyán gwasht: “Shomará rásténa gwashán, hamá nökén donyáyá wahdé Ensánay Chokk wati shán o shawkatay tahtay sará nendit, shomá ke mani hamráh ét, dwázdah tahtay sará nendét o Bani Esráilay dwázdahén kabilaháni dádrasiá kanét. ²⁹ Harkasá pa mani námaygi lóg, brát o gohár, pet omát, chokk yá mál o dhagár yalah dátágant, áiá sad sari géshtera rasit o abadmánén zenday wáhonda bit. ³⁰ Bale bázéné ke awali ent, áheria bit o hamá ke áheri ent awalia bit.

Kárendah o mozz

20 ¹ “Ásmáni bádsháhi, bágéay hamá hodábonday paymá ent ke pa wati anguri bágá, kárendahay shóházá máhallah dar kapt. ² Áiá, róchmozz yak dináré gisshént o kárendah pa kárá bágá rawán dátant. ³ Kesás say sáhatá rand^q dar átk o disti lahtén kárendah bázárá békár óshtátag. ⁴ Gwashti: ‘Shomá ham berawét mani bágá kár kanét. Harché ke shomay hakka bit, shomará dayán.’ ⁵ Gorhá á shotant. Padá némróchá^r o dém pa bégáhá^s dhanná dar átk o anchoshi kort. ⁶ Rónenday nazziká^t padá dar átk o disti dega lahtén mardom óshtátag, cha áyán josti kort: ‘Chiá shomá sajjahén róchá békárá óshtátagét?’ ⁷ Gwashtesh: ‘Márá hechkasá kár nadátag.’ Bágay hodábondá gwasht: ‘Shomá ham berawét o bágá kár kanét.’

⁸ “Rónend but o hodábondá gón wati kármasterá gwasht: ‘Godhsari kárendahán beger tán awaligénán, sajjahénáni mozzá beday.’ ⁹ Hamáyán ke rónenday nazziká kár bongéj kortagat, harkasá yak dináré mozz raset. ¹⁰ Randá hamáyáni bárig átk ke pésará káresh bongéj kortagat, áyáni hayál at ke géshteresha rasit, bale áyán ham yak yak dináré raset. ¹¹ Wati mozzesh zort o bágay hodábonday sará norondhagá laggetant o gwashtesh: ¹² ‘Cha sajjahénán o rand átkagén kárendahán yak sáhaté kár kortag o má sajjahén róchá garmi saggetag o kár kortag, bale taw mayg o áyáni mozz barábar kortant.’ ¹³ Bágay hodábondá gón yakkéá gwasht: ‘Oo mani sangat! Man gón taw náhakki nakortag. Taw wat gón man róché yak dináréá namanneteg?’ ¹⁴ Paméshká haminchok ke tai hakk ent bezur o beraw. É mani tab ent ke harché tará dayán, haminchok cha taw rand átkagén kárendahán ham bedayán. ¹⁵ Záná, man wati zarráni master wat naán, har dhawlá ke lóthán gón wati zarrán hamá dhawl bekanán? Yá ke tai chamm mani daspachiá dista nakant?’ ¹⁶ É dhawlá, á ke awali ant, áheria bant o hamá ke áheri ant, awalia bant.”

P19:19 Láwián 19:18.

^q20:3 Asligén Yunáni nebeshtánka gwashit: “saymi sáhatá”, bezán sáhat nohá. Yahudiáni róchay hesáb, sáhat sohbay shashá bongéja but.

^r20:5 Asligén Yunáni nebeshtánka gwashit: “shashomi sáhatá”.

^s20:5 Asligén Yunáni nebeshtánka gwashit: “nohomí sáhatá”, bezán sáhat sayá.

^t20:6 Asligén Yunáni nebeshtánka gwashit: “yázdahomi sáhatá”, bezán sáhat panchá.

Issáay markay saymi péshgói

(Markás 10:32–34; Luká 18:31–34)

¹⁷ Urshalimay rawagay wahdá, ráhá, Issáyá dwázdahén morid yak kerré bortant o gwashti:
¹⁸ “Nun má Urshalimá rawagá én, ódá Ensánay Chokká gerant o mazanén dini péshwá o Sharyatay zánógeráni dastá dayant. Áiay markay hokmá borrant o ¹⁹ darkawmén mardománi dastá dayanti. Darkawmén mardom áiay sará rishkand o maskará kanant, gón hayzarán mána bandant o salibay sará dranjanti. Bale saymi róchá, zendaga bit o jáha jant.”

Náráhén wáhag

(Markás 10:35–45)

²⁰ Hamé wahdá Zebdiay chokkánimát, wati chokkáni hamráhiá Issáay kerrá átk, áiay pádán kapt o lótheti ke pa mennatgiri chizé begwashit. ²¹ Issáyá cha áiá jost kort: “Begwash, ché lóthay?” Gwashti: “Wahdé tai bádsháhia kayt, labz kan ke mani doén chokkán gón wata nendárénay, yakkéá wati rástén o domiá chappén némagá.” ²² Issáyá passaw dát: “Shomá nazánét ché lóthagá ét. Bárén, á jámá ke mana noshán shomá nosheta kanét?”^u Gwashtesh: “Ji haw, má wártia kanén.” ²³ Issáyá gwasht: “Shomará mani jám noshagi ent, bale é mani dastá naent ke kay mani rástén o kay chappén némagá benendit. É jágah hamáyánig ant ke mani Petá pa áyán gisshéntagant.”

²⁴ Wahdé á dega dahén moridán é habar eshkot, doén brátáni sará zahr geptant. ²⁵ Gorhá Issáyá sajjahén morid lóthetant o gwashti: “Shomá zánét ke darkawmáni hákem mardománi sará hákemia kanant o kawmáni master wati chérdastén mardománi sará wati ehtiárá kára bandant. ²⁶ Bale shomá chosh makanét. Cha shomá harkas ke mazania lóthit báyad ent sajjahénáni hezmatkár bebit o ²⁷ cha shomá harkas ke masteria lóthit, shomay kaster o dazbój bebit. ²⁸ Hamé dhawlá, Ensánay Chokk nayátkag ke mardom áiay hezmatá bekanant, átkag ke mardománi hezmatá bekant o gón wati sáhay dayagá, bázénéá berakkéinit.”

Do kórav drahbakshi

(Markás 10:46–52; Luká 18:35–43)

²⁹ Wahdé cha Ariháay shahrá dar áyagá atant, bázén mardomé Issáay randá gón at. ³⁰ Áyáni ráhay sará neshtagén do kórá eshkot ke Issá cha ódá gwazagá ent, kukkáresh kort o gwashtesh: “Oo Hodáwand, oo Dáud bádsháhay chokk! Tará may sará bazzag bát.” ³¹ Mardomán á hakkal dátant o gwashtesh: “Bétawár bét,” bale áyán géshter kukkár kort: “Oo Hodáwand, oo Dáud bádsháhay chokk! Tará may sará bazzag bát.” ³² Issá óshtát o josti kort: “Shomá cha man ché lóthét? Pa shomá ché bekanán?” ³³ Áyán passaw dát: “Oo Hodáwand! Márá biná kan.” ³⁴ Issáyá áyáni sará bazzag but, dasti chammán per moshtant o hamá damáná biná butant o Issáay randá gón kapt o shotant.

Pa Issáay wasshátká

(Markás 11:1–11; Luká 19:28–38; Yuhanná 12:12–15)

21 ¹ Wahdé Urshalimay nazziká átkant o Zaytunay kóhay dámóná Bayt-Pájiay métágá rasetant, Issáyá do morid rawán dát o ² gwashtanti: “Démi métágá berawét, anchosh ke ódá rasét haré gendét ke bastag o korragi ham gón ent, áyán bójét o pa man byárét. ³ Agan kaséá gón shomá chizé gwasht, begwashét: ‘Wájahá pakár ant o randá ráhesha dant.’”^v ⁴ Paméshká é dhawlá but tán hamá chiz ke nabiay zobáná péshgói kanag butag, rást o paddar bebit:

⁵ “Gón Sáhyunay Jeneká begwashét:

‘Nun tai bádsháh tai gwará békebr pédák ent o
haréá, bezán korragéa swár ent.’”^w

⁶ Gorhá morid shotant o hamá paymá ke Issáyá gwashtagat, hamá dhawlá kortesh. ⁷ Áyán har o korrag áwortant, wati shál o cháderesh haráni poshtá ér kortant o Issá swár but. ⁸ Bázénéá wati shál o cháder ráhay sará chérgéján kortant, dega bázén mardoméá drachkáni thál o ták borret o ráhay sará ér kort. ⁹ Issáay péshromb o padrombén mardom, kukkár kanáná gwashagá atant:

^u20:22 Issáay maksad cha jámá wati markay jám, bezán salibay sakki o sóriáni saggag ent.

^v21:3 Yá ke: “Wájahá pakár ant.” Gorhá wáhond dantesh.

^w21:5 Zakariá Nabiay Ketáb, bahr 9, band 9. Sáhyun yak kóhé, ke Urshalimay shahray bonred é kóhay sará ér kanag butag. Sáhyunay Jenek, bezán Urshalimay jahmenendén mardom.

“Hushiáná,^x oo Dáud bádsháhay chokk!

Mobárak bát hamá ke pa Hodáwanday námá kayt,
Hushiáná, borzén arshá.”

¹⁰ Wahdé Issá Urshalimá raset gorhá shór o walwalahé macchet. Shahray mardom jostá atant ke: “É kay ent?” ¹¹ Mocchiay mardomán passaw dát: “É hamá nabi ent, Issá ke Jalilay shahr Náserahay nendóké.”

Cha mazanén parasteshgáhá sawdágeráni dar kanag

(Markás 11:15–18; Luká 19:45–48)

¹² Issá mazanén parasteshgáháy shot o ódá sawdáger o grákáni^z gallénag o dar kanagá goláésh but. Zarr badal kanókén sarrápáni mizz o barónki chappig kortant o kapót bahá kanókáni korsi o tahtagi dawr dátant. ¹³ Gwashti: “Hodáay Ketábá nebisag butag: *mani lóg, dwá o parasteshay jágah bebit*, bale shomá dozzbázáré kanéti.”

¹⁴ Mazanén parasteshgáháy péshjáháy shot o ódá sawdáger o grákáni^z gallénag o dar kanagá goláésh but.

¹⁵ Wahdé mazanén dini péshwá o Sharyatay zánógerán Issáay mójezah o ajekkái distant o é ham distesh ke parasteshgáhá kasánén chokk pa kukkár “Hushiáná, oo Dáud bádsháhay chokk” gwashagá ant, báz nawassh butant o ¹⁶ cha Issáyá jostesh kort: “Eshkonagá ay é chokk ché gwashagá ant?” Gwashti: “Haw! Eshkonagá án. Shomá hechbar nawántag ke:

‘Taw pa wat satá o saná, chokk o shirmechén nonnokáni dapá ham dáttag
ke tará satá bekanant?’^a

¹⁷ Gorhá Issáyá á yalah kortant o cha shahrá dhann dar átk o Bayt-Anyáay métágá wati shapi róch kort.

Enjiray drachkay hoshk bayag

(Markás 11:12–14, 20–24)

¹⁸ Wahdé Issá sabáhá máhallah per tarrag o shahray némagá rawagá at, shodig but. ¹⁹ Ráhay sará enjiray drachké disti, áiay némagá shot bale abéd cha táká dega hecchi nadist. Gorhá gwashti: “Dega baré, hechbar burr o bar makanátay” o hamá damáná drachk gimmort o hoshk but. ²⁰ Eshiy gendagá morid hayrán butant. Jostesh kort: “Chón but ke yak anágat drachk gimmort?” ²¹ Issáyá passaw dát: “Shomará rásténa gwashán, agan shomará báwar ent o delá shakka nayárét, gorhá hamá dhawlá ke man gón enjiray drachká kortag, shomá ham anchosh o angat géshter korta kanét. Agan shomá é kóhá begwashét ke: ‘Watá cha edá chest kan o daryáay tahá dawr beday,’ gorhá hamé dhawlá bit. ²² Agan shomá báwar kanét, harché ke wati dwáyáni tahá lóthét, shomará dayaga bit.”

Issáay ehtiár

(Markás 11:27–33; Luká 20:1–8)

²³ Hamá wahdá ke Issá mazanén parasteshgáháy péshjáháy shot o tálim dayagá lagget, mazanén dini péshwá o kawmay kamásh áiay kerrá átkant o jostesh kort: “Taw gón kojám hakk o ehtiárá é kárána kanay? Kayá tará é káráni kanagay ehtiár dáttag?” ²⁴ Issáyá passaw dát o gwashti: “Maná ham cha shomá josté hast, agan mani jostay passawá bedayét, gorhá shomará gwashán ke gón kojám hakk o ehtiárá é kárána kanán. ²⁵ Shomay hayálá, Yahyáyá cha kojá pákshódi dayagay ehtiár rasetagat, cha ásmáná yá cha ensánay némagá?” Ayán watmánwatá shawr o saláh kort o gwashtesh: “Agan begwashén cha ásmáná at, gorhá márá gwashit: ‘pa ché áiay sará imánó nayáwort?’ ²⁶ Agan begwashén ke cha ensánay némagá butag, gorhá márá cha mardomána torsit chiá ke sajjahén mardomán mannetag ke Yahyá nabié.” ²⁷ Paméshká passawesh dát: “Má nazánén.” Issáyá gwasht: “Gorhá man ham shomará nagwashán ke gón kojám hakk o ehtiárá é kárána kanán.”

Do chokkay mesál

²⁸ “Nun shomá ché gwashét? Yak mardé hastat, áiay do bacch atant. Wati masterén bacchay kerrá shot o gwashti: ‘Oo mani chokk! Maróchi beraw anguri bágá kár kan.’ ²⁹ Áiá passaw dát: ‘Mana

^x21:9 Hushiáná, bezán “márá annun berakkén”.

^y21:12 Péshjáh, bezán péshgáh, lógay chárdivál, sahn.

^z21:12 Grák, bezán á ke sawdá zurit. Arabi o Pársiá “moshtari, kharidár”.

^a21:16 Zabur 8:2.

narawán,’ bale randá pashómán but o shot.³⁰ Gorhá domi bacchay kerrá shot o hamé dhawlá gwashti. Bacchá passaw dát: ‘Ji haw, mani wájah! Mana rawán,’ bale nashot.³¹ Cha é doénán kojám bacchá wati petay habar zort?’ Áyán passaw dát: “Awaligá.” Issáyá gón áyán gwasht: “Báwar kanét, songi o máliátgir o chalandhén janén cha shomá pésar Hodáay bádsháhiá rawant.³² Chiá ke Yahyá pahrézkáriay ráh o rastahá shomay kerrá átk, bale shomá áiay sará báwar nakort, songi o chalandhén janénán áiay sará báwar kort o shomá é chiz gón wati chammán dist, angat pashómán nabutét o báwaró nakort.

Gandahén bágpánáni mesál

(Markás 12:1–12; Luká 20:9–19)

³³ “Dega yak mesálé gósh dárét: Zemindáréá anguri bágé addh kort o áiay chapp o chágerdá pall o pasili bast, pa anguráni shiragay geragá, kall o kombé jórhi kort o pa negahpániá yak borjé ham basti. Randá bági pa konandahkári o zamán^b lahtén bágpánay dastá dát o wat saparéá shot.³⁴ Wahdé anguray mósom but, pa wati bahray geragá, hezmatkári zamánzurén bágpánáni kerrá ráh dátant.³⁵ Bágpánán áiay hezmatkár geptant, yakké latth o kotthesh kort, domi ham jat o kosht o saymiesh sengsár kort.³⁶ Randá, cha pésarigénán géshter hezmatkári ráh dát, bale bágpánán gón áyán ham hamé dhawlá kort.³⁷ Godhsará, wati chokki ráh dát, hayáli kort balkén áiay ruá bedárant.³⁸ Bale wahdé bágpánán áiay chokk dist, watmánwatá gwashtesh: ‘Bágay mirás barók hamesh ent, byáét bekoshéni tán eshiay melk o mirásay hodábond wat bebén.’³⁹ Gorhá gept o cha bágá dhann bort o koshtesh.⁴⁰ Nun wahdé anguray bágay hodábonda kayt, gón é bágpánán ché kant?”⁴¹ Áyán passaw dát: “Á, é badkerdén bágpánán gár o bégwáha kant o bágá dega bágpánáni dastá dant ke áiay bahrá pa wahda dayant.”⁴² Issáyá cha áyán jost kort: “Shomá Hodáay Pákén Ketábán nawántag:

Á seng ke bánbandén ostáyán^c pasond nakort o nazort
hamá seng, bonhesht^d but.

É Hodáwanday kár ent o
gendagá delpasond o dhawldár ent.”^e

⁴³ “Paméshká gón shomá gwashán ke Hodáay bádsháhi, cha shomá pach gerag o yak kawméá dayaga bit ke áiay bar o samará kárit.⁴⁴ Kasé ke hamé sengay sará kapit, thokkor thokkora bit o kasé ke seng áiay sará kapit, hurta bit.”^f

⁴⁵ Wahdé mazanén dini péshwá o Parisián Issáy mesál eshkotant, sarpad butant ke á hamáyáni bárawá habar kanagá at.⁴⁶ Lóthetesh Issáyá dazgir bekanant, bale cha mardomána torsetesh, chiá ke mardománi chammá Issá paygambaré at.

Bádsháhay chokkay árós

(Luká 14:15–24)

22 ¹ Issáyá padá gón mardomán pa mesál o darwar habar kort o gwasht: ² “Ásmáni bádsháhi, hamá bádsháhay paymá ent ke pa wati chokkay árósá mehmánié korti.³ Golámi lóthetagén mehmánáni randá ráh dátant, bale áyáni delá nalóthet byáyant.⁴ Gorhá áiá dega lahtén golám ráh dát o hokmi kort ke gón hamá lóthetagén mardomán begwashant: ‘Shámon tayár kortag, káigar^g o pábondi^h gwaskⁱ helár kanag butagant o har chiz tayár ent, byáét árósay mehmániá gón bebét.’⁵ Bale parwáhesh nakort o harkas wati káray némagá shot, yakké dhagáráni némagá o yakké dém pa wati sawdágeriá.⁶ Á degarán áiay golám gept o sobakk o béezzat kort o koshtant.⁷ Bádsháh sakk zahr gept o pa hónigáni janag o áyáni shahray sóchagá sepáhigi ráh dátant.⁸ Gorhá gón wati golámán gwashti: ‘Árósay mehmáni tayár ent, bale hamá ke lóthag butagatant, áyagay láhek naatant.⁹ Paméshká berawét chárráháni sará harkasá ke gendét, áyán mani mehmániá byárét.’

^b21:33 Konandahkári o zamán, bezán paymánkári, ejáray sará, thékah.

^c21:42 Bánbandén ostá hamá ent ke lógay bandagá zántkár ent.

^d21:42 Bonhesht, bezán lógay awali hesht yá seng.

^e21:42 Zabur 118:22–23.

^f21:44 Lahtén daznebeshtá band 44 nést.

^g22:4 Káigar, bezán mazanén narén gók.

^h22:4 Pábondi, bezán hamá pas o gók ent ke pa helár kanagá lógay dapá dáranti.

ⁱ22:4 Gwask, bezán gólu, gókay chokk.

¹⁰ Bápsháhay golám shotant o sharr o gandah, harkasesh ke dist, sajjahénesh yakjáh kort o áwortant o árosay tálár cha mehmáná porr but.

¹¹ “Nun wahdé bápsháh mehmánáni cháragá átk, yak anchén mardé disti ke suri godi gwará naat.

¹² Bápsháhá cha áiá jost kort: ‘Hambal! Bé suri pósháká, taw chón tóká potertagay?’ Bale áiá hech passaw dát nakort. ¹³ Gorhá bápsháhá gón wati golámán gwasht: ‘Eshiay dast o pádán bandét o dhanná taháriá dawr bedayét.’ Ódá gréwant o dantán pa dantána droshant. ¹⁴ Chiá ke lóthettagén báz ant, bale gechén kortagén kamm.”

Máliátay bárawá

(Markás 12:13–17; Luká 20:20–26)

¹⁵ Hamé wahdá Parisi shotant o anchén pandal o repké kortesh ke Issáyá chón cha áiay jenday habarán mán begisshénant o dámá dawr bedayant. ¹⁶ Nun lahtén shágerdesh gón Hirudiáni^j hamráhiá áiay kerrá rawán dát tán begwashant: “Oo ostád! Má zánén ke taw tachk o rástén mardomé ay o Hodáay ráhá pa rástiá sója dayay o hechkaséay némagá nageray, chiá ke sajjahénán pa yak chamméá cháray. ¹⁷ Márá begwash, tai hayálá Rumay bápsháh Kaysará song o máliát dayag rawá ent yá na?” ¹⁸ Issáyá áyáni gandahén pegr zánt o gwashti: “Oo dopóstén shatalkárán! Chiá maná chakkásagá ét? ¹⁹ Cha hamá zarrán ke pa máliátá dayant, yakké maná pésh bedárét.” Áyán yak dináré pésh kort. ²⁰ Issáyá cha áyán jost kort: “Eshiay sará kai nám o naksh per ent?” ²¹ Gwashtesh: “Kaysaray.” Nun Issáyá darráént: “Gorhá Kaysaraygá Kaysará bedayét o Hodáaygá Hodáyá bedayét.” ²² É habaráni eshkonagá á hayrán butant o Issáesh esht o shotant.

Áherat o ság o sur

(Markás 12:18–27; Luká 20:27–40)

²³ Randá, lahtén Saduki ke áheratay namannók ant, Issáyay kerrá átk o jostesh kort: ²⁴ “Oo ostád! Mussáyá gwashtag: ‘Agan kasé bé poshtpadá bemerit, báyad ent áiay brát gón áiay janózámá sur bekant, tán pa wati brátá rand o ráhé bellit.’^k ²⁵ May némagá hapt brát hastat. Awali brátá sur kort, bé chokká mort o wati jani pa á dega brátá esht. ²⁶ Padá gón domi o saymi tán haptomiá anchosh but. ²⁷ Godhsará, á janén ham mort. ²⁸ Nun taw begwash, áheratay róchá é janén cha haptén brátán kojám brátayga bit? Chiá ke sajjahén brátán bárig bárigá gón áiá sur kortagat.”

²⁹ Issáyá passaw dát: “Shomá rad wártag, chiá ke na cha Pákén Ketábán chizé sarkecha warét o na Hodáay wák o zórá sarpada bét. ³⁰ Áheratá, na kasé sura kant o na sur dayaga bit, ásmáni préshtagáni dhawlá bant. ³¹ Mordagáni padá zendag bayag o jáh janagay bárawá, záná shomá hamá habar nawántag ke Hodáyá shomára gwashtagat: ³² Man án, Ebráhémay Hodá, Eshákay Hodá o Ákubay Hodá?^l Bezán á, mordagáni Hodá naent, zendagénáni Hodá ent.” ³³ Mardom cha Issáy é habaráni eshkonagá hayrán o habakkah butant.

Masterén hokm

(Markás 12:28–34; Luká 10:25–28)

³⁴ Wahdé Parisi sahig butant ke Issáyá chón gón wati passawá Sadukiáni dap bastag, gorhá hór but o átkant. ³⁵ Cha áyán yakkéá, ke Sharyatay kázié at, pa Issáyay chakkásagá cha áiá jost kort:

³⁶ “Oo ostád! Sharyatay masterén hokm kojám ent?” ³⁷ Issáyá passaw dát:

“Wati Hodáwandén Hodáyá pa del, gón sajjahén jáñ o sáh o gón sajjahén pahm o pegrá dóst bedár.”^m

³⁸ Cha sajjahénán masterén o awali hokm hamesh ent. ³⁹ Domi hokm ham, hameshiay dhawlá ent: Gón wati hamsáhegá wati jenday paymá mehr bekan.ⁿ ⁴⁰ Hamé doén hokm, Mussáyay Sharyat o sajjahén nabiáni parmánáni bonyád ant.”

^j22:16 Hirudi, bezán Hirudis bápsháhay dóstwáh.

^k22:24 Sharyatay Domi Rahband 25:5 o rand.

^l22:32 Dargwaz 3:6.

^m22:37 Sharyatay Domi Rahband 6:4 o rand.

ⁿ22:39 Láwián 19:18.

Issá kai chokk ent?

(Markás 12:35–37; Luká 20:41–44)

⁴¹ Hamé wahdá ke Parisi yakjáh mocch atant, Issáyá cha áyán jost kort: ⁴² “Masihay bárawá shomá ché gwashét? Á kai chokk ent?” Áyán passaw dát: “Dáud bádsháhay chokk ent.” ⁴³ Nun gwashti: “Gorhá chiá Dáud cha Pákén Ruhay shobén o elhámá, áiá wati Hodáwanda zánt, wahdé gwashit:

⁴⁴ Hodáwandá gón mani Hodáwandá^o gwasht:

‘Mani rástén némagá benend

tán á wahdé ke tai dozhmenán tai pádáni chérá dawr bedayán.’^p

⁴⁵ “Nun agan Dáud, Masihá wati Hodáwanda gwasht, gorhá Masih chón áiay chokk buta kant?”

⁴⁶ Hechkasá áiay habaráni passaw dát nakort o cha á róchá o rand, kaséá ham cha áiá jost kanagay del o joryat néstat.

Issá, Parisi o Sharyatay zánógerán páshka kant

(Markás 12:38–40; Luká 11:37–52; 20:45–47)

23 ¹ Á wahdá Issáyá gón mocchiay mardomán o wati moridán habar kort o gwasht: ² “Sharyatay zánóger o Parisi, Mussáay jáhá neshtagant. ³ Paméshká harché ke shomárá tálima dayant, áyáni habarán bemannét o á habaráni randgiriá bekanét, bale áyáni dhawlá mabét, parchá ke harché á tálima dayant, wat á dhawlá nakanant. ⁴ Anchén gránén bára bandant o mardománi kópagá laddhant ke chest kanaga nabant, bale wat pa áyáni chest kanagá lankok o mórdánagé^q ham nasorénant. ⁵ Á harché ke kanant, pa mardománi pésh dáragá kanant o bass. Wati táitán^r mazana kanant o kabáhay lambán drájkassh.^s ⁶ Mehmánián, awali reday nendagesh dóst ent o kanisaháni sharterén jáhán gechéna kanant. ⁷ Bázáráni tarr o garday wahdá lóthant ke mardom áyán wasshátk o drahbát begwashant o ‘rabbi’^t tawár bekanant. ⁸ Bale maylét mardom shomará ‘ostád’ begwashant, chiá ke shomárá tahná yak ostádé hast o sajjahén yakdomiay brát ét. ⁹ Shomá é donyáyá hechkasá ‘pet’ tawár makanét chiá ke shomárá yak Peté hast, hamá ke ásmáná ent. ¹⁰ Shomárá hechkas ‘tálím dayók’ magwashit, chiá ke shomárá yak tálím dayóké hast o á Masih ent. ¹¹ Á ke shomay nyámá cha sajjahénán master ent, hamá á degaráni hezmatkár bebit. ¹² Chiá ke harkas watá mazana zánt o lékit, kamsharapa bit o harkas watá jahl o érdasta mannit, washnám o sharapdára bit.

¹³ “Bale bazhn o apsóz pa shomá, oo Sharyatay zánógerán o Parisián! Oo dopóstén shatalkárán! Shomá mardománi démá ásmáni bádsháhiay darwázagá banda kanét, na wata poterét o na degarána kellét. ¹⁴ Bale bazhn o apsóz pa shomá, oo Sharyatay zánógerán o Parisián! Oo dopóstén shatalkárán! Shomá janázámáni lógán gón málwáriá barét o pa pésh dáragá, wati dwá o sanáyán drájkassha kanét, shomárá sakterén sezá o padmozza rasit.^u ¹⁵ Bazhn o apsóz pa shomá, oo Sharyatay zánógerán o Parisián! Oo dopóstén shatalkárán! Shomá pa yak mardoméay Yahudi kanagá,^v hoshki o daryáyán sát o sapara kanét, bale wahdé kasé shomay hambáwara bit, gorhá áiá cha wati jendá do sari badter o dózohay chokka kanét.

¹⁶ “Oo kórén rahshónán! Bazhn o apsóz pa shomá ke mardomán sója dayét: ‘Agan kasé mazanén parasteshgáhay sawgandá bwárt parwáh nést, bale agan yakké parasteshgáhay teláh o tangawáni sawgandá bwárt, gorhá báyad ent wati sawgandá purah bekant.’ ¹⁷ Oo kamzántén kórán! Kojám chizay darajat borzter ent, tangaw o teláháni yá parasteshgáhay? Teláh o tangaw, paméshká pák o palgár ant ke parasteshgáhá ér ant. ¹⁸ Shomá chosh ham gwashét ke: ‘Agan kasé korbánjáhay sawgandá bwárt hech parwáh nést, bale agan kasé korbánjáhay korbánigay sawgandá bwárt, gorhá báyad ent wati sawgandá purah bekant.’ ¹⁹ Oo kórén mardomán! Kojám chizay darajat borzter ent, korbánigay yá korbánjáhay? Korbánig paméshká pák o palgár zánaga bit ke korbánjáhay korbánig

^{o22:44} “Mani Hodáwand”, bezán Issá Masih.

^{P22:44} Zabur 110:1.

^{q23:4} Mórdánag, bezán lankok, band o bóg.

^{r23:5} É táit Tawrátay nebeshtagén band ant ke póstén hokkahay tahá pósh kanag o básk o péshánigá bandaga bant.

^{s23:5} Yahudi kabáhay lambáni sará bandikka bandant, ke Hodáay hokmáni yátá bebant.

^{t23:7} Rabbi, bezán ostád.

^{u23:14} Lahtén daznebeshtá band 14 néstent.

^{v23:15} Yahudi kanag, bezán darkawmén mardoméá pa Yahudiáni báwaray manmagá razá kanag.

kanaga bit.²⁰ Paméshká kasé ke korbánjáhay sawgandá wárt, bezán korbánjáh o korbánig kortagén sajjahén chizáni sawgandá wárt.²¹ Harkas ke mazanén parasteshgáhay sawgandá wárt, bezán parasteshgáh o áiay jahmenenday sawgandá wárt.²² Harkas ke ásmánay sawgandá wárt, Hodáay taht o á taht nendókay sawgandá wárt.

²³ “Bazhn o apsóz pa shomá, oo Sharyatay zánógerán o Parisián! Oo dopóstén shatalkárán! Shomá purchénk, gwátag o zirragay dahyakká kasshét o Hodáay námá dayét bale cha Sharyatay dega masterén hokmán bezán dádrasi o ensáp, rahmdeli o wapádáriá béhayál o bétránag butagét. Drégatá,^w shomá é kár bekorténant o á ham yalah madáténant.²⁴ Oo kórén rahshónán! Shomá passhagá kamaká géchét o dara kanét, bale oshterá éra barét.²⁵ Bazhn o apsóz pa shomá, oo Sharyatay zánógerán o Parisián! Oo dopóstén shatalkárán! Shomá warí pyálah o darpáni dhanni némagá sáp o sallaha kanét bale áyáni tal o tók sell ent. Shomay del o darun ham cha lálech o tamah o běpahréziá porr o sell ent.²⁶ Oo kórén Parisi! Pésará warí pyálahay tóká sapá kan, dhanni némagá á wat pák o sallaha bit.

²⁷ “Bazhn o apsóz pa shomá, oo Sharyatay zánógerán o Parisián! Oo dopóstén shatalkárán! Shomá espétén gach jatagén kabráni paymá ét ke sarzáherá dhawldár ant, bale tóká, cha mordagáni haddh o har paymén gand o gasarhá porr ant.²⁸ Hamé dhawlá shomá ham sarzáherá mardománi chammá tachk o pahrézkárén mardom ét bale shomay del cha shatalkári o náshariá^x sarréch ent.

²⁹ “Bazhn o apsóz pa shomá, oo Sharyatay zánógerán o Parisián! Oo dopóstén shatalkárán! Shomá nabiáni kabráni sará gombod o addiraha bandét o pahrézkárani kabrána sambahénét o dhawldára kanét.³⁰ Chosh ham gwashét ke: ‘Agan má warí pet o pirokáni wahd o bárigá buténén, gorhá paygamaráni kosht o kóshá gón áyán hamráh nabutagatén.’³¹ É dhawlá warí bárawá sháhedia dayét o mannét hamáyáni nasl o óbádag ét ke paygambaresh koshtagant.³² Bale hamá kár ke shomay pet o pirokán bongéj kortag, shomá áyán sarjam bekanét.³³ Oo márán, oo syahmárzádagán! Shomá chón cha tahtarunay sezáyá rakketa kanét?

³⁴ “Man, paygamaráni o Sharyatay zánóger shomay kerrá ráha dayán, shomá cha áyán lahténá koshét o saliba kasshét, dega lahténá warí kanisahán hayzarána janét o shahr pa shahra táchénét.³⁵ Gorhá cha Hábilá beger tán Barakiáay chokk Zakariáyá, ke shomá mazanén parasteshgáh o korbánjáhay nyámá kosht, é sajjahén pahrézkárani hón ke jaháná réchag butag, shomay gardená bit.³⁶ Shomárá rásténa gwashán, é sajjahénáni kóshay sezá hamé zamánagay mardomána rasit.

Pa Urshalimá Issáay gam o andóh

(Luká 13:34–35)

³⁷ “Urshalim, oo Urshalim! Taw paygamarána koshay o Hodáay ráh dáttagénán sengsára kanay. Báz randá man lóthetag tai chokkán warí kerrá mocch o yakjáh bekanán, anchosh ke nekénkén morgé chureg o chippokán warí bál o bánzoláni chérá moccha kant, bale shomá nalóthet.³⁸ Nun shomay lóg wayrán, shomay warí dastá yalah dayaga bit.³⁹ Shomárá gwashán, dega baré maná nagendét tán á wahdá ke warí zobáná begwashét: ‘Mobárák bát hamá ke pa Hodáwanday námá kayt.’”^y

Mazanén parasteshgáhay wayráni

(Markás 13:1–2; Luká 21:5–6)

24 ¹ Issá cha mazanén parasteshgáhá dar áyagá at ke morid átkant tán áiay delgósh o chamshánká pa parasteshgáhay jágha o márhiáni nedáragá^z betarrénant.² Issáyá gón áyán gwasht: “É sajjahénán gendagá ét? Shomárá rásténa gwashán, yak sengé ham domi sengay sará namánit, sajjahénána próshant o karójant.”

^w23:23 Drégatá, bezán dréch, Pársia “káshki”.

^x23:28 Náshari, bezán Sharyatay hokmáni sará kár nakanag.

^y23:39 Zabur 118:26.

^z24:1 Nedárag, bezán sayl, tamáshá.

Goddhi zamánagay nesháni

(Markás 13:3–13; Luká 21:7–19)

³ Hamá wahdá ke Issá Zaytunay kóhay sará neshtagat, áiay morid pa halwat o ehwaté^a átkant o jostesh kort: “Begwash bárén, é prosht o prósh kadéna bit o tai bádsháhiay áyag o donyáay halásiaj nesháni, chi ent?” ⁴ Issáyá passaw dátant: “Hozzhár bét kasé shomará gomráh makant. ⁵ Chiá ke bázéné mani námá kayt o gwashit: ‘Man hamá Masih án’ o bázénéá gomráha kant. ⁶ Jangáni kukkárá eshkonét o áyáni hál o habar shomay góshána kapit bale matorsét o paréshán mabét. Allam é dhawlá bit, bale angat halásiaj wahd nayátkag o pa sar narasetag. ⁷ Yak kawmé dega kawméay sará o yak hokumaté dega hokumatéay sará páda kayt. Bázén molk o jágahán dhokkál o kahta kapit o zelzelah o zeminchandha bit. ⁸ Bale é sajjahén, tahná zank o záyagay dardáni bongéj o shoruhát ant.

⁹ “Á wahdá shomará gerant o sakki o sóriáni ámácha kanant o koshant ham o donyáay sajjahén kawm, mani námay sawabá cha shomá naprata kanant. ¹⁰ Gorhá bázéné poshtá kenzt o cha ráhá thagalit, yakké domiá dróhit o kast o kénaga kant. ¹¹ Bázén drógén paygambar jáha janant o bázénéá gomráha kanant. ¹² Cha gomráhi o náshariá, bázén mardománi nyámá mehr o dósti kamma bit. ¹³ Bale hamá ke tán áherá sakkiána saggit, á rakkít. ¹⁴ Hodáay bádsháhiay mestágay jár, sajjahén donyáyá janaga bit, tán pa sajjahén kawmán sháhedié bebit, gorhá donyáay halási sara rasit.

Torsnákén wahd o jáwar

(Markás 13:14–23; Luká 21:20–24)

¹⁵ “Wahdé shomá á ‘palit o bérán kanókén bazhnáká’^b gendét, hamá ke Dániál nabiá áiay bárawá habar kortag ke á pákén jágahá óshtátag,” wánók bezánt o sharr sarpad bebit, ¹⁶ “hamá ke Yahudiahá ant dém pa kóhán betachant. ¹⁷ Hamá ke bán o bádgiray sará ent, wati ord o poténkáni zuragá jahlá ér makapit o lógá marawt o ¹⁸ hamá mardom ke dhagáráni sará kesht o keshárá ent, wati kabáhay zuragá per matarrit. ¹⁹ Á róchán, apszóz pa lápporr o chokmátén janénán. ²⁰ Dwá bekanét ke shomay tachag o dar rawag, zemestán yá Shabbatay róchá mabit. ²¹ Chiá ke hamá róchán, anchén gránén sakki o sórié kapit ke áiay mesál cha jahánay jórh bayagá tán é wahdá nayátkag o hechbar ham nayayt. ²² Agan á sakkiáni róch kamter kanag mabuténant, hech mardomé narakketagat, bale pa gechén kortagénáni háterá, á róch kamter kanaga bant.

²³ “Á wahdá, agan kasé shomará begwashit: ‘Bechár, Masih edá ent’ yá ‘Bechár, ódá ent,’ báwar makanét. ²⁴ Chiá ke drógén Masih o drógén nabi jáha janant o mazanén nesháni o ajekkái pésha dárant. Wati sajjahén zórá janant ke gechén kortagénán ham gomráh bekanant. ²⁵ Man cha é jáwaráni bayagá pésar shomará hál dáttag. ²⁶ Gorhá, agan wahdé mardom shomará begwashant: ‘Bechárét, gyábáná ent,’ ódá marawét, yá ke begwashant: ‘lögay tahá ent,’ báwar makanét. ²⁷ Chiá ke Ensánay Chokk anchén grókéay paymá kayt ke cha ródarátká beger tán rónendá shahma dant o gendaga bit. ²⁸ Har jáh ke mortagén sáhdáréay jóna bit, ódá gittó^c o dhundhwárén morg moccha bant.

Issáay per tarrag

(Markás 13:24–31; Luká 21:25–33)

²⁹ “Á rócháni sakki o sórián o rand, yak anágat róch tahára bit, máha nadrapshit o máhekánia nabit, estár ham cha ásmáná kapant o ásmáni zór o wák, larzénag o jolgoménagá^d bant. ³⁰ Á wahdá, Ensánay Chokkay nesháni ásmáná paddara bit o donyáay sajjahén kawma gendant ke Ensánay Chokk, gón mazanén wák o twán o shán o shawkaté jambaráni sará kayt o paddara bit, nun gréwant o mótká kárant. ³¹ Gón karnáay borzén tawárá wati préshtagán ráha dant ke áiay

^a24:3 Pa halwat o ehwaté, bezán dega kasé mazánt.

^b24:15 “Palit o bérán kanókén bazhnák” yak chizé ke nabáyad ent mazanén parasteshgáhá byayt. Dániál nabiay péshgoí hamá wahdá sarjam but ke 167 Péshmiládá Suriahay hákemá mazanén parasteshgáháy tahá bot jághá dát o hukki korbánig kort. Issá edá gwashit ke padá ham anchén “palit o bérán kanókén bazhnáké” kayt.

^c24:28 Gittó yak morgé ke dhundh, bezán gahetagén jóna wárt.

^d24:29 Jolgoménag, bezán cha boná sorénag o larzénag.

gechén kortagén mardomán, cha donyáay chárén kondhán, bezán cha zeminay hand o damagán tán ásmánay goddhi marz o simsarán, mocch o yakjáh bekanant.

³²“Nun cha enjiray drachká dars o sabak begerét, anchosh ke áiay thál narma bant o táka trakkant, gorhá zánét ke garmágay mósom nazzik ent. ³³ Hamé dhawlá, wahdé é sajjahén chizána gendét, wata zánét ke mani áyagay wahd nazzik ent o darwázagay dapá rasetagán. ³⁴ Shomará rásténa gwashán, tán é sajjahén jáwar mayáyant é nasl o padréch halása nabit. ³⁵ Zemin o ásmán gára bant, bale mani habar hechbar gár o zyána nabant.

Hozzhár o ágáh bebét

(Markás 13:32–37; Luká 12:42–46; 17:26–30, 34–36)

³⁶“Hechkasa nazánt ke á róch o sáhat kadén sara rasit, na ásmánay préshtaga zánant o na chokk, tahná Peta zánt o bass. ³⁷ Hamá dhawlá ke Nuhay bárigá butag, Ensánay Chokkay áyagay róch ham anchosha bit. ³⁸ Chiá ke cha hár o tuppáná pésar, tán hamá róchá ke Nuh bójigá swár but, mardomán wártag o noshetag o sáng o sur kortag. ³⁹ Á hecch sahig naatant tán hár o tuppán átk o sajjahén mardomi gár o hármal kortant. Ensánay Chokkay áyagay wahdá ham hamé dhawlá bit. ⁴⁰ Á wahdá, do mardom kesháráni sará kárá bit, yakké baraga bit o domi hamódá pasht géjaga bit.^e ⁴¹ Do janén jenteray sará dánay droshagá bit, yakké baraga bit o domi hamódá pasht géjaga bit. ⁴² Shomá nazánét ke shomay Hodáwand kojám róchá kayt. Paméshká sár o hozzhár bét. ⁴³ Shomá sharra zánét, agan lögay hodábondá bezántén ke dozz shapay kojám wahd o pásá kayt, gorhá ágáh butagat o dozzi wati lögá pa dozziá naeshtagat. ⁴⁴ Hamé paymá tayár bét, chiá ke Ensánay Chokk anchén wahdéá kayt ke shomá áiay entezár o wadárá nabét.

⁴⁵“Kay ent hamá wapádár o shiwárén hezmatkár ke hodábond áiá wati é dega sajjahén hezmatkáráni master bekant tán áyán pa wahd ward o warák bedant. ⁴⁶ Bahtáwar ent hamá hezmatkár ke wahdé hodábonda kayt, áiá hamá káráni sará gendit. ⁴⁷ Shomará rásténa gwashán, hodábond hamá hezmatkárá wati sajjahén mál o hastiay kármastera kant. ⁴⁸ Bale agan hezmatkár gandah o radkáré bebit o wati delá begwashit ke: ‘Hodábond áyagá déra kant’ o ⁴⁹ paméshká wati hamkáráni latth o kotth kanagá bongéj bekant o gón sharábián ward o noshá bebit, ⁵⁰ áiay hodábond anchén róch o sáhatéá kayt o rasit ke á nazánt o wadárá naent. ⁵¹ Gorhá hodábond áiá thokkor thokkora kant o shatalkáráni nyámá dawra dant. Ódá gréwant o dantán pa dantána droshant.

Dah neshtagén janénchokkay mesál

25 ¹“Á wahdá ásmáni bádsháhi, hamá dahén neshtagén janénchokkáni paymá bit ke wati cherágesh zortant o sálónkay péshwáziá dar kaptant. ² Cha áyán panch nádán atant o panch dáná. ³ Nádánén jenekán wati cherág zortant bale gón wat thélesh nabort gón. ⁴ Dánáén jenekán cherágán o abéd, théldánáni tahá ham gón wat thél bort gón. ⁵ Sálónká áyagá dér kort, paméshká á sajjahén kóchandhán wáb kaptant. ⁶ Shapnémá kukkár macchet ke: ‘Hayyá byáét, sálónk pédák ent o wasshátki kanét.’ ⁷ Gorhá á sajjahén ágáh butant o wati cherágáni sharr kanagá laggetant. ⁸ Nádánén jenekán gón dánáén jenekán gwasht: ‘Cha wati thélán kammoké márá ham bedayét, chiá ke may cherág mermeránk ant.’ ⁹ Dánáén jenekán passaw dát: ‘Na, balkén pa máshomá sajjahénán bass mabant, shomá berawét cha dokkánán thél bezurét.’ ¹⁰ Bale wahdé á théláy geragá shotagatant, sálónk átk o raset. Hamá jenek ke tayár o járhig atant, sálónkay hamráhiá suray mehmániá shotant o mehmánjáhay darwázag band but. ¹¹ Randá é dega jenek ham átkant o gwashtesh: ‘Wájah, oo wájah! Darwázagá pa má pach kan.’ ¹² Bale sálónká passaw tarrént: ‘Shomará rásténa gwashán ke man shomará nazánán.’

¹³“Paméshká hósh o sár bebét chiá ke shomá á róch o sáhatá heccha nazánét.

Bádsháh o hezmatkáráni mesál

(Luká 19:11–27)

¹⁴“Hamé dhawlá Hodáay bádsháhi, mardéay paymá ent ke sát o saparéá shot. Hezmatkári lóthetant o wati mál o maddhii hamáyáni dastá dát. ¹⁵ Har hezmatkári, áiay bud o twánay kesásá zarr dát, yakké panch tálánt,^f domi do tálánt o saymi yak tálánté dáti o wati sapará shot. ¹⁶ Á

^e24:40 Pasht géjag, bezán nazurag, yalah dayag, gechén nakanag.

^f25:15 Tálánt yak dábén zarré at. Yak tálánt, pándah sálay mozz butag.

hezmatkár ke áiá panch tálánt rasetagat, hamá damáná sawdágeriá shot o panch tálanti nap raset.
¹⁷ Hamé paymá, á domi ke do tálanti rasetagat, dega do tálanti nap raset. ¹⁸ Bale hamáiá, ke yak tálanté rasetagati, wájahay zarri zort o yak jágahé zeminá kall kort o chéri dát.

¹⁹ “Bázén wahdédá rand, é hezmatkárani hodábond per tarret o átk o cha áyán hesábi lóthet.
²⁰ Hamáiá ke panch tálant rasetagat, dega panch géshén tálanti áwort o gwashti: ‘Oo wájah! Taw maná panch tálant dáttagat, é panchén géshén ant ke man katthetagant.’ ²¹ Hodábondá gwasht: ‘Shábásh, oo wapádár o sharrén golám! Taw gón kammén bonmálá tachk o rást butagay, nun man tará géshterén káráni zem mah o dhobbahá^g dayán, byá mani shádkámiáni sharikdár bay.’ ²² Hamá ke do tálanti rasetagat ham átk o gwashti: ‘Oo wájah! Taw maná do tálant dáttagat, esh ant do dega ke cha á doénán man katthetagant.’ ²³ Áiay hodábondá gwasht: ‘Shábásh, oo wapádár o sharrén golám! Taw ham gón kammoká tachk o rást butagay, tará ham géshterén káráni dhobbahá dayán, byá mani shádkámiáni sharikdár bay.’

²⁴ “Nun hamá hezmatkár átk ke áiá yak tálanté rasetagat, gwashti: ‘Oo wájah! Man zántag ke taw trondén mardé ay, nakeshtagéna ronay o cha hamódá moccha kanay o baray ke tohmi dánagé nachandhetaget. ²⁵ Paméshká cha torsá man tai dáttagén tálant zeminá kall kort, esh ent tai zarr.’ ²⁶ Áiay hodábondá passaw dát: ‘Oo nábus o békárén golám! Wahdé taw zánt man nakeshtagéna ronán o ódá ke tohmi dánagé nachandhetagon, moccha kanán o barán, ²⁷ gorhá báyad ent taw mani dáttagén zarr byáji o bápáriéay kerrá ér bekorténant tánke cha wati saparay per tarragá rand, mani wati zarr gón putt begepténant. ²⁸ Paméshká tálantá cha eshiá pach gerét o hamáiá bedayét ke áiay kerrá dah tálant ant. ²⁹ Chiá ke harkasá chizé hast, áiá géshter dayaga bit tán sarréch bebit, bale harkasá ke nést, harché ke hasti ham pach geraga bit. ³⁰ É nábusdén golámá dhanná taháriá dawr bedayét. Ódá gréwant o dantán pa dantána droshant.’

Ensánay Chokkay dádrasi

³¹ “Wahdé Ensánay Chokk gón wati mazanén shán o marháhá préshtagáni hamráhiá kayt, gorhá wati porshawkatén tahtay sará nendit. ³² Á wahdá sajjahén kawmáni mardom árag o áiay démá mocch kanaga bant o á, áyán anchosha gisshénit o do bahra kant ke shwánag wati bozán cha méshán jetá kant. ³³ Méshán wati rástén némagá kant o bozán chappén némagá. ³⁴ Gorhá bádsháh gón áyán ke rástén némagá ant, gwashit: ‘Oo bahtáwarán ke shomará cha mani Petá barkat rasetag! Byáét, é bádsháhiá wati mirás kanét, ke cha donyáay bongéjá pa shomá tayár kanag butag. ³⁵ Chiá ke wahdé man shodig atán, shomá maná warag dát. Tonnig atán, maná ápó dát. Dar pa dar atán, maná wati lógá jágahó dát. ³⁶ Jándar atán, maná póshákó dát. Nádráh atán, mani hálporsoi kort. Bandig atán, mani gendagá átkét.’ ³⁷ Gorhá hamá pahrézkárén mardom cha bádsháhá josta kanant: ‘Oo wájah! Má kadi tará shodig distag o warag dáttag, tonnig distag o áp dáttag. ³⁸ Má kadi tará dar pa dar distag o wati lögán jágah dáttag, kadi tará jándar distag o póshák gwará dáttag, ³⁹ kadi tará nádráh yá bandig distag o tai gendagá átkagén?’ ⁴⁰ Bádsháh passawa dant: ‘Báwar kanét, wahdé shomá gón mani yak kaster kasterén brátéá é paymén kár kortag, gorhá allam bezán gón manó ham kortag.’

⁴¹ “Randá gón hamáyán ke chappén némagá ant, gwashit: ‘Oo shummán! Cha mani démá dur bét o hamá jamburén ásay némagá berawét ke hechbara namerit o pa Shaytán o áiay hamráhán^h addh kanag butag. ⁴² Chiá ke wahdé man shodig atán shomá maná warag nadát, tonnig atán ápó nadát. ⁴³ Dar pa dar atán lögá nabot, jándar atán póshák gwará nadát, nádráh yá bandig atán o manó hálporsoi nakort.’ ⁴⁴ Gorhá á ham josta kanant: ‘Oo wájah! Má kadi tará shodig, tonnig, dar pa dar, jándar, nádráh yá bandig distag o tai hezmat nakortag?’ ⁴⁵ Gorhá bádsháh áyán é dhawlá passawa dant: ‘Báwar kanét, wahdé shomá gón mani hech kasterénéá é dhawlén kár nakortag, gorhá allam bezán gón manó ham nakortag.’ ⁴⁶ Paméshká é mardom dém pa abadmánén sezáyá rawant, bale pahrézkárén mardomán namiránén zenda rasit.”

^{825:21} Dhobbah, bezán ogdah, zem mah, Arabi o Pársia “wazifah”.

^h25:41 Asligén Yunáni nebeshtánka gwashit: “Shaytán o áiay préshtagán”.

Issáay koshagay pandal o sázesh

(Markás 14:1–2; Luká 22:1–2; Yuhanná 11:45–53)

26 ¹ Wahdé Issáyá é habar halás kortant, gón wati moridán gwashti: ² “Shomá wassha zánét ke do róchá rand Sargwazay aidaⁱ bit o Ensánay Chokk pa salib kasshagá geráénaga bit.” ³ Hamé wahdá, mazanén dini péshwá o kawmay kamáshán, masterén dini péshwá Kiápáay márhiá diwán kort o ⁴ é pandal jórhént ke Issáyá pa yak repk o honaré begeráénant o bekóshárénant. ⁵ Bale gwashtesh: “Aiday róchán na, chosh mabit ke mardom áshóp bekanant.”

Janéné Issáyá atra moshit

(Markás 14:3–9; Yuhanná 12:1–8)

⁶ Wahdé Issá Bayt-Anyáyá hamá Shamusay lógá at ke cha jozámay nádráhiá dráh butagat, ⁷ yak janéné gón sengmarmarén atrdánéá ke gránbaháén atri mán at, Issáay gwará átk. Issá parzónagay sará neshtagat o hamódá Issáay sari atr per mosht. ⁸ Gón é káray gendagá, Issáay morid delá nawassh butant ke: “Chiá é atr zawál kanag but? ⁹ Agan é bahá kanag butén, mazanén zarré rasetagat o garib o nézgárán dayag butagat.” ¹⁰ Issáyá moridáni é nawasshi sarkech wárt, paméshká gwashti: “Chiá shomá é janéná ranjénagá ét? Eshiá gón man nékié kortag. ¹¹ Garib o nézgár modám shomay kerrá hast, bale man harwahd gón shomá gón naán. ¹² É janén pésh kaptag o pa mani kabr kanagay tayáriá, maná atri per moshtag. ¹³ Shomará rásténa gwashán, sajjahén donyáyá, har kondhé ke mani wasshén mestág jár janaga bit, é janén o eshiay kár ham yát kanaga bit.”

Yahudá wahd o móhéay shóházá ent

(Markás 14:10–11; Luká 22:3–6)

¹⁴ Randá cha dwázdahén moridán yakké, ke námi Yahudá Eskaryuti at, mazanén dini péshwáyáni kerrá shot o ¹⁵ gwashti: “Agan man Issáyá shomay dastá bedayán, shomá maná ché dayét?” Áyán si nograhén korsh^j hesáb kort o áiay dastá dát. ¹⁶ Cha hamá wahdá o rand, Yahudá pa Issáay áyáni dastá dayagá gwam o gégen wahd o móhéay shóházá at.

Sargwazay aiday tayári

(Markás 14:12–21; Luká 22:7–14; Yuhanná 13:21–30)

¹⁷ Béhomirén nánay aiday^k awali róchá, moridán cha Issáyá jost kort: “Ché lóthay, Sargwazay aiday shámay tayáriá kojá bekanén ke taw bwaray?” ¹⁸ Áiá passaw dát: “Shahrá berawét o pelán mardomá begwashét ke: ‘ostáda gwashit, mani wahd nazzik ent, mani dela lóthit gón wati moridán sargwazay shámá tai lógá bwarán.’” ¹⁹ Gorhá moridán Issáay gwashagay sará Sargwazay shám tayár kort.

²⁰ Bégáh ke but, Issá gón wati dwázdahén moridán parzónagay sará neshtagat. ²¹ Waragay wahdá áiá gón moridán gwasht: “Báwar kanét, cha shomá yakké maná dróhit o dozhmenáni dastá dant.” ²² Morid báz paréshán o deltaparkah butant o bárig bárigá cha áiá jost kanagá laggetant: “Oo Hodáwand! Man wa naán, na?” ²³ Áiá passaw tarrént: “Á ke annun gón man hamkásag but, hamá maná dróhit.” ²⁴ Hamá dhawlá ke nebisag butag, Ensánay Chokk cha é donyáyá rawagi ent, bale bazhn o apsóz pa hamáiá ke Ensánay Chokká dróhit. Pa áiá sharter at ke hechbar cha mátá pédá mabutén. ²⁵ Gorhá Yahudáyá, hamá ke Issái dróhagi at, gwasht: “Oo ostád! Man wa naán, na?” Issáyá passaw dát: “Taw wat gwasht.”

Goddhi shám

(Markás 14:22–26; Luká 22:15–20; Korentiáni Awali Kágad 11:23–25)

²⁶ Wahdé shám waragá atant Issáyá nagané zort, Hodáay shogri gept, chondh chondh kort o moridáná dáti. Gwasht: “Bezurét o bwarét, é mani jesm ent.” ²⁷ Padá jámé zorti, Hodáay shogri gept, moridáná dát o gwasht: “Shomá sajjahén cha eshiá benóshét.” ²⁸ É mani ahd o karáray hón ent, ke pa bázénéay gonáháni bakshagá réchaga bit. ²⁹ Man shomará gwashán, nun dega baré

ⁱ26:2 Eshiá Sargwazay aid paméshká gwashant ke, cha Mesriáni chérdastiá Yahudiáni ázátiay wahdá, markay préshtag cha Yahudi chokkáni koshagá sar gwast.

^j26:15 Asligén Yunáni nebeshtánka gwashit: “si árguriá”. Korsh Balócháni kwahnén zarr ent.

^k26:17 Béhomirén nánay aid, Sargwazay aidá rand hapt róchay tahá geraga bit.

anguray dahl o samará nanóshán, hamá róchá padá nósháni ke wati Petay bádsháhiá, gón shomá hora bán.”³⁰ Hodáay sepat o sanáyá^l rand, dém pa Zaytunay kóhá ráh geptant.

Petrosay enkáray péshgói

(Markás 14:27–31; Luká 22:31–34; Yuhanná 13:36–38)

³¹ Gorhá Issáyá gón moridán gwasht: “Shomá sajjahén, hamé enshapi thagala warét o maná yalahá kanét, chiá ke nebisag butag: *Man shopánká janán o ramagay pas sheng o shángá bant.*^m

³² Bale zendag bayag o jáh janagá rand, cha shomá pésar Jalilá rawán.”³³ Gorhá Petrosá darráent: “Agan sajjahén thagal bwarant o tará yalah bedayant, man hechbar thagala nawarán.”³⁴ Issáyá gwasht: “Tará rásténa gwashán, hamé enshapi cha koróbángá pésar, mani pajjáh áragá say randá enkára kanay o namannay.”³⁵ Bale Petrosá gwasht: “Agan gón taw mani sar ham berawt, cha tai pajjárá hechbara nabajján.” É dega sajjahén moridán ham anchosh gwasht.

Issáay dwá

(Markás 14:32–42; Luká 22:39–46)

³⁶ Randá Issá gón wati moridán Jetsimáni námén jágahéá shot o gón áyán gwashti: “Hamedá bedárét, man kammé démterá rawán o dwá kanán.”³⁷ Zebdiay doén chokk o Petrosi wati hamráh kortant. Anágat yak mazanén andóh o bétáhiriéⁿ áiay jesm o jána nesht.³⁸ Gón áyán gwashti: “Sakk paréshán án, gam o andóhán maná markig kortag, shomá edá bedárét, mawapsét o mani hamráhiá ágáh o hozzhár bét.”³⁹ Randá kammé démterá shot, dém pa chér kapt o dwá kanáná gwashti: “Oo mani Pet! Agan buta kant, cha man é sakkiáni jám o pyálahá bethagalén, bale á dhawlá na ke mana lóthán, hamá dhawlá ke taw lóthay.”

⁴⁰ Wahdé per tarret o wati moridáni kerrá átk, disti ke á wáb ant. Gón Petrosá gwashti: “Nabut yak sáhaté ham gón man ágáh bemánét?”⁴¹ Hozzhár bét o dwá kanét tánke ázmáesh o chakkásá makapét. Ruh, tayár o morádig ent, bale jesm nezór o nátwán.”⁴² Domi bará pa dwá kanagá shot o dwái kort: “Oo mani Pet! Agan é pyálah bé nóshagá cha man thagalénaga nabit, gorhá harché ke tai razá ent hamá dhawlá bebit.”⁴³ Wahdé per tarret, disti padá wáb ant. Áyáni chamm rohézag^o o wábénag atant.⁴⁴ Yalahi dátant o saymi randá padá pa dwá kanagá shot o hamá dwái kort.⁴⁵ Gorhá moridáni kerrá per tarret o gwashti: “Angat ham waptag o áram kanagá ét? Nun á wahd o sáhat nazzik ent ke Ensánay Chokk dróhag o gonahkáráni dastá dayaga bit.”⁴⁶ Pád áét berawén. Á ke maná dróhit, pédák ent.”

Issáay dazgir kanag

(Markás 14:43–50; Luká 22:47–53; Yuhanná 18:3–12)

⁴⁷ Issá angat habará at ke cha dwáz dahén moridán yakké, bezán Yahudá, átk o raset. Áiá mazanén rombé hamráh at ke zahm o latthesh gón at. É romb, cha mazanén dini péshwá o kawmay kamásháni némagá ráh dayag butagat.⁴⁸ Issáay dróhóká^p áyáná é nesháni dáttagat: “Hamáiá ke mana chokkán, Issá hamá ent. Áiá dazgir kanét.”⁴⁹ Gorhá Yahudá tachkátachk Issáay kerrá átk o gwashti: “Oo ostád! Drud o drahbát!” Randá Issái chokket.⁵⁰ Issáyá gwasht, “Oo hambal! Pa hamá kárá ke átkagay, bekani.” Gorhá démá átkant, Issáesh gept o dazgir kort.⁵¹ Hamá damáná, Issáay hamráhán yakkéá wati zahm kasshet o masterén dini péshwáay nawkaray góshi sest.⁵² Issáyá gón áiá gwasht: “Wati zahmá jotká^q kan. Á kas ke zahma kasshit, cha zahmá merit.”⁵³ Záná, taw nazánay agan cha wati Petá belóthán, á pa mani komaká hamé annun dwáz dah lashkará^r géshter préshtag ráha dant.⁵⁴ Bale gorhá Pákén Ketábáni nebeshtagén hamá habar ke báyad ent sarjam bebant, chón pa sara rasant?”⁵⁵ Nun démi mardománi mocchiay némagá tarrént o gwashti: “Záná man yági o rahzané án ke shomá gón zahm o latthán pa mani geragá átkagéét? Man har róch mazanén parasteshgáhá neshtag o mardom dars o sabak dáttagant o shomá maná nageptag.”⁵⁶ Bale é

^l26:30 Bezán Zabur 115–118.

^m26:31 Zakariá Nabiay Ketáb, bahr 13, band 7.

ⁿ26:37 Bétáhiri, bezán békárami, békárári.

^o26:43 Rohézag, bezán wábá porr.

^p26:48 Dróhók, bezán hamá ke wati hamráhá rada dant o bahá kant.

^q26:52 Jotk, bezán zahm yá kárchay jelid, pósh, nyám.

^r26:53 Asligén Yunáni nebeshtánka gwashit: “dwáz dah ligiun”. Har ligiuná 6000 sepáhig hastat.

paymá paméshká but ke Nabiáni Ketábáni péshgói, rást o paddar bebant.” Gorhá sajjahén moridán á yalah dát o jestant.

Issá, sarókáni diwáná

(Markás 14:53–65; Luká 22:54–55, 63–71; Yuhanná 18:13–14, 19–24)

⁵⁷ Issáay dazgir kanókán, Issá zort o masterén dini péshwá Kiápáay kerrá bort ke ódá Sharyatay zánóger o kawmay kamásh mocch atant. ⁵⁸ Petros ham dur durá, Issáay randá rawán at tán masterén dini péshwáay lógay péshjáhá raset, tahá potert o góñ hezmatkárán nesht tán bezánt ke chónén shawré borraga bit. ⁵⁹ Mazanén dini péshwá o sarókáni diwánay sajjahén bask,^s pa Issáay markay sezá dayagá drágén sháhediay shoházá atant, ⁶⁰ chónáhá bázén drágén sháhed pa gwáhi dayagá pád átk, bale heccresh dastá nakapt. Godhsará do mardom démá dar átk o ⁶¹ gwashtesh: “É mardá gwashtag ke: ‘Man Hodáay parasteshgáhá próshtha kanán o say róchá padá bandáni.’” ⁶² Gorhá masterén dini péshwá pád átk o cha Issáyá josti kort: “Tai bárawá chónén sháhedi dayagá ant? Esháni hech passawa nadayay?” ⁶³ Bale Issáyá passaw nadát. Masterén dini péshwáyá padá góñ áiá gwasht: “Man tará namíránen Hodáay sará sawganda dayán, márá begwash, bárén, taw hamá Masih, Hodáay Chokk ay?” ⁶⁴ Issáyá darráent: “Taw wat gwasht. Bale shomá sajjahénán hala dayán, démterá gendét ke Ensánay Chokk zóráwarén Hodáay rástén némagá neshtag. Cha ásmánay jambaráni sará ham kayt.” ⁶⁵ Gorhá masterén dini péshwáyá wati gwaray jámag dert o gwashti: “Eshiá kopr kort, angat ham márá sháhed pakár ent? Shomá eshiay kopr wat eshkot. ⁶⁶ Nun shomay shawr o saláh chi ent?” Áyán passaw dát: “Eshiay sezá mark ent.” ⁶⁷ Randá áyán Issáy démá toh kort^t o lahténá mosht o shahmát ham jat. ⁶⁸ Nun gwashtesh: “Oo Masih! Pa má paygambari kan o begwash tará kayá jat.”

Petrosay enkár

(Markás 14:66–72; Luká 22:56–62; Yuhanná 18:15–18, 25–27)

⁶⁹ Á wahdá Petros dhanná péshjáhá neshtagat, móledé áiay kerrá átk o gwashti: “Taw ham Jalili Issáay hamráh butagay.” ⁷⁰ Bale áiá sajjahénáni démá namannet o gwashti: “Mana nazánán taw ché gwashagá ay.” ⁷¹ Wahdé dém pa mazanén darwázagá rawagá at, dega móledéá dist o góñ mardomán gwashti: “É mard Issá Náseriay hamráh butag.” ⁷² Petrosá sawgand wárt o domi randá namannet o gwashti: “Man é mardá nazánán.” ⁷³ Damánéá rand, ódá óshtátagén mardom Petrosay kerrá átkant o gwashtesh: “Allamá taw cha hamáyán ay, cha tai gálwárá anchosh jáha kayt.” ⁷⁴ Petrosá pa nálaté sawgand wárt o gwasht: “Man é mardá nazánán.” Hamá damáná korósá báng dát. ⁷⁵ Gorhá Petros yát o tránagá kapt ke Issáyá gwashtagat: “Korósay bángá pésar, taw say randá mani pajjáh áragá enkára kanay.” Nun dhanná dar átk o sakk gréti.

Sarókáni shawr

(Markás 15:1; Luká 23:1–2; Yuhanná 18:28–32)

27 ¹ Sabáhá máhallah, sajjahén mazanén dini péshwá o kawmay kamásh Issáay kóshá hamshawr butant. ² Issáesh bast, gerrán kort o Rumi wáli Pilátusay dastá dát.

Yahudáay watkoshi

(Kásedáni Kár 1:18–19)

³ Wahdé Issáay geráénók Yahudáyá dist ke Issáesh mayárig kort, cha wati kortagén kárá pashómán but o sién nograhén korshi bort o mazanén dini péshwá o kawmay kamásháná wápas dátant. ⁴ Gwashti: “Man sakk mayárig án ke yak bégonáhén mardomé pa kóshárenagá geráéntag.” Bale áyán passaw dát: “Má chón kanén, taw bezánay o tai kár.” ⁵ Gorhá Yahudáyá hamá zarr mazanén parasteshgáhá dawr dátant o shot, watá gothlóp kort o koshti. ⁶ Mazanén dini péshwáyán zarr zortant o gwashtesh: “É palitén^u zarr ant, parasteshgáhay hazánagá esháni ér kanag nárawá ent.” ⁷ Paméshká shawr o saláhá rand, cha á zarrán kombáréay^v dhagáresh bahá gept ke pa darámadán kabrestáné bekananti. ⁸ Tán róch maróchigá á dhagáray nám “hónay dhagár” ent.

^s26:59 Bask, bezán ozw, membar.

^t26:67 Toh kanag, bezán tok kanag.

^u27:6 Asligén Yunáni nebeshtánka gwashit: “hónigén zarr”.

^v27:7 Kombár, bezán hamá ke komb o kunzag addha kant.

⁹ Paméshká chosh but tán hamá chiz ke Eremiá nabiay zobáná péshgói kanag butag, rást o paddar bebit: *Man sién nograhén korsh zortant ke é zarr Bani Esráilay chokkán áiay kímmat bastagat o*¹⁰ *cha é zarrán kombáray dhagáron bahá gept, anchosh ke Hodáwandá maná parmán kortagat.*^w

Issá Pilátusay démá

(Markás 15:2–5; Luká 23:3–5; Yuhanná 18:33–38)

¹¹ Nun Issá wáliay démá óshtárénag but o wáliá cha áiá jost kort: “Taw Yahudiáni bádsháh ay?” Issáyá passaw dát: “Taw wat gwashagá ay.” ¹² Mazanén dini péshwá o kawmay kamásh Issáyá beddh o bohtám janagá atant, bale áiá hech passaw nadát. ¹³ Pilátusá gwasht: “Taw naeshkonagá ay ke é tará chinchock beddh o bohtám janagá ant?” ¹⁴ Bale Issáyá áyáni hech bohtámay passaw ham nadát o wáli sakk hayrán mant.

¹⁵ Wáliá har sál aiday wahdá, cha Yahudi bandigán yakké, hamá ke mardomán belóthetén, ázáta kort. ¹⁶ Á wahdá yak námdárén bandigé jélá at ke námi Bárábás at. ¹⁷ Nun ke mardom mocch atant, Pilátusá cha áyán jost kort: “Shomá ché lóthét? Man kayá ázát bekanán? Bárábásá, yá Issáyá ke Masih ham gwashanti?” ¹⁸ Áiá zántagat ke Issáesh pa hasadd o konnat áiay dastá dáttag. Paméshká chosh gwashti.

¹⁹ Wahdé Pilátus hakdiwáná neshtagat, áiay janá é kolaw ráh dát ke: “Gón é bégonáh o nékén mardá hecch makan, chiá ke dóshi man eshiay bárawá sakkén paréshánén wábé distag.” ²⁰ Bale mazanén dini péshwá o kawmay kamáshán mardománi mocchi sakk shórént^x o áshopént^y ke Issáy mark o Bárábásay ázátiá belóthant. ²¹ Wáliá jost kort: “Ché lóthét, cha é doénán kojámiá pa shomá ázát bekanán?” Áyán gwasht: “Bárábásá.” ²² Pilátusá cha áyán jost kort: “Gorhá gón Issáyá ke Masih ham gwashanti, ché bekanán?” Áyán pa hamtawári passaw dát o gwasht: “Salibi kassh!” ²³ Pilátusá jost kort: “Chiá bárén? Mayári chi ent?” Bale áyán géshter kukkár kort o gwashtesh: “Salibi kassh!”

²⁴ Wahdé Pilátusá dist ke hech káré korta nakant o mardom shóresh kanagá ant, gorhá áiá áp zort, mocchiay démá wati dast shoshtant o gwashti: “Man cha é marday hóná bémayár án, shomá bezánét o shomay kár.” ²⁵ Sajjahén mardomán gwasht: “Eshiay hón mayg o may chokkáni gardená bebit.” ²⁶ Gorhá Pilátusá pa áyánigi, Bárábás ázát kort o Issá shallák janáént o dáti ke áiá salibay sará bedranjant.

Issáy sará kalág o rishkand

(Markás 15:16–20; Yuhanná 19:2–3)

²⁷ Wáliay sepáhigán Issá wáliay kóth o márhiay péshjáhá bort o sepáhigáni sajjahén lashkar áiay chapp o chágerdá mocch kort. ²⁸ Áyán, Issáy gwaray god kasshetant o bádsháháni paymén sohrchakén kabáhé gwará dát, ²⁹ cha dhangar o konthagán tájé jórhént o áiay sará ér kort, latthé rástén dastá dát o pa kalág o rishkand, áiay démá kóndhán kaptant o gwashtesh: “Drud o drahbát, oo Yahudiáni bádsháh!” ³⁰ Áiay démá tohesh kort o hamá latthesh sará jat. ³¹ Wahdé kalág o malandhesh hallént, gwaray kabáhesh kasshet o áiay jenday godesh padá gwará dátant. Randá dém pa salib kasshagá bortesh.

Issá o salib

(Markás 15:21–32; Luká 23:26–43; Yuhanná 19:17–27)

³² Wahdé rawagá laggetant, Shamen námén mardé distesh ke Keriniay shahray mardomé at. Sepáhigán á pa bigár gept ke Issáy salibá baddhá bekant. ³³ Wahdé “Joljotá” bezán hamá “Kámpól” námén jághá rasetant ³⁴ ódá Issáesh morr mán retkagén sharáb dát, bale áiá chashagá rand nawárt. ³⁵ Nun salibay sará dratkesh, pocch o póshákesh watmánwatá bahr kortant o áyáni sará pál^z jatesh ke bárén kayá berasant. ³⁶ Randá hamódá neshtant o áiay negahpániesh kort. ³⁷ Issáy sarborá, salibay dáray sará, mayárnámagé dratkesh ke áiay sará nebeshtagat: “É Yahudiáni bádsháh, Issá ent.”

³⁸ Issáay hamráhiá do yági o dozzesh ham salibay sará dratk, yakké rástén o domi chappén némagá. ³⁹ Rahgwazán dozhmán dayán, wati sar chandhént o ⁴⁰ gwashtesh: “Oo mazanén

^w27:10 Zakariá Nabiay Ketáb, bahr 11, band 12 o rand, Eremiá Nabiay Ketáb, bahr 32, band 6 o rand.

^x27:20 Shórénag, bezán pád kanag, tahrik kanag.

^y27:20 Áshopénag, bezán pád kanag, tahrik kanag.

^z27:35 Pál, bezán láthari, bay o shartbandi.

parasteshgáhay karójók ke gwashtaget: ‘say róchá padá áiá addha kanán’. Agan taw Hodáay Chokk ay, gorhá cha salibá ér á o watá berakkén.’⁴¹ Hamé dhawlá mazanén dini péshwá, Sharyatay zánóger o kawmay kamásh ham áiay sará rishkand o maskará kanagá atant.⁴² Gwashtesh: “Á dega mardomi rakkéntant, bale watá rakkénta nakant, é wa Esráilay bádsháh ent, agan nun cha salibá ér bekapit, má áiay sará báwara kanén.”⁴³ Óst o ométi pa Hodá bastag, agan Hodáyá dóst ent, berakkéniti, chiá ke gwashtagati: ‘Man Hodáay Chokk án.’⁴⁴ Hamé paymá Issáay hamráhiá salib kasshetagén yági ham áiá bad o rad gwashagá atant.

Issáay mark

(Markás 15:33–41; Luká 23:44–49; Yuhanná 19:28–30)

⁴⁵ Némróchá beger tán bégáhay sayá,^a sajjahén moltk anágat tahár but. ⁴⁶ Bégáhay sáhat sayá,^b Issáyá chihál^c jat: “Eli, Eli, lemá sabaktani?” Bezán: Oo mani Hodá, oo mani Hodá! Taw chiá maná tahná esht?^d ⁴⁷ Ódá, lahtén óshtátagén mardomá wahdé eshkot, gwashtesh: “Elyásá tawár kanagá ent.”⁴⁸ Cha áyán yakké tacháná shot, espanjé zorti o tropshén sharábá missénti, dáréay sará bast o pa chussagá Issáay némagá shahárti. ⁴⁹ Bale é dega mardomán gwasht: “Sabr o wadár kanét, bechárén bárén Elyás áiay rakkénagá kayt yá na?”⁵⁰ Issáyá domi bará borzén tawáréá chihál kasshet o sáh dát. ⁵¹ Hamá wahdá mazanén parasteshgáhay pardah, borzadá beger tán jahlád, dert o do bahr but, zemin larzet o talár trakket o kap butant,⁵² kabráni dap pach but o bázén pák o pahrézkárén mardom ke mortagatant, padá zendag butant.⁵³ Issáyá jáh janag o zendag bayagá rand, cha wati kabrán dar átkant, Urshalimay Pákén shahrá shotant o watá pa bázénéá záher o paddaresh kort.⁵⁴ Hamá pawji apsar o áiay hamráhén sepáhig ke Issáay páneg atant, wahdé zeminchandh o é dega sargwastesh distant, sakk torset o gwashtesh: “Béshakk é mard Hodáay Chokk at.”

⁵⁵ Bázén janéné ham, ke cha Jalilá pa Issáay hezmat o chalópagá áiay hamráhiá átkagat, dur óshtátag o cháragá atant. ⁵⁶ Gón áyán Maryam Majdaliah, Ákub o Issopay mát Maryam o Zebdiay chokkáni mát gón atant.

Issáay kabr o kapon

(Markás 15:42–47; Luká 23:50–56; Yuhanná 19:38–42)

⁵⁷ Rónendá, Arimátiáay shahray Issop námén zardárén mardé átk ke Issáay moridé at. ⁵⁸ Pilátusay kerrá shot o Issáay jónay baragay ejázati lóthet. Pilátusá parmán dát ke jóná áiá bedayant.⁵⁹ Issopá jón zort o mán sápén godéá patát o⁶⁰ hamá nökén kabray tahá ér dát ke pa wat cha talárá tráshtagati. Mazanén dhóké léth dayáná kabray dapá éri kort o shot.⁶¹ Bale Maryam Majdaliah o á dega Maryam, hamódá kabray dém pa démá neshtant.

Kabray negahpáni

⁶² Domi róchá, bezán Shambehá,^e mazanén dini péshwá o Parisi yakjáh but o Pilátusay kerrá shotant. ⁶³ Gwashtesh: “Oo wájah! Márá yát ent ke é dróbandá wati zendá gwashtagat ke ‘say róchá rand man padá zendaga bán o jáha janán.’”⁶⁴ Paméshká parmán beday ke tán say róchá kabray sará negahpáni kanag bebit, chó mabit ke áiay morid jóná bedozzant o bebarant o gó mardomán begwashant ke á cha mordagán padá zendag butag o é goddhi repk o dróg, cha pésarigéná angat gandahter bebit.”⁶⁵ Pilátusá darráént: “Negahpán wa esh ant, wati hamráhiá bebarét o haminchok ke gó shomá buta kant, kabray negahpániá bekanét.”⁶⁶ Gorhá shotant o kabray dapay mazanén dhók mohr o mómband kort o sepáhigesh páneg kortant.

^a27:45 Asligén Yunáni nebeshtánka gwashit: “shashomi sáhatá beger tán nohomi sáhatá”.

^b27:46 Asligén Yunáni nebeshtánka gwashit: “nohomi sáhatá”.

^c27:46 Chihál, bezán dardnákén kukkár.

^d27:46 Zabur 22:1.

^e27:62 Asligén Yunáni nebeshtánka gwashit: “Shabbatay tayáriay róchá rand”.

Issáay jáh janag

(Markás 16:1–8; Luká 24:1–12; Yuhanná 20:1–10)

28 ¹ Shabbatay róchá rand, bezán Yakshambehay^f gwarbámá^g Maryam Majdaliah o á dega Maryam kabray cháragá shotant. ² Yak anágat mazanén zeminchandhé but, chiá ke Hodáwanday préshtagé cha ásmáná ér átk, dhóki léthént o áiay sará nesht. ³ Rang o dróshomi grókay paymá drapshagá at o god o pósháki, barpay dhawlá espét atant. ⁴ Negahpánén sepáhig cha bimmá larzagá laggetant o mordagay dhawlá butant. ⁵ Préshtagá gón janénán gwasht: “Matorsét! Mana zánán shomá Issáay shoházá ét ke salib kasshag butag. ⁶ Á edá naent, anchosh ke wat gwashtagati zendag butag o jáhi jatag, byáét hamá jágahá bechárét ke ér kanag butagat. ⁷ Eshtápiá berawét o áiay moridán sahig kanét ke á cha mordagán zendag butag o cha shomá pésar Jalilá rawt, hamódá áiá gendét. Nun man shomará hál dát.” ⁸ Gorhá janén pa tors o ham gón wasshi cha kabray sará tachán but o shotant tán é hálá moridán sar bekanant. ⁹ Issá bé gat o gománá anágat wat gón á janénán dochár kapt o gwashti: “Drud o drahbát!” Á nazziká átkant, Issáay pádesh geptant o parasteshesh kort. ¹⁰ Issáyá gón áyán gwasht: “Matorsét! Berawét mani brátán begwashét ke Jalilá berawant, hamódá maná gendant.”

Dini péshwá o sepáhigáni pandal

¹¹ Hamá wahdá ke janén per tarrag o rawagá atant, lahtén negahpánén sepáhig, dém pa shahrá shot tán dini péshwáyán cha é sargwastán sahig bekanant. ¹² Dini péshwáyán, kawmay kamásháni gend o nend o shawr o saláhá rand, sepáhig mazanén zarré lálech dát o ¹³ gwashtant: “Gón mardomán begwashét: ‘Shapá má wáb butagén, áiay morid átkagant o jónesh dozzettag o bortag.’ ¹⁴ Agan wáli cha é hálán sahig but, shomá paréshán o deltaparkah mabét, má áiá sarpada kanén ke pa shomá janjálé mabit.” ¹⁵ Sepáhigán zarr zortant o anchosh ke sój dayag butagatant, hamá dábesh kort. É kessah tán róch maróchigá Yahudiáni nyámá sheng o tálán ent.

Jahán o Issáay mestág

(Markás 16:14–18; Luká 24:36–49; Yuhanná 20:19–23; Kásedáni Kár 1:6–8)

¹⁶ Gorhá yázdahén morid Jalilay hamá kóhay sará shotant ke Issáyá gón áyán gwashtagat. ¹⁷ Wahdé áyán Issá dist parasteshesh kort, bale lahtén angat shakk at. ¹⁸ Issáyá gón áyán gwasht: “Ásmán o zeminay sajjahén zór o wák mani dastá dayag butag. ¹⁹ Paméshká, berawét sajjahén kawmán mani morid bekanét, Pet o Chokk o Pákén Ruhay námá pákshódi bedayét o ²⁰ áyán dars o sabak bedayét ke mani sajjahén hokm o parmánáni sará kár bekanant. Deljam bebét, man tán donyáay halásiá, modám gón shomá gón án.”

^f28:1 Asligén Yunáni nebeshtánka gwashit: “haptagay awali róchay”.

828:1 Gwarbám, bezán róthekk, róchay dar áyagay wahd.